

# निर्गमन

1 याकूब आपन बेटवन क संग मिस्त्र क जात्रा प गवा। अउर हर एक पूत आपन परिवार क संग लिहेस। इस्त्राएल क बेटवन क नाउँ अहईँ: 2रूबेन, सिमोन, लेवी, यहूदा, 3इस्साकर, जबूलुन, बिन्यामीन 4दान, नफ्ताली, गाद, आसेर 5याकूब क आपन सन्तानन में सत्तर लोग रहेन। (ओकरे बारह बेटवन में स यूसुफ पहिलेन स मिस्त्र में रहा।)

6पाछे यूसुफ, ओकर भइयन अउ ओकरे पीढ़ी क सबइ परानी मर बिलाइ गएन। 7मुला इस्त्राएल क मनइयन क ढेर गदेलन रहेन, अउर ओनकइ संख्या बाढ़त गइ। उ पचे बरिआर होइ गएन अउ ओन लोगन स भुईया भरि गई रही रहेन।

## इस्त्राएल क मनइयन क कस्ट

8तबइ एक नवा राजा मिस्त्र प हुकूमत करइ लाग। उ राजा यूसुफ क नाहीं जानत रहा। 9राजा लोगन स कहेस, “इस्त्राएल क मनइयन क लखा। एनकइ तादद जिआदा बा। अउ उ पचे हमसे जिआदा बरिआर अहईँ। 10हम पचन क अइसी चाल चलइ क चाही कि इस्त्राएलियन क बरिआर होइसे रोकइ चाही। जदि जुद्ध होत ह, तउ इस्त्राएलियन हमरे दुस्मनन क साथ देइहीं। तबहिं उ सबइ हम पचन क हराइ सकित ह अउ हमरे हाथे स निकारि सकित ह।”

11मिस्त्र क लोगन इस्त्राएलियन क जिन्नगी क दूभर बनवइ निस्चय किहे रहेन। एह बरे उ पचे इस्त्राएल क काम करइ वालन प दास सुआमी तइनात कइ दिहन। उ सुआमी लोगन फिरौन बरे भण्डार सहरन पितोम अउर रामसेस क बनावइ बरे इस्त्राएलियन क मजबूर कइ दिहन।

12मिस्त्र क मनइयन इस्त्राएलियन क कठोर स कठोर काम करइ क मजबूर किहेन। मुला जेतना जिआदा इस्त्राएलियन क काम करइ बरे मजबूर कीन्ह गवा ओनकइ तादद बाढ़त गइ। अउर मिस्त्र क मनइयन इस्त्राएलियन स जिआदा स जिआदा डेराइ लागेन। 13एह बरे मिस्त्र क मनइयन इस्त्राएलियन क अउर भी जिआदा कठोर काम करइ क मजबूर किहेन।

14मिस्त्र क मनइयन इस्त्राएलियन क जिन्नगी दूभर कइ दिहन। उ पचे इस्त्राएलियन क ईंट अउ गारा बनावइ क बहोत करी काम करइ बरे मजबूर किहेन। उ पचे ओनका खेत में बहोत करी काम करवावइ क मजबूर किहेन। उ पचे ओनका गुलाम क नाई दूसर सबहिं कार्य करइ बरे मजबूर किहेन।

## यहोवा क पाछे चलइवाली दाइयन

15हुवाँ सिप्रा अउ पूआ नाउँ क दुइ हिब्रू दाइयन रहिन। मिस्त्र क राजा इ दाइयन स बतियान। 16राजा कहेस, “जब तू

हिब्रू मेहररूअन क लरिका पइदा करइ में मदद करा। जदि लरिकी पइदा होइ तउ ओका तू जिअइ दिहा। मुला अगर लरिका पइदा होइ तउ तू पचे ओका मारि डया।”

17मुला दाइयन परमेस्सर स डेरात रहिन। एह बरे उ पचे मिस्त्र के राजा क आदेस क पालन न किहेन। उ पचे सारे लरिका क जीवित रहइ दिहिन।

18मिस्त्र क राजा दाइयन क बोलाएस अउ कहेस, “तू पचे अइसा काहे किहा? तू पचे बेटहनन क काहे जिअइ दिहा?”

19दाइयन फिरौन स कहेन, “हिब्रू\* मेहररूअन मिस्त्री मेहररूअन स जिआदा ताकतवर बाटिन। हमरे पहुँचइ स मदद बरे उ पचे पहिलेन बेटहनन क जन्मत हीं।” 20-21परमेस्सर उ दाइयन प कृपालु रहा। काहेकि उ पचे परमेस्सर स डेरात रहिन। एह बरे परमेस्सर ओनका नीक रहा अउ ओनका आपन परिवार चलावइ दिहेस। अउर हिब्रू लोग जिआदा लरिका पइदा करत रहेन। अउ उ पचे जिआदा ताकतवर होइ गएन।

22एह बरे फिरौन आपन सबहिं लोगन क हुकूम दिहेस, “जब कबहुँ लरिका पइदा होइ तब तू सबइ जरूर ओका नील नदी में नाइ द्या मुला सबहिं लरिकियन क जिअइ द्या।”

## बचवा मूसा

2 लेवी क परिवार क एक मनई हुवाँ रहा। उ लेवी क परिवार क एक तु अउरत स आपन बियाह किहेस। 2उ मेहरारू गोड़े स भारी भइ अउ उ एक बेटवा क जन्म दिहेस। महतारी निहारेस कि बेटवा बहोत सुन्नर बा अउर उ ओका तीन महीना ताई छुपाएस। 3मुला तीन महीना क पाछे महतारी डेराइ गइ कि बचवा हेरि लीन्ह जाई तब उ मारि डवा जाई, काहेकि उ बेटवा अहइ। एह बरे उ एक तु डलिया बनाएस अउ ओह प तारकोल लेपि दिहेस जेसे उ तैर पावइ। उ बचवा क डलिया में धइ दिहस। तब उ नदी क बीच लंबी घासे में धइ दिहस। 4बचवा क बहिन हुवाँ रूकी रही अउ ओकर रखवारी करत रही। उ देखइ चाहत रही कि बचवा क संग का घटी।

5उहइ समइया फिरौन क बिटिया नदी में नहावन बरे गइ। उ ऊँच की घासे में एक तु डलिया लखेस। ओकर नउकरन नदी क किनारे टहरत रहेन। तउ उ मेहरारू नउकरन में स एक क ओकर टोकरी लावइ बरे हुकुम दिहेस। 6राजा क बिटिया डलिया क खोलेस अउ बेटवा क लखेस। बचवा

हिब्रू या “इस्त्राएलियन” इ नाउँ क आरथ अहइ, “एबर चला बंस” या “फगत नदी क पच्छिम क मनई।”

रोवत रहा अउ ओका ओह प दया आइ गइ। उ कहेस, “इ हिब्रू बचवन में एक अहइ।”

7बचवा क बहिन लुकी छिपी रही। तब उ ठाड़ भइ अउ फिरौन क बिटिया स बोली, “का आप चाहत बाटिन कि मई बचवा क देख-रेख करइ बरे एक ठू हिब्रू दाइयन क हेरि लिआवउँ?”

8फिरौन क बिटिया कहेस, “हाँ, जरूर।”

तउ बिटिया गइ अउ बचवा क महतारी क हेरिके लइ आइ।

9फिरौन क बिटिया कहेस, “इ बचवा क लइ जा अउ मोरे खातिर एका पाला। इ बचवा क आपन दूध पिआवा। मई तोहका पगार देब।”

तब उ मेहरारू आपन बचवा क लइ लिहस अउ ओका पालेस पोसेस। 10जब बचवा बाढ़ गवा तउ कछू टेम पाछे अउरत राजा क बचवा दइ दिहस। राजा क बिटिया उ बचवा क आपन पूत क रूप में स्वीकार किहेस। उ ओकर नाउँ मूसा धरेस काहेकि उ ओका पानी स उबारेस।

### मूसा आपन मनइयन क मदद करत ह

11मूसा बाढ़ि गवा अउ जवान होइ गवा। उ परखेस कि उ ओकर आपन लोग अहइ हिब्रू मनई ओनका जियादा कठोर काम करइ बरे मजबूर करत हीं। एक दिना मूसा लखेस कि एक मिस्त्री हिब्रू मनई क पीटत रहा। 12मूसा चारिहु कइँती निहारेस अउ देखेस कि कउनो नाहीं ताड़त बा। तबहिँ मूसा मिस्त्री मनई क मारि डाएस अउ ओहका रेत में दाब दिहेस।

13पाछे क दिन में मूसा दुइ हिब्रू मनइयन क लइत भिड़त लखेस। मूसा निहारेस कि एक मनई क गलती रही। मूसा उ मनई स कहेस, “तू आपन पड़ोसी क काहे मारत बाट्या?”

14उ मनई जवाब दिहेस, “का कउनो मनई तोहका हमार हाकिम अउ निआवधीस, नियुक्त किहेस ह? नाहीं! मोका बतावा कि का तू मोका भी उहइ तरह मारि डउब्या जउने तरह तू बीता भवा काल्ह मिस्त्री क मारि डया। तब मूसा डेरइ गवा।”

मूसा मन में बिचारेस, “अब हरेक मनई जानत ह कि मई का किहेउँ ह।”

15फिरौन सुनेस कि मूसा का किहेस, तउ उ मूसा क मारि डावइ क पक्का बिचार बनाएस। मुला मूसा फिरौन क कुचाल स भाग गवा। फिन मूसा मिदियन देस में चला गवा।

### मूसा मिदियन देस में

मूसा मिदियन देस में कुआँ क लगे रूकि गवा। 16हुवाँ एक ठु याजक मिदियन में रहा जेकरे सात बिटिया रहिन। उ पचे आपन बाप क भेड़िन बरे कुआँ स पानी निकालइ बरे गएन। उ पचे पानी स कठौते क भरइ क कोसिस करत रहिन। 17मुला कछू गइरियन उ बिटियन क भगाइ दिहन अउ पानी नाहीं भरइ दिहन। तब मूसा बिटियन क मदद किहेस अउ ओनके जनावर क पानी दिहस।

18तब उ पचे आपन बाप रूएल क लगे गइन। ओनकइ

बाप ओनसे पूछेस, “आज तू पचे काहे हाली घरे आइ गइउ?”

19बिटियन जवाब दिहेन, “हाँ, पिता जी। गइरिया लोग हमका खदेरइ क कोसिस किहेन, मुला एक मिस्त्री मनई हमार मदद करेस। उ हमका बरे इनारा स पानी निकारेस अउ हमरे जनावर क पानी दिहेस।”

20एँह बरे रूएल आपन बिटियन स कहेस, “इ मनई कहाँ बाटइ? तू पचे ओका काहे छँड़ि दिहा? ओका हिआँ बोलावा इ तरह हम पचन क संग खाइ सकत ह।”

21मूसा उ मनई क संग टिक जाइ स खुस भवा। याजक रूएल आपन बिटिया सिप्पोरा क मूसा क बसही क तरह दिहेस। 22सिप्पोरा एक बेटवा क जन्मेस। मूसा आपन बेटवा क नाउँ गोसोम राखेस। मूसा आपन बेटवा क इ नाउँ इ कहत भए दिहस: “मई एक अजनबी देस में अजनबी होई गवा।”

### यहोवा इस्त्राएल क मदद बरे मन में ठनेस

23बहोत समइ बीते प मिस्त्र क राजा मरि गवा। काहेकि इस्त्राएलियन क कठिन काम करइ बरे मजबूर कीन्ह जात रहेन। एँह बरे उ पचे मदद बरे परमेस्सर क गोहराएन अउर यहोवा ओनका पराथना सुनि लिहेस। 24यहोवा ओनकइ पराथना सुनेस अउ उ करार क याद किहेस जउन उ इब्राहीम, इसहाक अउ याकूब क संग किहेस। 25यहोवा इस्त्राएलियन क कस्ट निहारेस अउ उ सोचेस कि उ ओनकइ मदद तुरंतहि करी।

### जरत भइ झाड़ी

3 मूसा क ससुर क नाउँ यित्रो रहा। यित्रो मिदियन क याजक रहा। मूसा यित्रो क भेड़ क देख-रेख करत रहा। मूसा एक दिना भेड़न क रेगिस्तान क पच्छिम कइँती लइ गवा। मूसा यहोवा क पहाड़ प जउन होरेब अर्थात् सीनै पहाड़ कहलावत ह प गवा। 2यहोवा क सरगदूत मूसा क समन्वा बरत भइ झाड़ी में उ पहाड़ प परगट भवा। उ इ तरह भवा। मूसा झाड़ी क बे भसम भवा बरत देखेस। 3एँह बरे मूसा झाड़ी क निचके इ चमत्कार क देखइ बरे गवा कि झाड़ी बे भसम भए कइसे लगातार बरति अहइ।

4यहोवा लखेस कि मूसा झाड़ी क लखइ आवत बा। एँह बरे परमेस्सर झाड़ी स मूसा क पुकारेस अउ कहेस, “मूसा, मूसा।”

अउ मूसा कहेस, “मई हिआँ हउँ!”

5तब्बइ यहोवा कहेस, “अउर निचके जिन आवा। आपन पनही उतारि द्या। तू पवित्तर भुइयाँ प ठाड़ बाट्या। 6मई तोहरे पुरखन क परमेस्सर हउँ। मई इब्राहीम क परमेस्सर, इसहाक क परमेस्सर अउ याकूब क परमेस्सर हउँ।”

मूसा आपन मुँहना क ढाँकि लिहेस काहेकि उ परमेस्सर क लखइ स डेरत रहा।

7तब यहोवा कहेस, “मई उ सबन दुःखन क लखेउँ ह जउन हमार लोगन मिस्त्र में सहेन ह। मइ ओनकइ चीखब सुनेउँ ह जब मिस्त्र क क्रूर मनइयन ओनका चोट पहुँचाएन ह। मई ओनकइ दुःखन क जानत हउँ।”

8मई अब जाब अउ मिस्त्री मनइयन स आपन लोगन क बचाउब। मई ओनका मिस्त्र स बाहेर निकारब अउ ओनका एक नीक अउ विसाल भुँइया में लइ जाब। उ भुँइया जहाँ दूध अउर सहद क नदी बहत रहत ह।\* हुवाँ कइउ जाति क लोग जइसे कनानी, हित्ती, एमोरी, परिज्जी, हिब्बी, अउ यबूसी रहत ही। 9मई इस्राएल क मनइयन क गोहार सुनेउँ ह। मई मिस्त्री मनइयन क अत्याचार क लखेउ जउन ओन लोगन प किहेन। 10एँह बरे अब मई तोहका फिरौन क लगे पठवत हउँ। जा अउर मोर लोगन, इस्राएलियन क मिस्त्र स बाहर लइ आवा।”

11मुला मूसा परमेस्सर स कहेस, “मई कउनो बड़का मनई नाहीं। मई कइसे उ मनई होइ सकत हउँ जउन फिरौन क लगे जाउँ अउ इस्राएलियन क मिस्त्र स बाहेर निकारि के लइ चलउँ।”

12परमेस्सर कहेस, “तू कइ सकत ह्या काहेकि मई तोहरे संग हउँ। इ सबूत रही कि मई तोहका पठवत हउँ। जब तू लोगन क मिस्त्र स बाहेर निकारि लइ अउब्या, तब तू इ पहाड़े प हमार आराधना करब्या।”

13तबहिँ मूसा परमेस्सर स कहेस, “किंतु यदि मई इस्राएलियन क नगिचे जात हउँ, अउ कहत हउँ, ‘तोहरे पुरखन क यहोवा मोका तोहरे लगे पठएस ह,’ तब मनई पुछिहीं, ‘ओकर नाउँ का अहइ?’ मई ओनसे का कहब?”

14तब यहोवा मूसा स कहेस, “मई हउँ जउन मई हउँ।\* जबहिँ तू इस्राएलियन क लगे जाब्या, तब ओनका बताइ दिहा, ‘मई हउँ, जउन मोका तोहरे लगे पठएस ह।’

15परमेस्सर मूसा स इ भी कहेस, “इस्राएली मनइयन स जउन तू कहब्या, उ इ अहइ: ‘यहोवा तोहरे पुरखन क परमेस्सर, इब्राहीम, इसहाक अउर याकूब क परमेस्सर अहइ। होइ सकत ह इहइ नाम में अगवा पीढ़ी दर पीढ़ी मोका जनिहीं।’ लोगन क बतावा, ‘यहोवा मोका तोहरे लगे पठएस ह।’”

16यहोवा इ भी कहेस, ‘जा अउ इस्राएल क बुजर्गन क बटोरा अउ ओनसे कहा, ‘यहोवा, तोहरे पुरखन क परमेस्सर मोरे समन्वा परगट भवा रहा। इब्राहीम, इसहाक अउ याकूब क परमेस्सर मोसे बात किहेस। उ कहेस, “मई तोहरे बारे में अउ ओन सब क बाबत मैं जउन तू पचन क संग मिस्त्र में भवा अहइ खियाल रखे अहइ। 17मई मने मैं ठान लिहे हउँ कि मिस्त्र में जउन दुःख अउ मुसीबत सहत बाट्या ओहसे मई तोहका बाहेर निकारि लेबइ। मई तू पचन क उ देसे मैं लइ जाब जउन ढेर लोगन जइसे कनानी, हित्ती, एमोरी, परिज्जी, हिब्बी, अउ यबूसी क बाटइ। मई तू पचन क एक नीक देसे मैं लइ जाब जहाँ दूध अउर सहद क नदी बहत अहइ।’

18बुजर्गन तोहार बातन्क मनिहीं। अउर तब तू अउर बुजर्गन मिस्त्र क राजा क लगे जाब्या। तू पचे ओसे कहब्या, ‘यहोवा हिब्रू मनइयन क परमेस्सर हम पचन्क लगे आपन अउ उ पचे हम पचन्स तीन दिन ताई रैगिस्तान में जात्रा

जहाँ दूध अउर सहद क नदी बहत रहत ह इ का अरथ इ भुँइया अच्छी चिजियन स भरा पड़ा अहइ।

मई हउँ जउन मई हउँ हिब्रू सब्द याहवे या “परमेस्सर”।

करइ क कहने ह। हुवाँ हम पचे आपन परमेस्सर, यहोवा क बलि चढ़ाउब।’

19“मुला मई जानत हउँ कि मिस्त्र क राजा तू पचन्क जाइ नाहीं देई। सिरिफ एक ठु बड़वार सकती ही तू पचन्क जाइ देइ बरे मजबूर करी। 20एँह बरे मई आपन बड़की सकती क प्रयोग मिस्त्र क खिलाफ करबइ। मई मिस्त्र क आपन चमत्कार स तबाह कइ देब। जबहिँ मई अइसा करिहउँ तउ उ तू पचन्क जाइ देइ। 21अउर मई मिस्त्री मनइयन क इस्राएलियन बरे कृपालु बनवाउब। तब उ पचे इस्राएलियन क जब उ सबइ मिस्त्र छोड़िहीं तब ओन लोगन क बहोत सारा उपहार देइहीं

22“हर एक हिब्रू अउरत आपन मिस्त्री पड़ोसिन स अउर मिस्त्री अउरत स आपन घरे में रहइ बरे अनुरोध किहेस अउर उ पचे ओका उपहार देइहीं। तोहार लोग उपहार में चाँदी, सोना अउ सुन्नर ओढ़ना पइहीं। जबहिँ तू पचे मिस्त्र क छोड़ि देब्या, तू पचे उ उपहार क आपन गदेलन क पहिरउब्या। इ तरह तू पचे मिस्त्री मनइयन क धन लइ अउब्या।”

### मूसा बरे प्रमाण

4 तब मूसा क जवाब दिहेस, “मुला इस्राएलियन मोहे पइ बिस्सास न करिहीं। उ पचे कइहीं, ‘यहोवा तोह पइ परगट नाहीं भवा।’”

2मुला यहोवा मूसा स कहेस, “तू आपन हथवा मैं का धइके रखे बाट्या?”

मूसा जवाब दिहेस, “इ मोर टहरइ क लाठी अहइ।”

अयहोवा कहेस, “आपन टहरइवाली लाठी जमीन प फेंकि द्या।”

तउ मूसा आपन टहरइ क लाठी क जमीन प फेंक दिहेस। अउ लाठी साँप बन गवा। मूसा डेरान अउ एँसे परान। 4मुला यहोवा मूसा स कहेस, “अगवा बढ़ा अउ पूँछ धइके साँप क पकड़ि ल्या।”

एँह बरे मूसा अगवा कइँती बढ़ा अउ साँप क पूँछ धइ लिहस। जइसेन मूसा अइसा किहेस, साँप फुनि लाठी होइ गवा। 5तब यहोवा कहेस “आपन छड़ी क इ तरह बइपरा अउ मनई बिस्सास करइँ, कि यहोवा ओकर पुरखन क परमेस्सर, इब्राहीम क परमेस्सर, इसहाक क परमेस्सर अउ याकूब क परमेस्सर तोहार समन्वा परगट भवा रहा।”

6तब यहोवा मूसा स कहेस, “मई तोहका दूसर परमान देब। आपन हाथ क लबादा क नीचे धरा।”

तउ मूसा आपन हाथ क आपन लबादा क भीतर किहेस। तब मूसा आपन हाथ क लबादा स बाहेर निकारेस अउ उ बदरि गवा। ओकर हाथ बर्फ क नाई उज्जर दागे स भरि गवा रहा।

7तब यहोवा कहेस, “अब तू आपन हाथ लबादा क भीतर धरा।” एँह बरे आपन हाथ फुन आपन लबादा क भितरे धइ द्या। तब मूसा आपन हाथ बाहेर निकारेस अउ टैम भी ओकर हाथ बदरि गएन। अब ओकर हाथ पहिले क नाई होइ गवा रहा।

8तब यहोवा कहेस, “जदि मनई तोहार बिस्सास छड़ी बड़परे प न करई तउ उ पचे तोह प बिस्सास तबहिं करिहिं जबहिं तू इ दूसर चीन्हा क देखउब्ब्या। 9जदि तोहरे दुइनउँ चीन्हा देखाएँ क पाछे तोहार बिस्सास न करिहिं तउ तू नील नदी स कछू पानी लइ लिहा। पानी क जमीन प गिराउब सुरू कइ दिहा अउ जइसे ही इ जमीन क छुई, रक्त बनि जाई।”

10मुला मूसा यहोवा स कहेस, “हे यहोवा, मई फुरे कहत हउँ, मई कुसल बोलवइया नाहीं हउँ। मई कबहूँ मनइयन स नीक तौर स बतियाइ काबिल नाहीं भएउँ। अउ आपसे बतियाए क पाछे भी नीक बोलवइया नाहीं हउँ। आप जानत हीं कि मई धीमे धीमे बोलत हउँ अउ उत्तिम सब्दन क बड़परत नाहीं हउँ।”

11तब यहोवा ओसे कहेस, “कउन मनई क मुँहना क बनाएस? अउर कउन मनई क गूँगा या न बोलइ क लाइक बनइ सकत ह? कउन मनई क आँधर बनइ सकत ह? कउन मनई क लखइ क लाइक बनइ सकत ह? मई ही हउँ जउन इ सब कइ सकत हउँ, मई अहउँ यहोवा। 12एँह बरे अब जा। जबहिं तू बोलवइया, मई तोहरे साथे रहब। मई बोलइ बरे तोहका सब्दन देब।”

13मुला मूसा कहेस, “मोर यहोवा। मई तोहसे बिनती करत हउँ कि दुसरे मनई क पठवा, मोका नाहीं।”

14तबबइ यहोवा मूसा प कोहान। यहोवा कहेस, “नीक अहइ। मई तोहका अउर कउनो क मदद बरे देब। मई तोहरे भइया हारून जउन लेवी परिवार स अहइ, क बड़परब। उ एक कुसल बोलवइया अहइ। हारून तोह स मिलइ बरे तोहरे लगे आवत आहइ। उ तोहका निहारिके खुस होइ। 15उ तोहरे संग फिरौन क लगे जाइ। तोहका का कहइ का बा, मई बताउब। तब तू हारून क बतउब्ब्या। जउन हारून फिरौन स बात करइ बरे नीक सब्दन बड़परी। 16हारून तोहरे बरे मनइयन स बात करी। तू ओकरे बरे एक बड़का राजा क रूप में रहव्या अउर उ तोहरे कइँती स बोलवइया होइ। 17अब जा। आपन छड़ी साथे लइ जा। आपन छड़ी क चमत्कार अउ दूसर चमत्कार मनइयन क समन्वा प्रदर्सित कर्या।”

### मूसा मिस्त्र लउटत ह

18तब मूसा आपन ससुर यित्रो क लगे लौटि आवा। मूसा यित्रो स कहेस, “मेहरबानी कइ क मोका मिस्त्र जाइ द्या। मई मिस्त्र में आपन लोगन क लखइ चाहत हउँ कि मोर लोगन अबहूँ जिअत अहइ।”

यित्रो मूसा स कहेस, “तू सान्ति स जा। इ ठीक अहइ।”

19उ समइया जब मूसा मिदियन में ही रहा, यहोवा ओसे कहेस, “अब मिस्त्र वापिस जाइ क तोहारे बरे सुरच्छित टेम अहइ। जउन मनइयन तोहका मारइ चाहत रहेन, उ पचे मरि गएन।”

20एँह बरे मूसा आपन मेहरारू अउ आपन बेटवन क लइके गदहा प बड़ठाएस। अउ मिस्त्र क वापसी प लौटि गवा। मूसा उ टहरइवाली छड़ी क संग लिहेस जेहमाँ यहोवा क सक्ती रही।

21जउन टेमें मूसा मिस्त्र क लउटत रहा, परमेस्सर ओसे कहेस। “जबहिं तू फिरौन स बतियाबा तउ उ सबहिं चमत्कारे क देखावा जेका देखावइ क सक्ती मई तोहका दिहेउँ ह। मुला मई फिरौन क बहोत जिद्दी बनाउब। उ लोगन क जाइ न देइ। 22तब तू फिरौन स कह्या: 23यहोवा कहत ह, ‘इस्त्राएल मोर पहिलौटी क बेटवा अहइ। मोरे बेटवा क जाइ द्या अउर मोर आराधना करइ द्या। जदि तू इस्त्राएल क जाइ स मना करत बाट्या तउ मई तोहार पहिलौटी क पूत मारि डाउब।”

### मूसा क पूत क खतना

24जउन टेम मूसा मिस्त्र क जात्रा प जात भवा रहा रात काटइ बरे सराय में रूका। यहोवा इ जगह प मूसा स भेटा अउ ओका मारि डावइ क जतन किहेस। 25मुला जिप्पोरा चकमक पाथर क तेज छूरी लिहेस अउ आपन बेटवा क खतना किहेस। उ आपन बेटवा क बाहरी चाम लिहेस अउ ओकर गोड़वा छुएस। तब उ मूसा स कहेस, “तू मोरे लहू क भतार अहा। 26जिप्पोरा इ किहेस काहेकि ओका आपन बेटवा क खतना करइ पड़ा रहा। एँह बरे यहोवा मूसा क माफ़ कइ दिहेस अउ ओका नाहीं मारेस।\* ”

### यहोवा क समन्वा मूसा अउ हारून

27यहोवा हारून स कहेस। यहोवा ओनका बताएस, “रेगिस्तान में जा अउ मूसा स मिला।” तउ हारून गवा अउ यहोवा क पहाड़े प मूसा स मिला। जब हारून मूसा क लखेस, उ ओका चूमेस। 28मूसा हारून क सब कछू बताएस जउन यहोवा कहे रहा। मूसा हारून क यहोवा क जरिए पठवइ क कारण बताएस। मूसा हारून क उ चमत्कारन अउ उ चीन्हा क समझाएस बुझाएस जेका परमान क वास्ते देखवइ क रहा।

29इ तरह मूसा अउ हारून गएन अउ उ पचे इस्त्राएल क मनइयन में स सबहिं बुजुर्गन क बटोरेन। 30तबहिं हारून मनइयन स कहेस। उ मनइयन क सारी बातन क बताएस जउन यहोवा मूसा स कहेस। तबहिं मूसा सब मनइयन क देखइ बरे सब परमानन क सामने कइके देखौएस। 31एँह बरे लोग मूसा पइ बिस्सासेन कि परमेस्सर ओका पठएस ह। इस्त्राएलियन समझेन कि यहोवा लोगन का मुसिबतन क लखइ क पाछे ओनके मदद बरे आवा रहेन अहइ। तउ उ पचे निहुरि गएन अउ आराधना किहेस।

### मूसा अउ हारून अहइँ फिरौन क समन्वा

5 लोगन स बात किहे क पाछे मूसा अउ हारून फिरौन क लगे गएन। उ पचे कहेन, “यहोवा इस्त्राएल क परमेस्सर कहत हीं, “मोरे लोगन क रेगिस्तान में जाइ द्या, जेसे उ पचे मोरे सम्मान बरे जलसा करई।”

2मुला फिरौन कहेस, “यहोवा कउन अहइ? मई ओकर हुकुम काहे मानी? मई यहोवा क नाहीं जानित। एँह बरे मई इस्त्राएल क लोगन क जाइ देइ स मना करत हउँ।”

पद 26 या “उ चिकित्सा किहेस। उ कहेस, ‘इ खतना क वजह से तू पचे रक्त क भतार अहा।”

3तब हारून अउ मूसा कहेन, “हिब्रू मनइयन क परमेस्सर हम पचन क दरसन दिहेस ह। एँह बरे हम आपसे पराथना करत अही कि आप हम पचन्क रेगिस्तान में तीन दिना तलक जात्रा करइ देईं। हुवाँ हम पचे आपन परमेस्सर यहोवा क बलि चढ़ाउब। जदि हम अइसा नहीं करित, उ हमसे कोहाइ जाइ अउ हमका बरबाद कइ देइ। उ हम पचन्क बेमारी स या तरवारि स मारि डाइ।”

4मुला मिस्त्र क राजा ओनसे कहेस, “मूसा अउ हारून, तू पचे लोगन क काम करइ स बगदावद अहा। ओन मजदूरन क आपन काम करइ द्या। जहाँ तलक तू दुइनउँ क बात ब जा अउर आपन काम करा। 5हिआँ बहोत स मजदूर अहई, तू पचे ओनका काम स रोकत बाट्या।”

### फिरौन मनइयन क सजा दिहेस

6ठीक उहइ दिना फिरौन इस्राएलियन क काम करइ क अउर जिआदा करी हुकुम पालन करइ बरे कहेस। फिरौन गुलामन क मालिक अउ हिब्रू सरदारन स कहेस, 7“तू मनइयन क हमेसा पुआल दिहा ह जेका उ ईटा बनवइ में बइपरत हीं। मुला अब ओनसे कहा कि उ पचे ईटा बनवइ खातिर पुआल खुद बटोरईं। 8मुला अब उ पचे ओतनी तदाद में ओतनी ईट बनइहीं जेतना उ पचे पहिले बनवत रहेन। उ पचे अहदी होइ ग अहई। इहइ कारण अहइ कि उ पचे मोसे बाहेर जाइ बरे कहत बाटेन। ओनके लगे करइ खातिर काम नहीं बा। एँह बरे उ पचे मोसे माँगत बाटेन ताकि उ पचे आपन परमेस्सर क बलि अउ चढ़ावा देइ। 9एँह बरे इ दास स जिआदा करी काम करावा। एँनका कामे में लगाइ राखा। तबहिँ ओनके लगे एँतना टेम नहीं रही कि उ पचे मूसा क झूठी बातन क सुनईं।”

10एँह बरे मिस्त्री गुलामन क मालिक अउ हिब्रू काम क इस्राएलियन क लगे गएन अउ उ पचे कहेन, “फिरौन फइसला किहे अहइ कि उ तू पचन्क तोहरे ईटा बरे तोहका पुआल न देइ। 11तू पचन्क खुद जाइ क होइ अउ आपन बरे पुआल खुद बटोरइ क होइ। एँह बरे जा अउ पुआल बटोरा। मुला तू ओतना ईटा बनवा जेतना तू पचे पहिले बनवत रह्या।”

12तउ इ तरह हर मनई मिस्त्र में पुआल हेरइ बरे चारिहुं कईती गवा। 13गुलामन क मालिक जिआदा करी काम करइ बरे मजबूर करत रहेन। उ पचे मनइयन क ओतना ही ईटा गढ़इ बरे मजबूर करत रहेन जेतना उ पचे पहिले बनावत रहेन। 14मिस्त्र क गुलामन क मालिक हिब्रू काम क मेठ चुनि लिहे रहेन। उ पचे लोगन क कामे क जिम्मेदार रहेन। मिस्त्री गुलाम क मालिक उन हिब्रू काम क मेठन क पीटत रहेन अउ ओनसे कहत रहेन, “तू पचे ओतनी ईटन क काहे नहीं बनउत्या जउन पहिले बनावत रह्या।”

15तब हिब्रू काम क मेठ फिरौन क लगे गवा। उ पचे सिकाइत किहेन अउ कहेन, “हम पचे आप क सेवक अही आप हम पचन्क संग अइसा बर्ताव काहे करत अहई? 16आप हम पचन्क पुआल नहीं दिहेन। मुला हम पचन्क हुकुम दिहेन कि ओतना ही ईटा बनावई जेतना पहिले बनत

रहिन। अउर अब हम पचन्क मालिक हमका पीटत हीं। अइसा करइ स आप लोगन क गलती अहइ।”

17फिरौन उत्तर दिहेस, “तू पचे अहदी अहा। तू पचे काम नहीं करइ चहत्या। इहइ कारण अहइ कि तू पचे माँगत बाट्या कि मई तू सबन क निकरइ देउँ। अउर इहइ कारण अहइ कि तू पचे इ ठउर क तजि देइ चाहत बाट्या अउर यहोवा क बलि चढ़ावा चाहत अहा। 18अब कामे प लउट जा, हम तू पचन क कछू पुआल न देब। मुला तू पचे ओतना ही ईटा बनवा जेतना पहिले बनवत रह्या ह।

19हिब्रू काम क मेठ बूझ गएन कि उ पचे मुस्किल में पड़ि गएन। तब उ पचे कहेन, “तू पचन्क हर दिना क तय किया भवा ईट स कम ईट नहीं बनाइ चाही।”

20जब उ पचे फिरौन क संग बइठे क पाछे जात रहेन, उ पचे मूसा अउ हारून क लगे स निकरेन। मूसा अउ हारून ओनकइ इंतजार करत रहेन। 21एँह बरे उ सबइ मूसा अउ हारून स कहेन, “तू पचे सचमुच फिरौन स इ आग्रह करइ क कि हम पचन्क जाइ देइ क गलती किहा। यहोवा तोहका सजा देइ काहेकि तू पचे फिरौन अउ ओकरे अफसरन में हमरे बरे घिन पइदा कर्या ह। तू पचे ओनका एक बहाना हमका मारि डवइ क-दिहा ह।”

### मूसा क परमेस्सर स सिकाइत

22तबहिँ मूसा यहोवा स पराथना किहेस अउ कहेस, “हे यहोवा! आप आपन लोगन बरे इ भयानक काम काहे किहा ह? आप हमका हिआँ काहे पठया ह? 23मई फिरौन क लगे गएँ अउ जउन आप कहइ क बोल्या ह ओका मई ओसे कहेउँ ह। मुला उ समइया स उ मनइयन बरे जिआदा अत्याचार होइ गवा अहइ। मुला आप ओनके बचावइ बरे काहे कछू नहीं किहा ह।”

6 तबहिँ यहोवा मूसा स कहेस, “अब तू लखब्या कि मई फिरौन बरे का करत हउँ। उ ओनका छोड़इ बरे एँतना हलबुली करी कि उ खुद ओनका जाइ बरे मजबूर करी।”

2तब परमेस्सर मूसा स कहेस, 3“मई यहोवा हउँ। मई इब्राहीम, इसहाक अउ याकूब क समन्वा परगट भएँ ह। उ पचे मोका “एल सददइ”(सर्व-सक्तीमान परमेस्सर) कहेन। मई ओनका इ नहीं जाहिर करिउँ कि मोर नाउँ यहोवा अहइ। 4मई ओनके संग एक करार बनयो हउँ। मई उ पचन्क कनान क भुईया देइ क बचन दिहउँ ह। उ सबइ उ देस में रहत रहेन, मुला उ सबइ हुवाँ अजनबी क जैसे रहत रहेन। 5अब मई इस्राएलियन क चीख-पुकार जउन मिस्त्री लोगन क अत्याचार अउर कठिन काम करइ बरे मजबूर कीन्ह जाइ क कारण रहेन क सुना। अउर मई आपन करार क याद किया। 6एँह बरे इस्राएलियन स कहा कि मई ओन लोगन स कहत हउँ, “मई यहोवा हउँ। मई तू पचन्क मिस्त्र क बधवा मजदूरी स दूर लइ जाउब अउर मई तू पचन्क का ओन लोगन क गुलामी से बचाउब। अउर मई आपन महान सक्ती क प्रयोग कइ क अउर निअउ क महान काम अंजाम दइ क तू पचन्क अजाद करब। 7तू पचे हमार मनई होब्या अउ मई तू पचन्क परमेस्सर। तू पचे जान जइब्या कि मई परमेस्सर, यहोवा हउँ अउर कि मई तू सबन्क मिस्त्र क

गुलामी स अजाद किहउँ ह। 8मई इब्राहीम, इसहाक अउ याकूब स बड़ा वाचा किहेउँ रहा। मई ओनका एक खास पहँटा देइ क वाचा किहेउँ रहा। एँह बरे मई तू सबन क उ पहँटा ताई लइ जाब। मई उ पहँटा तू पचन्क देब। इ तू पचन्क होइ। मई यहोवा हउँ।”

9एँह बरे मूसा इ बात इस्राएलियन क बताएस। मुला मनइयन आपन करी मेहनत अउर निरासा क कारण मूसा क बात नाहीं सुनेन।

10तब यहोवा मूसा स कहेस, 11“जा अउ मिस्र क राजा फिरौन स कहा कि उ इस्राएल क लोगन क इ देसे स जाइ देइ।” 12मुला मूसा जवाब दिहेस, “इस्राएल क मनइयन मोर बात सुनइ नाहीं चाहतेन। एँह बरे सचमुच फिरौन भी सुनइ न चाही। अउर मई माहिर बोलवइया नहीं हउँ।”\*

13मुला यहोवा मूसा अउ हारून स बतियान। यहोवा ओनका जाइ अउ इस्राएलियन स बतियाइके हुकुम दिहेस अउ इ भी हुकुम दिहेस कि उ पचे जाई अउर फिरौन स बतियाई। यहोवा हुकुम दिहेस कि उ पचे इस्राएलियन क मिस्र क बाहेर लइ जाई।

### इस्राएल क कछू परिवार

14इस्राएल क घराने क नेता क नाउँ अहई: इस्राएल क पहिलौटी क बेटवा रूबेन क चार बेटवन रहेन। उ पचे रहेन: हनोक, पल्लू हेस्रोन अउ कम्मर्नी। 15सिमोन क बेटहनन रहेन: यमूएल, यामीन, ओहद, याकीन, सोहर, अउर साउल। (साउल एक कनानी अउरत क पूत रहा।) 16लेवी एक सौ सैतीस बरिस जिन्दा रहा। लेवी क बेटहनन रहेन: गोर्सीन, कहात अउ मरारी। 17गोर्सीन क दुइ पूत रहेन-लिबनी अउ सिमी। 18कहात एक सौ तैतीस बरिस जिआ। कहात क बेटहनन रहेन: अग्राम, यिसहार, हेब्रोन अउ उज्जीएल। 19मरारी क पूत रहेन: महली अउ मूसी। इ सबहिँ परिवार इस्राएल क पूत लेवी क रहेन।

20अग्राम एक सौ सैतीस बरिस जिआ। अग्राम आपन बाप क बहिन योकेबेद स बियाह करेस। अग्राम अउ योकेबेद स हारून अउर मूसा पइदा भएन। 21यिसहार क बेटवन रहेन: कोरह, नेपग, अउ जिक्की। 22उज्जीएल क बेटहनन रहेन: मीसाएल एलसापान, अउ सित्री।

23हारून ऐलीसेबा स बियाह किहेस। (ऐलीसेबा बिटिया रही अम्मीनादाब क, अउ नहसोन क बहिन रही।) हारून अउ ऐलीसेबा स नादाब, अबीहू, ऐलाजार अउ ईतामार क जन्मेन। 24कोरह क पूत, अर्थात कोरही रहेन: अस्सीर, एलकाना अउ अबीआसाप रहेन। 25हारून क बेटवा ऐलाजार पूतीएल क बिटिया स बियाह किहेस। अउ उ पचे पीनहास क जन्मेन। इ सबहिँ इस्राएल क बेटवा लेवी स रहेन।

26इ तरह हारून अउ मूसा उहइ परिवार समूह स रहेन। अउर उ पचे उहई मनइयन रहेन जउन स यहोवा बतियान अउ कहेस, “मोर लोग इस्राएलिन क दल\* में मिस्र स निकारा। 27हारून अउ मूसा-मनई अहई जउन मिस्र क राजा

फिरौन स बतियानेन। उ पचे फिरौन स कहेन कि उ इस्राएल क मनइयन क मिस्र स निकरइ देइ।

### यहोवा मूसा क फुन बोलावत ह

28यहोवा मिस्र देस में मूसा स कहेस। 29उ कहेस, “मई यहोवा हउँ। मिस्र क राजा स उ सारी बातन्क कहि द्या जउन मई तोहसे कहत अही।”

30मुला मूसा जवाब दिहेस, “मई नीक बोलवइया नाहीं अहउँ। राजा मोर बतिया सुनी नाहीं।”

7 यहोवा मूसा स कहेस, “मई तोहरे संग रहब। फिरौन बरे तू एक बड़वार राजा\* क तरह रहब्या। अउर हारून तोहार हकदार बोलवइया\* होइ। 2जउन हुकुम मई देत हउँ उ सब हारून स कहा। तबहिँ उ उ बतियन क जउन मई कहत हउँ, फिरौन स कही। अउर फिरौन इस्राएल क मनइयन इ देसे स जाइ देइ। 3मुला मई फिरौन क जिद्दी बनउब। उ तोहार मांग क न मानी। तबहिँ मई मिस्र में बहोत स चमत्कारन, चिन्ह अउर आश्चर्य जनक काम करिबेउँ। 4मुला उ तउ भी तोहार नाहीं सुनी। एँह बरे मई मिस्र क बुरी तरह स सजा देब। अउ मई आपन लोगन, इस्राएलियन क मिस्र देस स बाहेर लइ जाब। 5तब मिस्र क मनइयन जनिहीं कि मई यहोवा अहउँ। जब मई ओन पचन्क खिलाफ होब अउर आपन लोग इस्राएलियन क ओनके देस स बाहेर लइ जाब।”

6मूसा अउ हारून उन बातन क मान लिहेन जेका यहोवा कहे रहा। 7तउ मूसा अस्सी बरिस क रहा अउ हारून तिरासी बरिस क।

### मूसा क टहरइ क छड़ी साँप होइ जात ह

8यहोवा मूसा अउ हारून स कहेस, 9“फिरौन तोहसे तोहार सक्ती क सिद्ध करइ बरे कही। उ तोहसे चमत्कार करइ बरे कही। उ समइया तू हारून स कह्या कि भुईया प टहरइ क छड़ी बहाइ द्या। जउन समइया फिरौन देखत रहत होइ, छड़ी साँप बन जाई।”

10तउ मूसा अउ हारून फिरौन क लगे गएन अउ यहोवा क हुकुम क मानेन। हारून आपन छड़ी खाले बहाइ दिहस। फिरौन अउ ओनके अफसरन क लखत लखत तबहीं छड़ी साँप बनि गइ।

11एँह बरे फिरौन आपन बुद्धिमान अउ जादूगरन क बोलाएस। इ पचे जन्तर मन्तर किहेन अउ हारून की नाई चमत्कार किहेन। 12उ पचे आपन टहरइवाली छड़ी क भुईया प बहाएन अउ उ सबन साँप बनि गइन। मुला तबहिँ हारून क छड़ी उ छड़िन क खाइ लिहस। 13फिरौन तउ भी इस्राएली दास क जाइ स मना किहस। इ वइसा ही भवा जइसा यहोवा कहेस। फिरौन मूसा अउ हारून क बात सुनइ स मना कइ दिहस।

अउर ... हउँ “मोर ओढन क खतना नाहीं भवा ह।”

दल फौज क टुकड़ी इ सबद फौज क अहइ अउ एहसे पता लागत ह कि मनइयन “यहोवा क सेना” की तरह एकउटा रहेन।

बड़वार राजा अरथात “परमेस्सर।”

हकदार बोलवइया अरथात “नबी।”

### पानी क रक्त बन जाब

14तब यहोवा मूसा अउ हारून स कहेस, “फिरौन हठ धरे बा। फिरौन मनइयन क जाइ स मना करत ह। 15भिन्सारे फिरौन नदी क किनारे जाइ। ओकरे संग भेंट करइ बरे नील नदी क किनारे जा। तू अपने साथे उ छड़ी क लइ जाया जउन सॉप होइ ग रही। 16ओका इ कह्या: ‘परमेस्सर, हिब्रू लोगन क यहोवा, मोका तोहरे लगे पठएस ह। यहोवा मोसे इस कहइ क बोलेस ह, “मोरे लोगन क मोर आराधना करइ बरे रेगिस्तान में जाइ द्या। अबहूँ तलक तू यहोवा क कहब नाही मान्या। 17एँह बरे यहोवा कहत ह कि उ तोहका लखावइ बरे कछू करी कि उ यहोवा अहइ। मई आपन हाथे में छड़ी लइके पानी प मारब अउ नील नदी रक्त में बदल जाइ। 18तब नील नदी क मछरियन मरि जइहीं अउ नदी बसाइ लागी। तब मिस्त्री मनइयन नदी क पानी न पी पइहीं।”

19यहोवा मूसा क इ हुकुम दिहेस, “हारून स कहा कि उ नदियन, नहरन, झीलियन अउ उ सबहि ठउसन प जहाँ मिस्त्र क मनइयन पानी भरत हीं-हुवों आपन छड़ी क पसारइ। जबहि उ अइसा करी तउ सारा पानी रक्त में बदलि जाइ। सारा क सारा पानी हिआँ तलक कि काठे अउ पाथर क बासन में धरा पानी रक्त में बदलि जाई।”

20एँह बरे मूसा अउ हारून वइसा किहेन जइसा यहोवा कहेस। हारून छड़ी क उठाएस अउ नील नदी क पनिया प पटकेस। उ इ फिरौन अउ ओकरे अफसरन क समन्वा किहेस। फिन नदी क सारा पानी रक्त में बदलि गवा। 21मछरियन नील नदी में मरि गइन अउ नदी बसाइ लागी। एँह बरे मिस्त्री मनइयन नदी क पानी नाही पिउ सकत रहेन। मिस्त्र में सब कइँती रक्त रहा।

22फिरौन क जादूगारन आपन जन्तर मन्तर देखाएन अउ उ पचे वइसा ही किहेन। एँह बरे फिरौन मूसा अउ हारून क सुनइ स इन्कार कइ दिहेस। इ ठीक वइसे भवा जइसे यहोवा कहे रहा। 23जउन मूसा अउ हारून किहे रहेन ओका फिरौन नाही मानेस। उ घूमा अउ घरे चला गवा।

24मिस्त्री मनइयन नदी स पानी नाही पिउ सकत रहेन। एँह बरे पानी पिअइ बरे नदी क चारिहुँ कइँती कुअँन क खोदेन।

### मेघा

25यहोवा क जरिए नील नदी क पानी क रक्त में बदलइ क पाछे सात दिन बीति गएन।

8 तब यहोवा मूसा स कहेस, “फिरौन क लगे जा अउ ओसे कहा कि यहोवा इ कहत ह, ‘मोरे मनइयन क मोरी आराधना करइ बरे जाइ द्या। 2मुला जदि फिरौन ओनका जाइ स रोकत ह तउ मई, यहोवा सारे मिस्त्र क मेघन स भरि देब। 3नील नदी मेघन स भरि जाइ। उ पचे नदी स निकरिहीं अउ तोहरे घरे में घुसिहीं। उ सबइ तोहरे सोवइ क खोलि में अउ तोहरे बिछउना में होइहीं। मेघन तोहरे अफसरन क घरे में होइहीं अउ तोहरे तन्दूरे में अउ पानी क घइली में होइहीं। 4मेघन पूरि तरह तोहरे ऊपर, तोहरे मनइयन क ऊपर अउ तोहरे अफसरन क ऊपर होइहीं।”

5तबहि यहोवा मूसा स कहेस, “हारून स कहा कि उ आपन छड़ी क नहरन, नदियन अउ झीलियन क ऊपर पसारइ। अउर मेघन बाहेर निकरिके सारे मिस्त्र देस में भरि जइहीं।”

6तब हारून परमेस्सर क हुकम स मिस्त्र देस में जहाँ कहुँ पानी रहा ओकर ऊपर हथवा उठाएस अउ मेघा पानी स बाहेर आउब सुरू कइ दिहन अउ पूरे मिस्त्र प छाइ गएन।

7जादूगर भी वइसा किहेन। उ पचे भी मिस्त्र देस में मेघा लइ आएन।

8फिरौन मूसा अउ हारून क बोलाएस। फिरौन कहेस, “यहोवा स आराधना करइ कि उ हम लोगन क मेघन स आजाद करइ देइ। तबहि मई मनइयन क यहोवा बरे बलि भेंट चढ़ावइ बरे जाइ देइहउँ।”

9मूसा फिरौन स कहेस, “मोका इ बतावा कि आप कब चाहत हीं कि मेघन निकरि जाईं। मई आप बरे, आप क मनइयन बरे अउ आप क अफसर बरे पराथना करिहउँ। तबहि मेघन आप क अउ आप क घरन्क, अउ आप क अफसरन्क अउ आप क मनइयन क तजि देइहीं। मेघन सिरिफ नदिया में रहि जइहीं। तू कब चाहत बाट्या कि मेघन तोहका तजि देई?”

10फिरौन कहेस, “भियान।”

मूसा कहेस, “जइसा आप कहत हीं वइसा ही होइ। इ तरह आप जानि जइहीं कि यहोवा हमार परमेस्सर क नाई अउर कउनो देवता नाही बा। 11मेघन आप क, आप क घरे क, आप क अफसरन्क अउ आप क लोगन क तजि देइहीं। मेघन सिरिफ नदी में रहि जइहीं।”

12मूसा अउ हारून फिरौन स बिदा भएन। मूसा ओन मेघन खातिर यहोवा क पराथना किहेस, जउने मेघन क यहोवा फिरौन क खिलाफ पठए रहा। 13अउ यहोवा उहइ किहेस जउन मूसा कहेस। सब मेघा घरन में, घरन क अंगने में अउ खेतन में मरि गएन। 14मिस्त्री मुरदा मेघन क ढेर में जमा कहेस तउ समूचा देस में भयंकर बदबू होइ लाग। 15जब फिरौन निहारेस कि उ पचे मेघन स बरी होइ गएन उ फुन जिदियाइ गवा। फिरौन वइसा नाही किहेस जइसा मूसा अउ हारून ओसे करइ बरे कहे रहेन। इ ठीक वइसा ही भवा जइसा यहोवा कहेस।

### जुआँ

16तब यहोवा मूसा स कहेस, “हारून स कहा कि उ आपन छड़ी उठावइ अउ भुइयों क धूरि प पटकइ। मिस्त्र में सब कइँती धूरि जुअँन होइ जाइ।”

17उ पचे इ किहेन। हारून छड़ी क उठाएस अउ भुइयों क धूरि प दइ मारेस। मिस्त्र में सब कइँती धूरि जुअँन में बदल गइ। जुअँन जानवरन अउ लोगन प छाइ गइन।

18जादूगरन आपन जादू मारेन अउ वइसे करइ चाहेन। मुला जादूगरन धूरि स जुअँन नाही बनाइ सकेन। जुअँन जानवरन अउ मनइयन प छाइ गएन। 19तउ जादूगरन फिरौन स कहेन, ‘इ परमेस्सर क सक्ती अहइ?’ मुला फिरौन ओनपइ बिसवास करइ स इन्कार कइ दिहेस। उ जिदी होइ गवा। इ ठीक अइसा ही भवा जइसा यहोवा कहे रहा।

### माखिन

20यहोवा मूसा स कहेस, “भिन्सारे उठा अउ फिरौन क लगे जा। फिरौन नदी क लगे जाइ। ओन से कहा, ‘मोरे लोगन क मोर आराधना बरे जाइ द्या। 21जदि तू मोर लोगन क नाहीं जाइ देब्या तउ तोहरे घरन में माखी अइहीं। माखी तोहरे अउ तोहरे अफसरन प छाड़ जइहीं। मिस्त्र क घरन माखिन स भरि जइहीं। माखिन पूरी भुइयाँ प छाड़ जइहीं। 22मुला मई इस्त्राएल क लोगन क संग वइसा बर्ताव न करब जइसा मिस्त्री लोगन क संग करिब। जहाँ गोसेन में मोर लोगन रहत हीं हुवाँ कउनो माखी नाहीं होइ। इ तरह तू जनब्या कि मई यहोवा, इ देसे में हउँ। 23एँह बरे मई काल्ह भियान स तोहरे लोगन क संग आपन लोगन स अलग बर्ताव करिहउँ।”

24एँह बरे यहोवा उहइ किहेस, “जउन उ कहेस। माखिन झुण्ड क झुण्ड में आइ गइन। माखिन फिरौन क घर अउ ओकर सबहिं अफसरन क घरे में भरी रहिन। माखिन पूरे मिस्त्र देस में भरि गइन। माखी देस क नासत रहिन। 25एँह बरे फिरौन मूसा अउ हारून क बोलाएस। फिरौन कहेस, “तू पचे यहोवा तोहार परमेस्सर क इहइ देस में बलि भेंट कइ द्या।”

26मुला मूसा कहेस, “वइसा करब नीक नाहीं होइ। मिस्त्री मनइयन सोचत हीं कि परमेस्सर बरे हम लोगन क बलि देब एक खउफनाक बात अहइ। एँह बरे जदि हम पचे अइसा करित तउ उ पचे हमका देखिहीं अउ हम पइ पाथर बहइहीं अउर हमका मारि डइहीं। 27हम पचन्क तीन दिना तलक रेगिस्तान में जाइ द्या अउर हमका आपन यहोवा परमेस्सर क ओकर हुकम क अनुसार बलि चढ़ावइ द्या।”

28एँह बरे फिरौन कहेस, “मई तोह सबन क मरूभूमि में जाइ क देब अउ तोह सबन क यहोवा तोहार परमेस्सर क भेंट चढ़ाई क देब। मुला तोहका बहोत दूर नाहीं जाई क चाही। अब जा अउर मोरे बरे पराथना कर।”

29मूसा कहेस, “लखा, मई जाब अउ यहोवा स पराथना करब कि काल्ह भियान आप स, आपक लोगन स अउ आपक अफसरन्स माखिन क हइइ देई। मुला आप लोगन क यहोवा क बलि चढ़ावइ स जिन रोका।”

30एँह बरे मूसा फिरौन क लगे स गवा अउ यहोवा स पराथना किहेस। 31अउर यहोवा इ किहेस जउन बरे मूसा पराथना किहेस। यहोवा माखिन क फिरौन स, ओकरे अफसरन्स ओकरे लोगन स हइइ लिहेस। कउनो माखी नाहीं टिक पाइ। 32मुला फिरौन फुन जिद्दी होइ गवा अउर उ लोगन क जाइ नाहीं दिहेस।

### खेते क गोरून क बेरामी

9 तब परमेस्सर मूसा स कहेस, फिरौन क लगे जा अउर ओका कहा, “हिब्रू मनइयन क यहोवा परमेस्सर कहत बा, ‘मोरे लोगन क मोरे आराधना बरे जाइ द्या। 2जदि आप ओनकइ लगातार रोकत रहब्या अउ ओनकइ जाइ स लगातार मना करत रहब्या, 3तउ यहोवा आपन सक्ती क प्रयोग तोहरे खेतन क गोरून क खिलाफ करी। परमेस्सर

तोहरे सबहिं घोड़न, गदहन, ऊँट, गइया बोकरी अउ भेड़िन क भयानक बेरामी दइ देइ। 4यहोवा इस्त्राएल क गोरून क संग मिस्त्र क गोरून स अलग बर्ताव करी। इस्त्राएलियन क मनइयन क कउनो गोरू न मरी। 5यहोवा एका घटित होइ जाइ क टेम तइ कइ दिहे अहइ। भियान यहोवा इहइ देस में घटइ देइ।”

6अगली भियान मिस्त्र क खेत क सबहिं जनावर मर गएन। मुला इस्त्राएल क कउनो भी जनावर नाहीं मरा। 7फिरौन मनयइन क यह देखे इस्त्राएल भेजा कि का इस्त्राएल क कउनो जनावर मरा। अउ इस्त्राएल क कउनो जनावर नाहीं मरा। फिरौन हठी रहा उ कउनो मनयइन क नाहीं जाई द्या।

### फोड़ा फुंसी

8यहोवा मूसा अउ हारून स कहेस, “मुट्ठी भर भट्ठी क राखी ल्या। मूसा तू फिरौन क समन्वा राखी क हवा में उछारा। 9इ धूरि होइ जाइ अउ समूचइ मिस्त्र देस में संचरि जाइ। जबहुँ इ धूरि मनई क छुइ या गोरू प गिरी, खाली प फोड़ा (गलका) फुंसी फुटिहीं।”

10एँह बरे मूसा अउ हारून भट्ठी स राखी लिहेस। तबहिं उ पचे गएन अउ फिरौन क समन्वा ठाड़ भएन। मूसा राखी क हवा में उछारेन अउर मनइयन अउ गोरून क बदन में फोड़ा फुंसी होइ लागेन। 11जादूगर मूसा क अइसा करइ स थाम नाहीं पाएन, काहे कि जादूगरन क फोड़ा होइ गएन। इ समूचइ मिस्त्र में अइसा ही भवा। 12मुला यहोवा फिरौन क जिद्दी बनइ दिहे रहा। एँह बरे फिरौन मूसा अउ हारून क सुनइ स मना कइ दिहेस। इ वइसा ही भवा जइसा यहोवा कहे रहा।

### ओला

13तब यहोवा मूसा स कहेस, “भिन्सारे उठा अउ फिरौन क समन्वा आपन आप क पेस करा। अउर ओसे कहा कि परमेस्सर, हिब्रू मनइयन क यहोवा तोहसे कहत ह, ‘मोरे लोगन क मोर आराधना बरे जाइ द्या। 14जदि तू इ नाहीं करब्या तउ मई तोहारे अफसरन अउ तोहारे मनइयन क खिलाफ आपन पूरी ताकत क प्रयोग करब। तब तू जनब्या कि मोरे तरह दुनिया में दूसर कउनो देवता नाहीं अहइ। 15मई आपन सक्ती क प्रयोग कइ सकत हउँ अउ अइसी बीमारी फइलाइ सकत हउँ जउन तोहका अउ तोहारे मनइयन क भुइयाँ प नास कइ डइ। 16मुला मई तू सबन्क कउनो खास कारण स हिआँ धरे अहउँ। मई तू पचन्क हियाँ एँह बरे धरे अहउँ कि मई तू पचन्क आपन सक्ती देखाउब। तब सारी दुनिया क मनइयन मोरे बारे में बात करिहीं। 17तू पचे अबहुँ मोरे लोगन क खिलाफ अहा। तू ओनका जाइ नाहीं देत अहा। 18एँह बरे भियान मई इहइ टेम काफी जोरदार ओला बरसाउब। जब ते मिस्त्र देस बना ह आजु तक कबहुँ अइसे ओला नाहीं बरसा ह। 19तू आपन गोरून क सुरच्छित ठउरे में राख्या। जउन कछू तोहार खेते में होइ ओका ओंटे में छिपाइ जरूर लिहा। काहेकी कउनो भी लोग या गोरू जउन खेते में होइ उ मरि जाइ। हर एक चीजन अउ हर

एक मनइयन प जउन घरे क बाहेर होइ ओन सब प ओला बरसिहीं।”

20फिरौन क कछू अफसरन यहोवा क संदेसे प धियान दिहेस। उ पचे हाली हाली आपन गोरूअन अउ गुलामन क घरे मँ हाँक लिहेन। 21मुला दूसर मनइयन यहोवा क संदेसा प धियान नाहीं दिहेन। ओ पचन्क गुलाम अउ गोरू जउन बाहेर खेतन मँ रहेन सब तबाह हो गएन।

22यहोवा मूसा स कहेस, “आपन हाथ हवा मँ उठावा अउ मिस्त्र प ओला गिरब सुरू होइ जइहीं। इ ओला मिस्त्र क सबहुँ खेतन प, लोगन प, गोरूअन प अउर बृच्छ अउ पौधा प गिरिहीं।”

23एँह बरे आपन छड़ी क हवा मँ उठाएस अउ यहोवा बिजुरी अउ ओला क भुइँया प गिराएन। ओला समूचइ मिस्त्र प गिरेन। 24ओला पड़त रहेन अउ बिजुरी चमकत रही। जबहिँ ते मिस्त्र एक ठु रास्ट्र बना तबहिँ स अब तलक इ सबते जिआदा नेसकान करइवाली ओला बरसत रही। 25मिस्त्र क खेत मँ जउन कछू रहा आँधी ओका नसाइ दिहेस। ओला मिस्त्र मँ मनइयन, गोरूअन अउ बृच्छ पउधन क नास कइ डाएस। ओला खेतन मँ सबन बृच्छन क ओखाइ अउ तोड़ि दिहस। 26गोसेन पहुँटा मँ जहाँ इस्त्राएल क मनइ रहत रहेन हुवाँ ओला नाहीं गिरेन।

27फिरौन मूसा अउ हारून क बोलाएस। फिरौन ओनसे कहेस, “इ समइ मँ मई पाप किहउँ ह। यहोवा सही अहइ। अउर मई अउ मोर लोग गलत अहइँ। 28परमेस्सर क ओर स ओला क आवाज अउ गर्जत अवाज बहोत जिआदा बा। यहोवा स आँधी थामइ क परार्थना करा। मई तू सबइ पचन्क जाइ देब। तू सबइ पचन्क हिआँ नाहीं रहइ क पड़ी।”

29मूसा फिरौन स कहेस, “जब मई सहर क तजि देब, तबहिँ मई परार्थना मँ आपन बाँही क यहोवा क समन्वा पसराउब। गर्जब अउ ओला क गिरब थमि जाइ। तबहिँ आप सबन जनिहीं कि इ भुँइया यहोवा क अहइ। 30मुला मई जानत हउँ कि आप अउ आपक अफसरन अबहुँ नाहीं यहोवा स डेरतेन अउर नाही यहोवा क इज्जत देत हीं।”

31सनई मँ दाना पड़ि गवा रहा अउ बारली मँ फूल निकरि आवा रहा। मुला इ सब पउधन नसाइ गएन। 32गोहूँ अउ कठियान गोहूँ जउन दूसर अनाजे क पाछे पाकत हीं, एँह बरे एनकइ फसल नसान नाहीं।

33मूसा फिरौन क तजि दिहेस अउ सहर क बाहेर आवा। उ यहोवा क समन्वा आपन बाँह पसारेस अउ गर्जब अउ ओला क गिरब पटान। बर्खउ धरती प गिरब पटाइ गइ।

34जब फिरौन लखेस, कि बर्खी, ओला अउ गर्जब पटाइ गएन। उ फुन स पाप किहेस। उ अउ ओकर अफसरन फुन जिद धरे रहेन। 35फिरौन फुन जिदी होइ गएन। उ इस्त्राएल क मनइयन क अजादी स जाइके मना कइ दिहस। इ ठीक उहइ तरह भवा जइसे यहोवा मूसा स कहे रहा।

### टिड्डियन

10 यहोवा मूसा स कहेस, “फिरौन क हिआँ जा। मई ओका अउ ओकरे अफसरन्क जिद्दी बनइ दिहेउँ ह। मई यह आपन बरियारे क चमत्कार ओनका अउर

ओकर लोगन क समन्वा देखाइ बरे किहेउँ ह। 2मई एँका एँह बरे किहेउँ ह कि तू आपन पूत-बिटिया तथा नाती-नतिनी क ओन अजूबा काम क अउ दूसर चीन्ह क बताइ सका जउन मई मिस्त्री लोगन क खिलाफ मँ किहेउँ ह। तबहिँ तू पचे जान लेब्या कि मई यहोवा हउँ।”

3एँह बरे मूसा अउ हारून फिरौन क लगे गएन। उ पचे ओसे कहेन, “हिब्रू लोगन क यहोवा परमेस्सर कहत हीं, ‘तू मोरे हुकुम क मानइ स कब ताई इन्कार करब्या? मोरे लोगन क मोर आराधना करइ बरे जाइ द्या। 4जदि तू मोर लोगन क जाइ स मना करत ह तउ मई भियान तोहरे देस मँ टिड्डियन क लइ आउब। 5टिड्डियन पूरी भुइँया क ढाँपि लेइहीं। ओ एँतना ढेरि क होइहीं कि तू भुइँयाँ नाहीं लखइ पउब्या। सबहिँ पउधन अउ जउन कछू चीज ओला भरी आँधी स बचि गइ बाटिन ओका टिड्डियन चट कइ जइहीं। टिड्डियन मइदान क सब पातिन्क चट कइ डइहीं। 6टिड्डियन सबहिँ घरन, तोहरे अफसरन्क सबहुँ घरन अउ मिस्त्र क सबहुँ घरन मँ भरि जइहीं। जेतना टिड्डियन तोहार बाप दादा कबहुँ न देखे होइहीं ओसे भी जिआदा टिड्डियन हिआँ होइहीं। जब ते मनइयन मिस्त्र मँ रहइ लागेन, तब ते जब कबहुँ टिड्डियन भइ होइहीं ओसे भी जिआदा टिड्डियन होइहीं।” तबहिँ मूसा घूमि गवा अउ फिरौन क तजि दिहस।

7फिरौन क अफसरन ओसे पूछेन, “हम पचे कब तलक इ लोगन क जालि मँ फँसा रहब। मनइयन क यहोवा आपन परमेस्सर क आराधना करइ जाइ द्या। जदि आप ओनका नाहीं जाइ देब्या तउ आपक जानइ स पहिले मिस्त्र बरबाद होइ जाइ।”

8एँह बरे फिरौन आपन अफसरन्स कहेस कि मूसा अउ हारून क ओकरे लगे लिआवा। उ ओनसे कहेस, “जा अउ यहोवा आपन परमेस्सर क आराधना करा। मुला मोका बतावा फुरे कि कउन कउन जात अहइँ?”

9मूसा जवाब दिहेस, “हमार मनई जवान अउ बुढ़वा मनई जइहीं। अउ हम पचे आपन बेटहनन अउ बिटिनियन, आपन भेड़िन अउ गोरूअन क आपन संग लइ जाब। हम सब एक अउट जाब काहे कि परमेस्सर क भोज हम सबइ बरे अहइ।”

10फिरौन ओनसे कहेस, “जदि मई कभी तू पचन्क अउ तोहरे बचवन क जाइ देइ तउ परमेस्सर क सचमुच तोहरे साथे होइ चाही। लखा, तू पचे कछू बुरा योजना करत बाट्या? 11सिरिफ मनइयन ही जाइ सकत हीं अउ यहोवा क आराधना कइ सकत हीं। तू पचे इहइ सुरू से ही माँग्या ह। मुला तोहार सारे लोगन क साथे जाइ क आग्या नाही बा।” तब फिरौन मूसा अउ हारून क पठाएस।

12यहोवा मूसा स कहेस, “मिस्त्र क धरती प बाँहिया उठावा अउ टिड्डियन आइ जइहीं। टिड्डियन मिस्त्र क सारी भुइँयाँ प संचर जइहीं। टिड्डियन ओला स बचा भवा पेड़ पउधा क चट कइ जइहीं।”

13मूसा आपन छड़ी क मिस्त्र कइँती उठाएस अउ यहोवा पूरब स जोर क आँधी चलाइ दिहेस। आँधी उ सारे दिन भइ अउ रात मँ चलत रही। जब भिन्सार भवा, आँधी मिस्त्र देस मँ टिड्डियन क लइ आइ दिहस। 14टिड्डियन मिस्त्र देस स

उड़िके आइन अउ भुइयाँ प बैठि गइन। मिस्त्र मँ एँतनी जिआदा टिड्डियन कबहुँ नाहीं भइन जेतनी इ दई रहिन। 15टिड्डियन पूरी भुइयाँ क ढँपि लेइहीं। एँह बरे पूरे देस मँ जमीन प अँधियारा छाड़ गवा। टिड्डिन ओन सबहिँ पउधन क अउ बृच्छ क हरिअर फल क, जउन ओला गिरे स नसान नाहीं रहेन, चट कइ डाइन। मिस्त्र मँ कतहुँ कउनो पेड़ या पउधन प कउनो पाती नाहीं रहि पाइ।

16फिरौन मूसा अउ हारून क हाली बोलावाएस। फिरौन कहेस, “मई तोहरे अउ यहोवा तोहरे परमेस्सर क खिलाफ पाप किहेउँ ह। 17इ टेम प मोरे पाप क अब छिमा कइ द्या। यहोवा आपन स पराथना करा कि इ ‘मउत’ (टिड्डियन) क मोसे दूर करा।”

18मूसा फिरौन स अलग भवा अउ उ यहोवा स पराथना किहेस। 19एँह बरे यहोवा हवा क बहब बदलि दिहस। यहोवा पच्छिउँ स तेज आँधी उठाएस अउ उ टिड्डियन क लाल सागरे\* मँ हटाइ दिहस। एक तु भी टिड्डी मिस्त्र मँ नाहीं बचि पाएस। 20मुला यहोवा फिरौन क जिददी बनाएस। अउ फिरौन इस्त्राएल क मनइयन क जाइ नाहीं दिहस।

### अँधियारा

21तब यहोवा मूसा स कहेस, “आपन बाँही क हवा मँ ऊपर उठावा अउ अँधियारा मिस्त्र क ओढ़ि लेइ। इ अँधियारा एतना गहिर अउ मोट होइ कि तू एँका महसूस कइ सकित ह।”

22तउ मूसा आपन हथवा हवा मँ उठाएस अउ मिस्त्र मँ टोवइवाला अँधियार छाड़ गवा। इ अँधियारा तीन दिना तलक मिस्त्र मँ रहा। 23मनइयन मँ स कउनो क चोंधरात नाहीं रहा अउ तीन दिन कउनो कतहुँ नाहीं जाइ पावा। मुला हुवाँ उजिआरा उ ठउरन प रहा जहाँ कतहुँ इस्त्राएल क मनई रहेन।

24फिरौन मूसा क फुन बोलाएस। फिरौन कहेस, “जा अउ यहोवा क आराधना करा। तू पचे आपन संग बचवन क लइ जाइ सकत ह। सिरिफ आपन भेड़िन अउ गोरून क हिआँ तजि द्या।”

25मूसा कहेस, “न सिरिफ हम पचे आपन भेड़ अउ गोरू क लइ जाब मुला जब हम पचे जाब, आप हम सबन्क भेंट अउ बलि भी देब्या। हम पचे इ सब बलिन क आपन परमेस्सर यहोवा क आराधना बरे बइपरब। 26हम पचे आपन पसु क संग संग परमेस्सर क आराधना बरे लइ जाब। हमरे पाछे एक तु खुर भी न छूटि पाइ। हम पचे ठीक तरह अबहिँ नाहीं जानित अही कि परमेस्सर क आराधना बरे हम क का चाही। हम पचे तब ओका जानि पाउब जब हम सबइ उ ठउरे क पहुँचि जाब जहाँ हम पचे जात अही।”

27यहोवा फुन फिरौन क जिददी बनाएस। एँह बरे फिरौन ओन सब क जाइ स मना कइ दिहस। 28तब फिरौन मूसा स कहेस, “मोसे दूर होइ जा। मई नाहीं चाहित कि तू हिआँ फुन आवा। एकरे पाछे जदि तू हम से भेंटइ अउब्या तउ मारि डावा जाब्या।”

29तबहिँ मूसा फिरौन स कहेस, “आप जउन कहत हीं, ठीक बा। मई फुन आप स भेंटइ कबहुँ न आउब।”

### पहिलौटी क मउत

1 तब यहोवा मूसा स कहेस, “मई फिरौन अउ मिस्त्र क खिलाफ एक तु अउर बिपत लइ आउब। एकरे पाछे उ तू सबन्क मिस्त्र स पठइ देइ। असिल मँ उ तू पचन्क इ देस तजि देइ क मजबूर करी। 2तू इस्त्राएलियन क इ संदेसा जरूर दिहा: ‘तू आपन पड़ोसियन मनसेधू अउ मेहरारूअन स सोना अउ चाँदी क बनी चीज मांग्या। 3परमेस्सर मिस्त्र क मनइयन क तू सबन प कृपालु बनइहीं। मिस्त्री मनइयन, हिआँ तलक फिरौन क अफसरन भी पहिलेन स मूसा क बड़का मनइ मानत हीं।”

4मूसा लोगन स कहेस, “यहोवा कहत हीं: ‘आज आधी रात क मई मिस्त्र स होइके जाब, 5अउ मिस्त्र क सबइ पहिलौटी पूतन अउ मिस्त्र क राजा फिरौन क पहिलौटी बेटवा स लइके जाँत चलावइवाली नौकरानी तलक क पहिलौटी पूत मरि जाइ। पहिलौटी क पइदा भवा नर गोरू भी मरिहीं। 6मिस्त्र क समूचइ धरती पइ रोउब पीटब होइहीं। उ रोउब पीटब मिस्त्र मँ पुराने जमाने मँ कबहुँ भए रहेन कउनो भी रोउब पीटब स या आवइ वाल समइ मँ कबहुँ होइवाला रोउब पीटब से जियादा बुरा होइहीं। 7मुला इस्त्राएल क कउनो भी मनइ क चोट न पहुँच पाइ। हिआँ तलक कि ओन लोगन प कउनो कुत्ता भी नाहीं भूँकी। न कउनो इस्त्राएली मनइ क अउ न ही कउनो गोरूअन क चोट लागी। इ तरह स तू जनब्या कि मई इस्त्राएल क मिस्त्र स अलगउज क बियूहार कीन्ह ह। 8तबहिँ तोहार सब मिस्त्री अधिकारियन मोर समन्वा निहुरिहीं अउ मोर पूजा करइही। उ पचे कइहीं, ‘जा, अउ आपन सबहिँ लोगन क आपन संग लइ आवा।’ तबहिँ मई फिरौन क कोहाइ क देब।”

9तबहिँ यहोवा मूसा स कहेस, “फिरौन तोहार बात सुनेस नाहीं। काहे? एँह बरे कि मई आपन बड़की सकती क मिस्त्र मँ देखाइ सकउँ।” 10इहइ कारण रहा कि मूसा अउ हारून फिरौन क समन्वा बड़का बड़का चमत्कार देखाएन। अउर इहइ कारण अहइ कि यहोवा फिरौन क एँतना हट्टी बनाएस कि उ इस्त्राएल क मनइयन क आपन देस तजइ नाहीं दिहस।

### फसह

12 मूसा अउ हारून जब मिस्त्र मँ रहेन, यहोवा ओनसे कहेस। यहोवा कहेस, 2“इ महीना तोहार बरे बरिस क पहिल महीना होइ। 3इ हुकुम इस्त्राएल क पूरी जाति बरे अहइ: इ महीना क दसवाँ दिन हर मनइ आपन परिवारे बरे एक तु मेनना जरूर राखी। 4जदि हुवाँ जिआदा मनइयन अेकरे घरे मँ मेमना क खाइ बरे न होइँ, तउ ओका आपन पड़ोसियन क भोज खाइ बरे बोलावइ चाही। हर मनइ क खाइ बरे मेमना क पर्याप्त गोस होइ चाही।

5एक बरिस क नर मेमना बे दोखे तगइ होइ क चाही। इ पसु या तउ भेड़ क बच्चा या बोकरी क बच्चा होइ सकत ह। 6तोहका इ मेमना क महीना क चौदहवाँ तारीख ताई रखइ चाही। उ दिन इस्त्राएल बिरादरी क सबहिँ लोग

गोधरी क समइ में इ मेमनन क जरूर मारिहीं। 7इ जानवरन क खून तोहका बटोरइ क चाही। कछू खून घरे क दरवाजे क चौखट क ऊपर सिरा अउ दुइनउँ पाटी प लगावइ चाही, जउन घरन में मनइयन खइया क खाईं।

8इ रात क तू मेमना क भूँजि ल्या अउ ओकर सबइ गोस खाइ ल्या। तू जरूर कइवान जरी-बूटी अउ बे खमीरे क रोटी भी खाइ लिहा। 9तोहका मेमना क बच्चा नाहीं खाइ चाही तोहका मेमना क पानी में बोलकावइ नाहीं चाहीं तोहका समूचइ मेमना क आगी प भूँजइ चाही। इ हालत में भी मेमना क मूँइ, जोइ अउ ओकरे भीतर क हींसा ठीक ठाक होइ क चाही। 10उहइ राति क तोहका सब गोस खाइ लेइ चाही। जदि तनिक गोस भिन्सारे ताई बचि खुचि जाइ तउ ओका आगी में जराइ देइ चाही।

11“जब तू खइया क खाया तउ अइसे ओढ़ना क पहिरया जइसे तू पचे जात्रा प जात ह्वा। तू पचन्क लबादा तोहरे पेटी में कसा होइ चाही। तू पचे आपन पनही पहिरे रहया अउ आपन जात्रा करइ क लाठी आपन हाथे में थामे रहया। तू पचन्क हालि खइया क खाइ लिहा। काहेकि इ यहोवा क फसह अहइ- उ टेम जब यहोवा ओकरे मनइयन क बचाएस अउ मिस्त्र स ओनका हाली बाहेर किहेस।”

12“आजु राति में मई मिस्त्र स होइक जाब अउ मिस्त्र में सबइ पहिलौटी पूत क मारि डाउब। मई सबहि पहिलौटी का पइदा भवा मनइ क बेटवा, अउ जानवर क बच्चा क मारि डाउब। इ तरह मइ मिस्त्र क सबहि देवतन क परखब अउ देखाउब कि मई यहोवा हउँ। 13मुला तू मनइयन\* क घरेन प लाग खून क चीन्हा एक खास चीन्हा होइ। जब मई खून क चीन्हा क लखब, तउ मई तू पचन क घरेन क सुरच्छित तजइ भवा चला जाब। मई मिस्त्र क मनइयन क मारब, मुला ओन जानलेवा माहमारी स तू पचन्क कउनो भी नसकान न पहुचाउब।

14“तउ तू पचे आजु इ रात क हमेसा याद करब्या। तू पचन बरे एक खास पवित्तर क दिन होइ। तोहार सन्तानन हमेसा इ पवित्तर दिन क मनाइ क जरिया यहोवा क सम्मान देइही 15इ पवित्तर दिन प तू पचे बेखमीर क आटा क रोटी सात दिन ताई खउब्या। इ पवित्तर दिन क अवाई स पहिले तू पचे आपन घरे स खमीर क निकारिके बाहेर बहाइ द्या। इ पवित्तर दिन क सात दिन ताई तू पचे में स कउनो क भी खमीर नाहीं खाइ चाही। जदि तू पचे में स कउनो भी मनइ खमीर खाई तउ ओका इस्त्राएल क दूसर मनइयन स निकारइ दइ जाब्या। 16इ पवित्तर दिन क पहिले दिन अउ सातवाँ दिन में तोहका पवित्तर बइठक करइ चाही। इ दिनन तोहका कउनो काम नाहीं करइ क होइ। इ दिनन सिरिफ एक काम जेका करइ क अगिगया अहइ आपन भोज क तइयार करब। 17तू लोगन क बेखमीरे क पवित्तर त्यौहार क जरूर याद राखे चाही। काहेकि इहइ दिन ही मई तोहरे लोगन क समूहन में मिस्त्र स बाहेर लइ आवा। एँह बरे तू लोगन क

अउर तोहार सबहि सन्तानन क इ दिन याद राखइ क होइ। इ नेम अहइ अउ इ सदा रही। 18एँह बरे पहिले महीना निसन क चौदहवाँ दिन क साँझ स तू पचे बेखमीरे क रोटी खाब सुरू करब्या। उहइ महीना क इक्कीसवाँ दिन क साँझ तलक तू अइसी रोटी खाब्या। 19सात दिना ताई तू सबन्क घरन में कउनो खमीर क रोटी नाहीं होइ चाही। कउनो भी मनइ चाहे उ आपन देस में पैदा भवा ह या विदेसी होइ जउन इ खमीर क खाई दूसर इस्त्राएलियन स अलगाइ दीन्ह जाइ। 20इ पवित्तर दिन क तू पचन्क खमीर नाहीं खाई चाही। तू जहाँ कतहुँ रहा बेखमीरे क रोटी खाया।”

21एँह बरे मूसा सबहि बुजुर्गन क एक ठउरे प बोलाएस। मूसा ओन पचन्सा कहेस, “आपन परिवारे बरे मेमनन लइ ल्या। फसह त्यौहारे बरे मेमनन क मारि द्या। 22हिसाप\* क गुच्छा क लइ ल्या। खोरा में ओनका डुबावा अउर दुइनउँ चौखटन क दुइनउँ कइँती अउ सिरन प खून क लगावा। तू पचन में स कउनो भी भियान तई आपन घर नाहीं छोरेइ चाही। 23जब यहोवा पहिलौटी क मारइ बरे मिस्त्र स होइके जाइ तउ यहोवा उ घरे क रच्छा करिहीं जउने घर क चौखटन क दुइनउँ कइँती अउ सिरन प खून लखिहीं। यहोवा नास करइवालन क तोहरे घरे क भीतर ना भेजही। उ तू पचन्क चोट न पहुँचइहीं। 24तू पचन क इ हुकुम जरूर याद राखइ चाही। इ नेम तू पचन अउ तू पचन क सन्तानन बरे हमेसा अहइ। 25तू सबन्क इ जसन क तवहुँ याद राखइ क होइ जब तू पचे उ देस में पहुँचब्या जउन यहोवा तू सबन्क आपन वाचा क अनुसार देइहीं। 26जब तोहार गदेलन तोहसे पूछिहीं, ‘इ त्यौहार क का मतलब अहइ?’ 27तउ तू पचे कहब्या, ‘इ फसह त्यौहार यहोवा क सम्मान बरे अहइ। काहेकि जब हम पचे मिस्त्र में रहेन तब यहोवा इस्त्राएल क घरवा स होइके गएन। यहोवा मिस्त्र क मनइयन क मारि डाएन मुला हम सबन्क हमार घरे में बचाइ लिहन। तबहि लोग यहोवा क निहुरेन अउ आराधना किहेन।”

28यहोवा इ हुकुम मूसा अउ हारून क दिहे रहा। एँह बरे इस्त्राएल क मनइयन उहइ किहेन जउन यहोवा क हुकुम रहा।

29आधी रात क यहोवा मिस्त्र क सबहि पइदा भए पूतन, फिरौन क पहिलौटी क पूत जउन मिस्त्र क राजा रहा-स लइके जेल में बइठेन कैदी क पूत तलक सबहि क मारि डाएन। पहिलौटी क पइदा जानवर भी मरि गएन। 30मिस्त्र में उ राति क कउनो न कउनो मरि गवा। फिरौन, ओकर अफसरन अउ मिस्त्र क सबहि मनइयन ज़ोर स रोवइ चिचिआइ लागेन।

### इस्त्राएलियन मिस्त्र क तजि देत हीं

31एँह बरे उ रात फिरौन मूसा अउ हारून क बोलाएस। फिरौन ओसे कहेस, “तइयार होइ जा अउ हमरे लोगन क तजिके चला जा। तू अउ तोहार लोगन वइसा हीं करि सकत हीं जइसा तू कहया ह। जा अउ आपन यहोवा क आराधना करा। 32अउ तू पचे जइसा तू कहया ह कि तू चाहत बाद्या,

हिसाप तीन फुट ऊँच तने क पौधा। एँकर पाती अउ डार बारे क नाई होत हीं। ओका कूँची क तरह बइपरत हीं।

**मनइयन** मनइ काम करइ या लम्बा रस्ता प जाइ बरे आपन टॉग क बीचोबीच हींच लेत रहेन अउ पेटी स दबाइ लेत रहेन “कूदब”, “रच्छा करब” अहइ। यहोवा आपन मनइयन क रच्छा किहेस अउ ओनका बाहेर लइ गवा।

आपन भेड़िन अउ गोरूअन क आपन संग लइ जाइ सकत ह, जा अउ मोका भी आसीबदि द्या।” 33मिस्र क मनइयन भी ओनका हालि जाइके कहेन। काहेकि उ पचे कहेन, “जदि तू पचे हालि नाहीं जात बाट्या हम सबहिं मरि जाब।”

34इस्त्राएलियन क लगे ऐतना टेमें न रहा कि उ पचे आपन रोटी में खमीर नावई। उ पचे गूँधा भवा आटा क परातन क कपड़ा में लपेटिके अउ ओका आपन कौंधे प धइके ढोएन। 35तबहिं इस्त्राएलियन उहइ किहेन जउन मूसा करइ क कहेस।” उ पचे आपन मिस्री पड़ोसियन क लगे गएन अउ ओनसे ओढ़ना अउर चाँदी सोना स बनी चीजनक मॉगस। 36यहोवा मिस्री लोगन क इस्त्राएल क लोगन बरे दयालु बनइ दिहेन। ऐह बरे मिस्र क लोग आपन धन दौलत इस्त्राएलियन क दइ दिहेन।

37इस्त्राएल क मनइयन रमसिज स सुक्काथ गएन। उ सबइ छः लाख मनइ\* रहेन। ऐहमा गदेलन मिलाइ क नाहीं अहई। 38ओनके संग ढेर भेड़न, गइयन, बोकरियन अउ दूसर गोरूअन रहा। ओनके संग दूसर मनइ भी जात्रा करत रहेन। जउन इस्त्राएलियन नाहीं रहेन, मुला उ पचे ओनके संग गएन। 39मुला मनइयन क गूँधा भवा आँटा क फुलइ दइ क टेमें नाहीं मिला। अउ उ पचे आपन जात्रा बरे कउनो खास खइया के नाहीं बनाएन। ऐह बरे ओनका बेखमीर क रोटी बनवइ क पड़ी।

40इस्त्राएल क लोग मिस्र\* में चार सौ तीस बरिस ताई जिअत रहेन। 41चार सौ तीस बरिस पाछे, ठीक उहइ दिन, यहोवा क सबइ मनइयन मिस्र क तजि दिहेन। 42उ खास रात अहइ जब लोग याद करत हीं कि यहोवा ओनका मिस्र स बाहेर लइ आएन। इस्त्राएल क सबहिं मनइयन उ रात क हमेसा याद रखिहीं।

43यहोवा मूसा अउ हारून स कहेस, “इ सबइ फसह त्यौहार क नेम अहई: कउनो बिदेसी फसह त्यौहार क पवित्तर भोजन नाहीं खाइ। 44मुला जदि कउनो मनइ गुलाम क खरीदी अउ जदि ओकर खतना करी तउ उ गुलाम उ प्रसाद क खाइ सकत ह। 45मुला जदि कउनो मनइ सिरिफ तू पचन्क देस में रहत ह या कउनो मनइ तोहरे बरे मजूरी प रखा गवा अहइ तउ उ मनइ क प्रसाद खाइ क न चाही। उ प्रसाद सिरिफ इस्त्राएल क मनइयन बरे अहइ।

46हर परिवारे क घरवा क भीतर ही खइया क खाइ चाही। कउनो क भी खइया क घरे क बाहर नाहीं लइ जाइ चाही। भेड़ क बच्चा क कउनो हाइ जिन तोड़ा। 47समूचइ इस्त्राएलियन जाति इ त्यौहार क जरूर मनावइ। 48जदि कउनो प्रवासी जउन तोहरे संग रहत ह अउर उ यहोवा क फसह में हिस्सा लेइ चाहत ह, तउ ओकर खतना जरूर होइ चाही। तउ उ इस्त्राएल क नागरिक क तरह होइ, अउर उ खइया में हिस्सा लइ सकी। मुला जदि उ मनइ क खतना नाहीं भवा होइ तउ उ इ पसह क त्यौहार क खइया क नाहीं खाइ

**छः लाख मनई** परिवार ज झुण्ड-हिब्रू सब्द “हजार” उ हिब्रू सब्द क तरइ अहइ जेकर अरथ परिवार क समूह होत ह।

**मिस्र** पुरान ग्रीक अउ समरीती अनुवाद में “मिस्र अउ कनान” अहइ। एहसे पता लागत ह कि उ पचे इब्राहीम क टेंम स बरिस क गनत रहत रहेन, यूसुफ क टेमें स नाही।

सकत। 49इ सबहिं नेम हर एक प लागू होइहीं। नेम लागू भए में इ बात क कउनो फर्क नाहीं परिहीं चाहे उ आपन देस में पइदा भवा रहा या कउनो तोहरे बीच में रहइवाला बिदेसी अहइ।”

50ऐह बरे इस्त्राएल क सबहिं मनइयन ओन हुकुमन क तामील किहेन जेनका यहोवा मूसा अउ हारून क दिहेन। 51उहइ दिन यहोवा इस्त्राएल क सबहिं लोगन क मिस्र स बाहेर लइ गएन। लोग झुण्डे में गएन।

### पहिले पइदा भए अउलाद क अर्पण

**13** तब यहोवा मूसा स कहेस, 2“हर पहिला पइदा भवा इस्त्राएली लरिका मोका अर्पण कइ दिहा। हर अउरत क पहिला पइदा बचवा मोर ही होइ। तू पचे पहिला पइदा हर एक नर पसु क मोका अर्पण कइ दिहा।”

3मूसा मनइयन स कहेस, “इ दिन क याद राखा। तू पचे मिस्र में गुलाम रहया। मुला इ दिन यहोवा आपन बड़की सक्ती क बइपरेस अउ तू पचन्क अजाद कराएस। तू पचे खमीरे क संग जिन खाया। 4आजु आबीब क महीना में, तू पचे मिस्र स जात रहया। 5यहोवा तू पचन्क पुरखन स खास वाचा किहे रहेन। यहोवा तू पचन्क कनानी, हित्ती, एमोरी, परिज्जी, हिब्वी, अउ यबूसी मनइयन क धरती देइ क वाचा किहेस। जब यहोवा तू पचन्क उ बढिया देस में ले जाइ जहाँ दूध अउर सहद क नदी बहत रहत ह तब तू इ दिन क जरूर याद राख्या। तू पचे हर बार बरिस क पहिले महीना में इ दिन क खास आराधना क दिन क रूप में मनाव।

6“सात दिन तलक तू पचे उहइ रोटी खाया जेहँमा खमीर न होइ। सातवें दिन एक ठु बड़की दावत होइ। इ दावत यहोवा क मान करइ क निसानी होइ। 7ऐह बरे सात दिना ताई खमीर स बनई रोटी नाहीं खाइ चाही। तोहरे पहँटा में कउनो जगह खमीर क रोटी नाहीं होइ चाही। 8इ दिन तू सबन्क आपन गदेलन स कहेइ चाही, ‘हम पचे इ दावत ऐह बरे करत अही कि यहोवा हमका मिस्र स बाहेर निकारेस।’

9“इ छुट्टी क दिन तू पचन्क याद करइ में मदद करी यानी इ तू पचन्क कलाई प बाँधा धागा\* क नाई होइ। इ दिन तोहार आँख क आगवा एक चीन्ह क नाई होइ। इ छुट्टी क दिन तोहका यहोवा क उपदेस क याद राखइ में मदद करी। इ छुट्टी क दिन तू पचन्क ई याद राखइ में मदद करी कि यहोवा तू पचन्क क आपन महान सक्ती क प्रयोग कइके तोहका मिस्र स बाहेर निकारेस ह। 10ऐह बरे हर बरिस इ छुट्टी क दिन क ठीक टेम प मनावइ क याद राखा।

11“यहोवा तू मनइयन क उ देस में लइ चलिहीं जेका तू पचन्क देइ बरे वाचा किहेस रहा। इ समइया हुवाँ कनानी मनइ रहत हीं। मुला यहोवा तोहार पुरखन स इ वाचा किहे रहा कि इ धरती तू पचन्क दइ देइ। यहोवा इ भुईँया तोहका देइहीं। 12ओकरे पाछे तू सबइ आपन हर एक पहिलौटी लरिका क ओका अर्पण करइके याद राखा अउ हर एक

**बाँधा धागा** तोहरे हथवा प चीन्हा अउ माथे प निसानी। इ उ खास चीज क इस्सारा करत ह जेका यहूदी आपन बाँह प अउ माथे प यहोवा क नेम क याद दियावइ बरे बाँधत हीं।

पहिला पइदा भवा नर पसु क जरूर यहोवा बरे अर्पण कइ दिहा। 13हर एक पहिला पइदा भवा गदहा यहोवा स वापस बेसहि लिहा। तू पचे ओकरे बदले में भेड़ क बच्चा क दइ दिहा अउ गदहा क वापस लइ सकत ह। जदि तू यहोवा स गदहा नाहीं बेसहा चहत्या तउ एका मारि डावा। इ एक बलि होइ। तू ओकर गरदन जरूर तोड़ि द्या। हर एक पहिलौटी लरिका यहोवा स फुन जरूर बेसहि लीन्ह जाइ।

14“अगावा तोहार गदेलन पूछिहीं तू इ काहे करत ह। उ पचे कइहीं, ‘इ सब का का मतलब अहइ?’ अउर तू जवाब देब्या, ‘यहोवा हम सबन्क मिस्त्र स बचावइ बरे बड़की सकती बइपरेस ह। हम पचे हुवाँ गुलाम रहेन। मुला यहोवा हम पचन्क बाहेर निकारेस अउ उ पचे हिआँ लइ आएन। 15मिस्त्र में फिरौन हठी होइ गवा। उ हम पचन क जाइ नाहीं दिहस। ऐह बरे यहोवा उ देस क सबहिं पहिलौटी नर अउलादे क मारि डाएस। (यहोवा पहिलौटी नर पसु अउ पहिलौटी बेटवन क मारि डाएस।) ऐह बरे हम पचे पहिले पइदा भए हर एक नर पसु क यहोवा बरे अर्पण करत अही। अउर इहइ कारण अहइ कि हम पचे पहिलौटी भए बेटवन क यहोवा स बेसहित ह।’ 16इ तोहरे कलाई प बाँधा भवा धगा क नाई अहइ। अउ इ तोहरे आँखिन क समन्वा बाँधा भवा चीन्हा क तरह अइइ। इ एका याद दियावइ में मदद करी कि यहोवा आपन बड़की ताकत स हम पचन्क मिस्त्र स बाहेर लइ आएन।”

### मिस्त्र स बाहेर जात्रा

17फिरौन लोगन क मिस्त्र तजि देइ क मजबूर किहेस। यहोवा लोगन क उ सड़क प नाहीं जाइ दिहस जउन फिलीस्तीन कइँती जात रही। उ सड़क समुद्र स होइ क सबते छोटी राह रही मुला यहोवा कहेस, “जदि लोगन उ राहे स जात हीं, उ पचन्क जुद्ध करइ क होइ। तउ उ पचे आपन इरादा बदलि सकत हीं अउ मिस्त्र क लौटि सकत हीं।” 18ऐह बरे यहोवा ओनका दूसर राहे स लइ गवा। उ ओन पचेन्क लाल समुद्र क रेगिस्ताने स लइ गवा। इस्राएल क मनइयन जुद्ध क कपड़ा पहिरे रहेन जब उ पचे मिस्त्र क तजि दिहन।

### यूसुफ घर जात ह

19मूसा यूसुफ क हाड़े क आपन संग लइ गवा। मरइ क पहिले यूसुफ इस्राएल क अउलादे स वाचा किहेस कि उ पचे इ करिहीं। मरइ स पहिले यूसुफ कहेस, “परमेस्सर तू पचन्क बचावइ, तू आपन संग मोर हाड़े क मिस्त्र स बाहेर लइ जाइ क याद राखा।”

### यहोवा आपन लोगन क अगुवाई करत ह

20इस्राएल क मनइयन सुक्कोत नगर तजेन अउ एताम में डेरा डाएन। एताम रेगिस्ताने क छोरे प रहा। 21यहोवा रस्ता देखौएन। दिन में यहोवा एक लम्बा बदरे क प्रयोग मनइयन क लइ जाइ बरे किहस अउ राति में यहोवा ओनका रस्ता देखावइ बरे एक लम्बा आगी क खम्भा क बइपरेस। इ आगी ओनका उजिआरा देत रही। इ कारण उ पचे राति में

जात्रा कइ सकत रहेन। 22एक ऊँच खम्भा क रूप में बादर हमेसा ओनके संग दिन में रहा अउ राति क आगी क खम्भा सदा ओनके संग रहा।

14 यहोवा मूसा स कहेस, 2“लोगन स कहा कि पीहाहीरोत क पाछे होइ के जात्रा करइँ। मिगदोल अउ लाल समुद्र क बीच राति में ओनसे ठहरइ बरे कहा। इ बाल सपोन क निगचे बा। 3फिरौन सोची कि इस्राएल क मनइयन रेगिस्तान में भटक गएन अहँइ अउर उ नाहीं जानत कि कउन दिसा जाइ। 4मइँ फिरौन क हिम्मती बनउब जेसे उ तू पचन्क पाछा करइ। मुला मइँ फिरौन अउ ओकर फउज क हराइ देब। एहसे हमार महिमा बाढ़ी। तब मिस्त्र क मनइयन जनिहीं कि मइँ यहोवा हउँ।” इस्राएल क मनइयन यहोवा क हुकुम मानेन यानी उ पचे उहइ किहेन जउन उ कहे रहा।

### फिरौन इस्राएलियन क खदेरत ह

5जब फिरौन क इ खबर मिली कि इस्राएलियन परात अहँइ तउ उ अउ ओकर अफसरन ओनका हुवाँ स चला जाइ क जउन बचन दिहे रहेन, ओकरे बरे आपन इरादा बदल दिहेन। फिरौन कहेस, “हम इस्राएल क मनइयन क काहे जाइ दीन्ह? हम ओनका काहे पराइ दीन्ह? अब हमार गुलाम हमरे हाथे स निकारि चुका अहँइ।”

6ऐह बरे फिरौन आपन जुद्ध क रथे क तइयार किहेस अउ आपन फउज क संग लइ लिहस। 7फिरौन आपन मनइयन में स छः सौ सबन ते बढिया मनइयन अउ आपन सबहीं रथे क संग लिहस। हर एक रथ में एक एक अधिकारी रहेन। 8इस्राएल क मनइयन जीत क खुसी में आपन औजारन क ऊपर कइँती उठावत जात रहेन मुला यहोवा मिस्त्र क राजा फिरौन क हिम्मती बनाएस। अउर फिरौन इस्राएल क मनइयन क खदेरइ लाग।

9मिस्त्र क फउजे क लगे घोड़सवार सिपाहीयन अउ रथन रहेन। उ पचे इस्राएल क मनइयन क पीछा किहेस अउ उ टेमें प जब उ पचे लाल समुद्र क निकट बाल सपोन क पूरब पीहाहीरोत में डेरा डाए रहेन, ओनका धइ लिहन।

10इस्राएल क मनइयन फिरौन अउ ओकरी फउज क अपनी कइँती आवत लखेन तउ उ पचे बुरी तरह डेराइ गएन। उ पचे मदद बरे यहोवा क गोहार लगाएन। 11उ पचे मूसा स कहेन, “का मिस्त्र में पर्याप्त कबर नाहीं रहिन? तू हम पचन्क मिस्त्र स बाहेर काहे लिआया? तू हम पचन्क मरइ बरे इ रेगिस्ताने में काहे लिआया? 12हम पचे तोहसे कहे रहेन कि अइसा ही होइ। मिस्त्र में हम पचे कहे रहेन, ‘कृपा कइके हम पचन्क कस्ट जिन द्या। हम पचन्क मूसा हिँयँइ ठहरइ बरे अउ मिस्त्री मनइयन क सेवा करइ द्या’ हिआँ आइके रेगिस्तान में मरइ स नीक इ होत कि हम पचे हुवाँइ मिस्त्री मनइयन क गुलाम बनिके रहित।”

13मुला मूसा जवाब दिहेस, “डेराअ जिन। पराअ जिन, अबहिं रूकि जा अउ लखा कि आज तू पचन्क यहोवा कइसे बचावत हीं। आज क पाछे तू पचे इन मिस्त्री मनइयन क कबहुँ नाहीं निहरब्या। 14तू पचन्क सान्त रहइ के अलावा

अउर कछू नाहीं करइ क अहइ। यहोवा तोहरे बरे लड़तइ रइहीं।”

15तबहिं यहोवा मूसा स कहेस, “तू पचे अब भी मोरे लगे काहे चीखत ह! इस्त्राएल क मनइयन क अगवा बड़इ क हुकुम द्या। 16आपन छड़ी क लाल सागरे क ऊपर उठावा अउ लाल सागर फाटि जाइ। तब इस्त्राएली मनइयन झुरान भुइयौं स समुदर क पार कइ सकिहीं। 17मई मिस्त्री मनइयन क जिद्दी बनायउँ ह। इ बरे उ सबइ तोहार पीछा करहीं। मुला मई देखाउब कि मई फिरौन, ओकर सबहिं घोड़ सवार अउ रथन स जिआदा बरिआर हउँ। 18तबबइ मिस्त्री बूझि जइहीं कि मई यहोवा हउँ। जब मई फिरौन, ओकर घोड़सवार अउ रथे क हराउब तउ मोर महिमा क परगट कीन्ह जाब्या।”

### यहोवा मिस्त्री फउज क हरावत ह

19उहइ समइया यहोवा क सरगदूत इस्त्राएली मनइयन क पाछे गवा। यहोवा क सरगदूत अक्सर लोगन क अगवा रहा अउ ओनका अगुआइ करत रहा। एँह बरे लम्बा बदरे क खंभा लोगन क अगवा स टरि गवा अउ पाछे आइ गवा। 20इ तरह बादर मिस्त्री मनइयन अउ इस्त्राएलियन क बीच आइ क खड़ा होइ गवा। इस्त्राएलियन बरे इ उँजिर रहा मुला मिस्त्री मनइयन बरे अँधियार। एँह बरे मिस्त्र क मनइयन उ राति में इस्त्राएलियन क नगिचे नाहीं आइ सकेन।

21मूसा आपन बाँह लाल सागर प उठाएस। अउ यहोवा पूरब स बहोत तेज हवा चलाइ दिहस। हवा राति भइ चलत रही। समुदर फाटि पड़ा अउ हवा समुदर क झुरान भुँइया में बदल दिहस। 22इस्त्राएल क मनइयन सूखी धरती प चलिके समुदर पार किहेन। ओनके दौँई अउ बाई कइँती पानी दिवारे क नाई ठाड़ रहा। 23तबहिं फिरौन क सब रथन अउ घोड़सवार समुदर में ओनका पीछा किहेस। 24बहोतइ भिन्सारे यहोवा लम्बा बादर अउ आगी क खम्भा में स मिस्त्र क फउज क लखेस। अउर यहोवा ओन प हमला कइ दिहस अउ ओन पचन्क हराइ दिहस।

25रथे क पहिया भुइयौं में घुसुर गएन। रथ क सम्भारब मुस्किल होइ गवा। मिस्त्री मनइयन चिचियानेन, “हम पचे हिउँ स निकरि चली। यहोवा हम पचन्क खिलाफ जूझत अहइँ। यहोवा इस्त्राएलियन बरे लड़त बाटेन।”

26तबहिं यहोवा मूसा स कहेस, “आपन हाथ क समुदर प उठावा। फिन समुदर क पानी मिस्त्री रथन अउ घोड़सवारन प गिरी अउर उ पचन्क बोरि देइ।”

27एँह बरे दिन निकरइ स ठीक पहिले मूसा आपन हाथ समुदर प उठाएस अउ पानी आपन ठीक तह प वापिस चला गवा। मिस्त्री मनइयन पराइ क जतन करत रहेन। मुला यहोवा मिस्त्री मनइयन क समुदर में बहाइके बोर दिहस। 28पानी आपन ठीक तह ताई लौटि आवा अउ रथन अउ घोड़सवारन क ओढ़ लिहस। फिरौन क समूचइ फउज जउन इस्त्राएलियन मनइयन क पाछा करत रहिन, बूड़िके नसाय गइन। ओनमाँ स कउनो नाहीं जिअत रहा।

29मुला इस्त्राएल क मनइयन झुरान भुइयौं प चलिके समुदर पार किहेन। ओनके दाहिन अउ बाएँ कइँती पानी

दिवारे क नाई ठाड़ रहा। 30एँह बरे उ दिन यहोवा इस्त्राएल क मनइयन क मिस्त्री मनइयन स बचाइ लिहस। बाद में इस्त्राएलियन मिस्त्री मनइयन क लहासे क लाल सागर क किनारे निहारेन 31इस्त्राएलियन यहोवा क बड़की सक्ती क लखेन जब उ मिस्त्री मनइयन क हराइ दिहन। एँह बरे लोगन यहोवा क मान किहेन। अउर उ पचे यहोवा अउ ओनके सेवक मूसा प पतियानेन।

### मूसा क गीत

15 तब मूसा अउ इस्त्राएल क मनइयन यहोवा बरे इ गीत गावइ लागेन:

“मई यहोवा बरे गीत गाउब काहेकि उ बड़का कारनामा किहेस ह। उ घोड़ा अउ सवारन क सगरे में बहाइ दिहेस ह। 2यहोवा ही मोर सक्ती अहइ। उ मोका बचावत ह अउर मई गावत हउँ गीत ओनकी बड़कई क।\* मोर परमेस्सर यहोवा अहइ अउ मई ओनकइ बड़कई करत हउँ। यहोवा मोरे पुरखन क परमेस्सर अहइ अउर मई ओनकइ मान करत हउँ।

3यहोवा बड़का जोधा अहइ ओकर नाउँ यहोवा अहइ।

4यहोवा फिरौन क रथ अउ फउजिन क सगरे में बहाइ दिहस। फिरौन क उत्तिम अफसरन लाल सगरे में बूड़ि गएन।

5गहिर पानी ओनका ढाँकि लिहस। उ पचे चट्टाने क नाई गहिर पानी में डूबेन।

6आप क दाहिन बाँह गजब क सक्ती स भरी अहइ। यहोवा आप क दाहिन बाँह दुस्मनन क छिटकाइ बिटकाइ दिहस।

7आप आपन सक्ती अउ बड़की परताप म नसाइ दिहा ओन पचेन क जउन खिलाफ खड़ा होइ गएन। आपक किरोध ओनका उ तरह नास कइ दिहस जइसे आगी तिनका क बारि डवत ह।

8आप आपन किरोध में जउन तेज हवा क चलाया उ जले क उँचेके उछारि दिहेस। उ जोर स बहत पानी पोढ़ दिवार बनि गवा। समुदर आपन गहिर स गहिर तले तक ठोस होइ गवा।

9“दुस्मन कहेस, ‘मई ओनका खदेरब अउ धइ लेब। मई ओनकइ धन दौलत लइ लेब। मई आपन तरवारि क भांजब अउ ओनकइ हर एक चीज छीन लेब। मई आपन खातिर सब कछू लइ लेब।’

10मुला आप ओनपइ फूँकि दिहन अउ सगरे स ओन पचन्क ढाँकि दिहा उ पचे गहिर सागर में सीसा क नाई बूड़ि गएन।

11“का कउनो देवता यहोवा क समान अहइ? नाहीं, आप क बराबरी क कउनो देवता नाहीं, तू आपन पवित्तर होइ मैं अजूबा अहा तोहरे में अचरजवाली सक्ती बाटइ आप अजूबा चमत्कार करत हीं।

12आप आपन दाहिन हाथ क पसारेस अउर धरती ओनका निगल लिहेस।

यहोवा ... बड़कई क सब्द क अरथ अहइ: “इ मोर सक्ती अउ अस्तुति अउर उ मोर मुक्ति बनत हीं।”

13 आप मेहरबानी कइके लोगन क लइ चलई जेका आप बचाइन ह। आप आपन सकती स इन लोगन क आपन पवित्तर अउ सुहावना भुईया मँ लइ जाई।

14 दूसर देस जब इ कथा क सुनिहीं अउर उ सबइ डेराइ जइहीं। पलिस्तीन क मनई डर स कँपिहीं।

15 तबहिँ एदोम क नेतन डर स कँपिहीं मोआब क नेतन डर स कँपिहीं, कनान क मनई आपन हिम्मत छोड़ि देइहीं।

16 ओनमों डर समाइ जाइ जबहिँ उ पचे तोहार सकती देखिहीं। इ सबइ चट्टाने क नाई सान्त रइहीं जब तलक यहोवा क लोग निकरि न जाई, जब तलक उ लोग निकरि न जाई जेका आप बनाइन ह।

17 यहोवा तू आपन पहाड़े ताई आपन लोगन क लइ जा। ओनका उ जगहिया मँ रहइ द्या जेका तू आपन सिंहासन बरे बनाएस ह, तोहार आपन यहोवा क मन्दिर क बगलमँ, जेका तू आपन हथवा स बनाएस ह।

18 यहोवा हमेसा हमेसा राज्ज करत रइहीं।”

19 हँ इ फुरे अइसा भवा। फिरौन क घोड़ा, सवार अउ रथ समुदर मँ चला गएन। यहोवा ओनके ऊपर समुदर क पानी लइ आइ दिहस। मुला इस्त्राएल क मनइयन झुरान धरती प चलिके समुदर पार कइ लिहन।

20 तबइ हारून क बहिन नबिया मिरियम एक ठु ढपली लिहस। मिरियम अउ दूसर मेहररूअन नाचइ गावइ लागीं। मिरियम क गवनिया क बोल रहा:

21 “यहोवा बरे गावा। काहेकी उ बड़वार काम किहेस ह। उठाइके बहाइ दिहस घोड़ा अउ सवारे क सगरे क बीच मँ...”

22 मूसा इस्त्राएल क मनइयन क लाल सागर स सूर रेगिस्तान लइ जात रहा। लोग तीन दिना तलक रेगिस्तान मँ जात्रा करत रहेन। उ पचे तनिकउ पानी नाहीं पाइ सकेन। 23 तीन दिना क पाछे मनइयन मारा आएन। मारा मँ पानी रहा। पानी ऐतना करूआ रहा कि लोग पिउ नाहीं सकत रहेन। (इहइ कारण रहा कि ठउरे क नाउँ मारा पड़ि गवा।)

24 मनइयन मूसा क ओराहना दिहन। मनइयन कहि बइठेन, “अब हम पचे का पिई?”

25 मूसा यहोवा क दोहाई दिहस। ऐह बरे यहोवा ओका एक बृच्छ देखाएस। मूसा बृच्छे क पानी मँ नाएस। जब उ अइसा किहस, पानी बढ़िया पिअइ क जोगग होइ गवा।

उ ठउरे प यहोवा लोगन क परखेन अउ ओनका एक नेमँ दिहन। यहोवा लोगन क बिस्सास क भी जाँच किहस।

26 यहोवा कहेस, “तू पचन्क आपन परमेस्सर यहोवा क हुकुम जरूर मानइ चाही। तू सबन्क उहइ करइ चाही जेको उ नीक कहत हीं। जदि तू पचे यहोवा क हुकुम अउ नेमँ क मनब्या तउ तू पचे मिस्त्री मनइयन क नाई बेमार जिन होब्या। मई तोहार यहोवा तू पचन्क कउनो अइसी बेरामी नाहीं देब जइसे मई मिस्त्री मनइयन क दीन्ह ह। मई यहोवा हउँ, मई उहइ हउँ जउन तोहका बेमारी स नीक बनवत हउँ।”

27 तबहिँ लोगन एलिम तलक क जात्रा किहेन। एलीम मँ पानी क बारह झरना रहेन अउ हुवाँ सत्तर खजूरे क पेड़ रहेन। ऐह बरे लोगन हुवाँ पानी क नगिचे डेरा डइ लिहेन।

इस्त्राएली परमेस्सर स मन्ना अउ गोस पावत ह

16 तबहिँ लोगन एलीम स चलेन अउ सीनै रेगिस्तान मँ पहुँचि गएन। इ ठउर एलीम अउ सीनै क बीच रहा। उ पचे इ ठउर प दुसरे महीना क पद्रहवाँ दिन मिस्त्र छोड़ दिहे क पाछे पहुँचेन। 2 तब इस्त्राएल क मनइयन फिन ओरहना देब सुरू किहेन। उ सबइ मूसा अउ हारून स रेगिस्तान मँ ओराहना दिहेन। 3 मनइयन मूसा अउ हारून स कहेन, “इ हमरे बरे नीक होतेन कि यहोवा हम पचन्क मिस्त्र मँ मारि डाए होत। मिस्त्र मँ हम पचन्क लगे खइया क बहोत रहा। हम पचन क लगे उ सब खइया क रहा जेकर हमका जरूरत रही। मुला अब तू हम सबन्क रेगिस्तान मँ लइ आया ह। हम सब हिआँ भुखिया स मरि जाब।”

4 तब यहोवा मूसा स कहेस, “मई अकासे स खइया क गिराउब। इ भोजन तोहरे बरे खाइ क होइ। हर एक दिन लोग बाहेर जाई अउ उ दिन खाइ क जरूरत बरे भोजन बटोरि लेई। मई ऐह बरे करब कि मई लखिहउँ कि का लोग उहइ करिहीं जउन मई करइ क कहब। 5 हर एक दिन लोग बरे ढेर क खइया क बटोरि लेई। मुला सुकुरवार क जब खइया तइयार करइ लागई तउ लखई कि उ पचे दुइ दिन क भोजन रखि लेई। 6 ऐह बरे मूसा अउ हारून इस्त्राएल क मनइयन स कहेन, “आज ही रात तू पचे यहोवा क सकती लखब्या। तू पचे जानब्या कि इ उहइ यहोवा अहइ जउन तू पचन्क मिस्त्र देस स बचाइके बाहेर निकारेस। 7 भिन्सारे तू पचे यहोवा क महिमा निहरब्या। तू पचे यहोवा स सिकाइत किहा ह। उ तोहार बात सुनेस ह। तू पचे हम सबन्क ओराहना देत अहा। इ होइ सकत ह कि हम पचे अब कछू अराम कइ सकित ह।”

8 अउर मूसा कहेस, “तू पचे सिकाइत किहा ह अउर यहोवा तू पचन्क सिकाइत सुनि लिहेन ह। ऐह बरे रात क यहोवा तू पचन्क गोस देईहीं। अउ हर भिन्सारे तू पचे उ सारा रोटी पउब्या, जेका तोहका जरूरत बा। तू पचे मोसे अउ हारून स ओराहना करत रहत बाट्या। मुला अब हम पचे तनिक अराम करब। याद राखा तू पचे मोरे अउ हारून क खिलाफ सिकाइत नाहीं करत बाट्या। तू पचे यहोवा क खिलाफ सिकायत करत बाट्या।”

9 तबहिँ मूसा हारून स कहेस, “इस्त्राएल क मनइयन क बोलावा अउ ओनसे कहा, ‘यहोवा क समन्वा जमा होइ जा काहेकि उ तोहार ओराहना सुनेस ह।’”

10 हारून इस्त्राएल क सबहीं मनइयन स बात किहेस। उ पचे एक ठउरे प जमा भइ रहेन। जबहिँ हारून बतियात रहा तबहिँ लोग घूमि गएन अउ रेगिस्ताने कइँती लखेन। अउर उ पचे यहोवा क महिमा क मँ बदरे मँ परगट होत निहारेन।

11 यहोवा मूसा स कहेस, 12 “मई इस्त्राएल क मनइयन क ओराहना सुनेउँ ह। ऐह बरे ओनसे मोर बतियन क कहि द्या, ‘आजु गउ धूरि मँ तू पचे गोस खाब्या। अउ भियान भोर होत ही तू पचे पेटवा भरिके रोटी खाब्या। तबहिँ तू पचे जनब्या कि मई यहोवा तोहार परमेस्सर हउँ।’”

13 उ रात बटेर चिरइया डेरा क चारिहुँ कइँती आइ गइन। बटेरन डेरा क ठाँक लिहस। भोर मँ डेरा क नगिचे ओस गिरी रही। 14 सूरज क निकरि आए प ओस टेघरत रही।

मुला पाला क तहे क नाई भुइयों प कछू रहि जात रहा। 15इस्त्राएल क मनइयन एका लखेन अउ आपुस में करइ लागेन, “इ का बा?” \* उ पचे इ सवाल एँह बरे पूछेन कि उ पचे इ नाहीं जानत रहेन इ कउन चीजि अहइ। एँह बरे मूसा ओनसे कहेस, “इ खइया क अहइ जेका यहोवा तोहका खाइके देत अहइ। 16यहोवा कहत अहइ, ‘हर व्यक्ति ओतैना बटोरइ जेतना ओका जरूरत होइ। तू लोगन में स आपन परिवारे क हर एक सदस्य क खातिर एक ओमेर बटोरि लेइ।”

17तउ इस्त्राएल क मनइयन अइसा ही किहेन। हर मनई खइया क बटोरेस। कछू मिला दूसर मनइयन स जिआदा बटोरि लिहने। 18उ मनइयन आपन आपन परिवारे क खइया क दिहने। जब खइया क नाप जोख भवा तउ हर मनई बरे हमेसा ढेर क रहा, मुला कबहूँ भी जरूरत स जिआदा नाहीं भवा। हम मनई ठीक अपने खातिर अउ आपन परिवारे बरे ढेर क बटोरेस।

19मूसा ओन पचेन स कहेस, “अगवा दिन बरे खइया क जिन बचावा।” 20मुला कछू लोग मूसा क बतिया नाहीं मानेन। कछू लोग आपन खइया क बचाइ लिहने जेका उ सबे अगवा दिन खाइ सकेन। मुला जउन खइया क बचाइ लिहने ओहमों किरवा पड़ि गएन अउर उ बसाइ होइ गएन। मूसा उ लोगन प कोहाइ गएन जउन इ किहे रहेन।

21हर भिन्सारे लोगन खइया क बटोरत रहेन। हर मनई ओतैना ही बटोरत रहा जेतैना उ खाइ सकत रहा। किन्तु जब धुपिया तेज होत रही तउ खइया गलि जात रहा।

22सुकुरवारे क मनइयन दुगुना खइया क बटेरेन। उ पचे दुई ओमेर हर मनई बरे बटोरेन। एँह बरे लोगन क मुखिया आएन अउर उ सबइ इ बात मूसा स कहेन।

23मूसा ओनसे कहेस, “इ वइसेन भवा जइसा यहोवा कहे रहेन। काहेकि भियान यहोवा क परम अराम क पवित्तर दिन परमेस्सर क मान देइ बरे अहइ। तू पचे आजु बरे जेतैना खइया क तोहका चाही तू बनइ सकत ह। मुला बाकी खइया क काल्ह भियान बरे भी बचावा।”

24एँह बरे लोगन अगवा दिन बरे बाकी खइया क बचाइ लिहने। अउर कउनो खइया किरवा पड़ि क खराब नाहीं भवा। अउर ओहमों स बसाइ भी नाहीं आवत रहा।

25सनीचरे क मूसा मनइयन स कहेस, “जउन कछू तू बिते क दिन में बटोरा रहेन तोहका उहइ आजु खाइ चाही। आजु अराम का दिन सबत यहोवा क सम्मान दइ बरे अहइ। आजु खेत में खइया पाइ नाहीं चाही। 26तू पचन क हफ्ता क छः दिना में ही खइया बटोर इ चाही। मुला सतवों दिन अराम क दिन अहइ एँह बरे भुइयों प कउनो खास खइया नाही होइ।”

27सनीचरे क कछू मिला तनिक खइया बटोरइ बरे गएन, मुला उ पचे हुवाँ रचिकउ खइया क नाहीं पाइ सकेन। 28तबहिँ यहोवा मूसा स कहेस, “तोहार लोग मोर आदेसन अउर उपदेसन क मानइ स कबहुँ तलक इनकार करत रहब। 29लखा यहोवा सबत क दिन तोहरे अराम खातिर

बनएस ह। एँह बरे सुकुरवार क यहोवा दुइ दिना बरे ढेर क खइया के तोहका देइहीं। एँह बरे सबत क दिना क हर कउनो क अराम करइ चाही। तू आपन जगह प रूकि रहा कउनो जगह बाहर नाहीं जा।” 30एँह बरे लोग सबत क दिन अराम किहेन।

31इस्त्राएली लोग इ खास खइया क “मन्ना” कहब सुरू दिहेन। मन्ना नान्हक उज्जर धनिया क बिआ क नाई रहा अउ एकर स्वाद सहद स बनवा पपड़े क तरह रहा। 32तबहिँ मूसा कहेस, “यहोवा हुकुम दिहेस हः ‘इ खइया क एक ओमेर अपने सन्तानन बरे बचावा। तबबइ उ पचे खइया क लखि सकिहीं जेका मई तू पचन क रेगिस्ताने में तबहिँ दिहे रहेउँ जबहिँ मई तू पचन क मिस्त्र स निकारे रहेउँ।”

33एँह बरे मूसा हारून स कहेस, “एक घँड़ा लइ आवा अउ एका एक ओमेर मन्ना स भरि द्या। अउ इ मन्ना क भरि के यहोवा क अगवा धइ द्या अउ आपन सन्तानन बरे बचावा।” 34(यहोवा क हुकुम क अनुसार हारून मन्ना क कूँड़ा क सुरच्छा बरे करार क समन्वा धरेस।) 35इस्त्राएल क लोगन चालीस बरिस तलक मन्ना खाएन। उ पचे मन्ना तब तलक मन्ना खात रहेन जब तलक उ पचे उ भुइँया में नाहीं आइ गएन जहाँ ओनका बसइ क रहा। उ पचे ओका तब तलक खात रहेन जब ताई उ पचे कनान देस क चौहद्दी तक नाहीं पहुँचेन। 36(उ पचे मन्ना क नापइ बरे जउन तउल क बइपरत रहेन, उ आँमर रहा जउन लगभग एक ओमेर क बराबर रहा।)

### चट्टन में पनी

17 इस्त्राएल क सबहिँ मनइयन मिस्त्र क सीन रेगिस्तान स साथ-साथ जात्रा किहने। उ पचे जइसा यहोवा हुकुम देत रहेन वइसा एक ठउर स दूसर ठउरे ताई जात्रा करत रहेन। मनइयन रपीदीम क जात्रा किहेन अउ हुँवँ डेरा डाएन। हुवाँ ओनका पिअइ बरे पानी न रहा। 2एँह बरे उ पचे मूसा क खिलाफ होइ गएन अउ ओसे तहतुकु करइ लागेन। उ पचे माँगैन, “हमका पिअइ क पानी द्या।”

मुला मूसा ओनसे कहेस, “तू पचे मोरे खिलाफ काहे होत बाट्या? तू पचे यहोवा क परीच्छा काहे लेत बाट्या?”

3मुला लोग पिआसा रहेन अउ पानी चाहत रहेन। एँह बरे उ पचे मूसा स ओराहना बार बार करत रहेन। लोग कहेन, “हम पचन क मिस्त्र स बाहेर काहे लइ आया? का तू हमका एँह बरे लइ आया ह कि हम हमार गदेलन अउ गोरूअन बे पानी क मरि जाईँ?”

4एँह बरे मूसा यहोवा क गोहार लगाएस, “मई इन लोगन बरे का करउँ? इ पचे मोका मार डवइ क तइयार अहईँ?”

5यहोवा मूसा स कहेस, “लोगन क लगे जा। अउ इस्त्राएल क कछू नेतन क आपन संग में लइ ल्या। आपन छड़ी क आपन साथे लइ जा। इ उहइ लाठी अहइ जेका तू तबहिँ बइपरे रह्या जबहिँ नील नदी प एका पटके रह्या। 6मई तोहरे अगवा होरेब अर्थात् सीने पर्वत प एक चट्टाने प ठाइ रहब। लाठी क चट्टाने प पटका अउ एहसे पानी बाहेर आइ जाइ। तबहिँ लोग पी सकत हीं।”

**इ का बा?** हिब्रू भाखा में इ सवाल “मन्ना” क तरह बोला जात ह।

मूसा उहड़ किहेस अउ इस्त्राएल क नेतेन लखेन। 7मूसा इ ठउरे क नाउँ मरीवा अउ मस्सा रखेस काहेकि इ उहड़ जगहिया अहड़ जहाँ इस्त्राएल क मनइयन ओनके खिलाफ होइ गएन अउ यहोवा क परीच्छा लिहेन इ कहत भवा, “का यहोवा हम लोगन का संग अहड़ या नाहीं?”

8अमालेकी लोगन रपीदीम आपन अउ इस्त्राएल क लोगन क खिलाफ लड़ेन। 9एँह बरे मूसा यहोसू स कहेस, “कछू मनइयन क चुना अउ भियान अमालेकियन स जाइ के लड़ा। मई पर्वते क चोटी प ठाड़ होइके तू पचन क निहारब। मई परमेस्सर क छड़ी क धरे रहब जउन उ मोका दिहन ह।”

10यहोसू मूसा क हुकुम मानेस अउ भियान भए प अमालेकियन स लड़इ गवा। उ टेमें प मूसा, हारून अउ हुर पहाड़े क चोटी प गएन। 11जब कबहूँ मूसा आपन हथवा क हवा में उठावत तउ इस्त्राएल क मनइयन जुद्ध जीत जातेन। मुला जबहिँ मूसा आपन हथवा क नीचे कइँती करेस तउ इस्त्राएल क मनइयन हारइ लागेन।

12कछू समयया क पाछे मूसा क बाँह थक गइन। उ पचे मूसा क जतन क आसान करइ बरे एक ठू रास्ता निकारेन जब उ आपन बाँह ऊपर उठाइके राखे रहा। एँह बरे उ पचे एक बड़की चट्टाने मूसा क तरखाले बड़ठइ बरे धरेन। हारून अउ हुर मूसा क बाँही क हवा में धरे राखेन। हारून मूसा क एक कइँती रहा अउर हूर दुसरी कइँती। उ पचे ओकरे हथवा क ऊपर सूरज दूबई तलक धरे रहेन। 13एँह बरे यहोसू अउ ओकर फउजी सिपाही अमालेकियन क जुद्ध में हराइ दिहन।

14तब यहोवा मूसा स कहेस, “इ जुद्ध क बारे में लिखा। इ जुद्ध क घटना क एक तु किताबे में लिखा। ताकि लोग याद करइँ कि हिआँ का भवा ह। अउर यहोसू क यकीन दिला कि मई अमालेकियन क संसार स समूचइ नास कइ देब।”

15तबहिँ मूसा एक तु वेदी बनएस। मूसा वेदी क नाउँ, “यहोवा मोर झण्डा बा” धरेस। 16मूसा कहेस, “मई यहोवा क सिंहासने कइँती आपन हाथ फइलावा ह। एँह बरे यहोवा अमालेकि मनइयन स लड़ा ह, जइसा उ हमेसा किहेस ह।”

### यित्रो मूसा क नगिचे आवत ह।

**18** मूसा क ससुर यित्रो मिदियन में याजक रहा। यहोवा मूसा अउ इस्त्राएल क मनइयन क अनेक तरह स जउन मदद किहे रहा ओकरे बारे में यित्रो सुनेस। यित्रो इस्त्राएल क मनइयन क यहोवा क जरिए बाहेर लइ जाइ क बारे में सुने रहा। 2एँह बरे यित्रो मूसा क लगे उ समइ गवा, जब उ परमेस्सर क पर्वत क नगिचे डेर डार रहा। उ मूसा क पत्नी बसही सिप्पोरा क आपन संग लइ आवा। सिप्पोरा मूसा क संग नाहीं रही काहेकी मूसा ओका आपन बाप क घरे में पठाए रहा। 3यित्रो मूसा क दुइनउँ बेटवन क भी आपन संग लइ आवा। पहिलौटी बेटहना क नाउँ गोर्सान राखे रहा, काहेकि जब उ पड़व भवा, मूसा कहेस, “मई बिदेस में अजनबी हउँ।” 4दुसरे बेटहना क नाउँ एलिअजर राखेस काहेकि जब उ पड़व भवा तउ मूसा कहेस, “मोरे बाप क

परमेस्सर मोर मदद किहेस ह अउ मिस्त्र क राजा क तरवार स मोका बचाएस ह।” 5एँह बरे यित्रो मूसा क लगे तब गवा जब उ परमेस्सर क पर्वत सीनै पर्वत क निअरे रेगिस्ताने में डेर डार रहा। मूसा क मेहरारू अउ ओकर दुइ बेटवा यित्रो क लगे रहेन।

6यित्रो मूसा क सँदिसा पठाएस। यित्रो कहेस, “मई तोहार ससुर यित्रो अहउँ। अउर मई तोहार मेहरारू अउ ओकरे दुइनउँ बेटवन क तोहरे लगे लइ आवत हउँ।”

7एँह बरे अपने ससुर स मिलइ गवा। मूसा ओकरे समन्वा निहुग अउ ओका चूमेस। दुइनउँ मनइयन एक दुसरे स हाल चाल पूछेन। तब उ पचे खेमा में गएन। 8मूसा आपन ससुर यित्रो क हर बात बताएस जउन यहोवा इस्त्राएल क मनइयन बरे किहे रहा। मूसा ओन सारी चीजन क बारे में बताएस जउन यहोवा फिरौन अउर मिस्त्र क लोगन क खिलाफ किहे रहा। अउर मूसा आपन ससुर क बताइ दिहस कि कउने तरह यहोवा इस्त्राएलियन क बचाएस जब उ पचे कस्ट में रहेन।

9यित्रो उ समइया बहोत खुस भवा जब उ यहोवा क जरिए इस्त्राएल क मनइयन बरे सबहिँ नीक बातन क सुनेस। यित्रो एँह बरे खुस रहा कि यहोवा इस्त्राएल क मनइयन क मिस्त्री मनइयन स अजाद कइ दिहेस। 10यित्रो कहेस:

“यहोवा क गुन गावा! उ तोहका मिस्त्र क मनइयन क अजाद कराएस। यहोवा तू पचन क फिरौन स बचाएस ह।

11अब मई जानत हउँ कि यहोवा सबहिँ देवतन स बड़वार अहड़। उ पचे बिचारेन उ सबइ नियन्तरण में अहड़ मुला निहार यहोवा का किहेस ह।”

12तबहिँ यित्रो होम बलि अउर दूसर बलि परमेस्सर क मान दइ बरे भेंट किहस। तबहिँ हारून अउ इस्त्राएल क सबहिँ नेतन परमेस्सर क समन्वा मूसा क ससुर यित्रो क संग खइया क खाएस।

13दुसरे दिना मूसा लोगन क परखइ बरे बड़ठा। हुँवा लोगन क गिनती जियादा रही। इ कारण लोगन मूसा क समन्वा दिन भइ ठाड़ रहेन।

14यित्रो मूसा क लोगन क परखते भए लखेस। उ पूछेस, “तू इ काहे करत बाट्या? का सिरिफ तू ही एक कानून क निआवधीस अहा? अउर मनइयन सिरिफ तोहरे लगे ही सारे दिन भइ काहे आवत हीं?”

15तबहिँ मूसा आपन ससुर स कहेस, “मनइयन मोरे लगे आवत हीं अउर आपन समस्या क बारे में मोसे यहोवा क निर्णय क बारे में पूछत हीं। 16जदि ओन पचन में कउनो वाद-विवाद होत ह तउ उ पचे मोरे लगे आवत हीं। मई निर्णय देत हउँ कि कउन निआव प अहड़। इ तरह मई यहोवा क नेमन अउ ओकरे उपदेसन क बारे में मनइयन क बतावत हउँ।”

17मुला मूसा क ससुर ओसे कहेस, “इ नीक तरीका काम करइ क नाहीं अहड़। 18तोहरे अकेल्ले बरे इ काम बहोत जिआव अहड़। एहसे तू थक जात ह अउर इ सबइ लोग भी थक जात ही। तू इ काम क खुद नाहीं कइ सकत्या। 19अब मोरउ सुना। मई तोहका कछू सुझाव देत हउँ। मई तोहका बताव कि तोहका का करइ चाही।

मोर पराथना बा कि परमेस्सर तोहार साथ देइ हीं। तोहका लोगन क वाद-विवाद सुनब जारी रखइ चाही। तोहका इ तहतुकन अउ समस्या क परमेस्सर क समन्वा रखइ चाही। 20तोहका परमेस्सर क नेमन अउ विधि का उपदेसन लोगन क देइ चाही। लोगन क चिताउनी द्या कि उ पचे परमेस्सर क नेम न तोड़ई। लोगन क जानकार बना उ पचन्क कइसे जिअइ चाही। ओनका बतावा कि उ पचे का करई। 21मुला तोहका लोगन में स कछू क जज अउ नेता क चुनइ चाही।

“उ नीक मनइयन क चुना जेहें प तू पतिआत ह। उ मनइयन जउन यहोवा क मान करत हीं। उ मनइयन क चुना जउन धने खातिर आपन फइसला न बदल देई। इन चुने मनइयन क लोगन क प्रधान बनवा। एक हजार मनइयन, एक सौ मनइयन, पचास मनइयन, अउर दस मनइयन प भी एक प्रधान होइ क चाही। 22इन ही सासक लोगन्क क मनइयन क निआव करइ द्या। अगर जिआव कउनो गंभीर मामला होइ तउ प्रधान लोग तोहरे लगे आइ सकत हीं। अउ उ पचे दूसर मुकदमा क फैसला खुद कइ सकत हीं। इ तरह उ पचे तोहरे काम में मदद करिहीं अउ इ तोहरे बरे जिआव सहल होइ जाइ। 23जदि तू परमेस्सर क इच्छा स अइसा करत ह तबहिं तू आपन काम करइ बरे जोगग रहब्या। अउ ऐंकरे संग संग सब मनइयन आपन समस्या क पूरी होइ जाए स सांत होइके घरवा जाइ सकिहीं।”

24एँह बरे मूसा उहइ किहेस जइसा यित्री कहे रहा। 25मूसा इस्त्राएल क मनइयन में स नीक मनइयन क चुनेस। मूसा ओन मिला क मनइयन क अगुवा बनएस। हुवाँ एक हजार मनइयन, एक सौ मनइयन, पचास मनइयन, अउर दस मनइयन भी प्रधान रहेन। 26इ प्रधान मनइयन क जज रहेन। मनइयन आपन आपन समस्या क एनके लगे हमेसा लइ आवत रहेन। अउर मूसा क सिरिफ गंभीर मामला निपटावइ क पड़त रहा। 27तनिक समइया पाछे मूसा आपन ससुर यित्री क बिदा किहेस अउ यित्री अपने घरे लौटि गवा।

### इस्त्राएल क संग परमेस्सर क करार

**19** मिस्त्र स आपन जात्रा करइ क तीसरे महीना में इस्त्राएल क मनइयन सीनै रेगिस्तान में पहुँचेन। 2उ पचे रपीदीन स चलिके सीनै रेगिस्तान में आएन। इस्त्राएल क मनइयन रेगिस्ताने में पर्वत क नगिचे डेरा डएन। 3तबहिं मूसा पहाड़े प परमेस्सर क लगे गवा। यहोवा ओसे पर्वत प कहेस, “इ बातन क इस्त्राएल क मनइयन यानी याकूब क बड़का परिवार स कहा। 4तू पचे निहारया ह कि मई आपन दुस्मनन क का कइ सकत हउँ। तू पचे लख्या ह कि मई मिस्त्र क मनइयन क संग का किहेउँ ह अउ इस्त्राएल क लोगन क संग का किहेउँ ह। तू सबइ देख्या ह कि मई तू सबन्क मिस्त्र स बाहरे एक उकाब क नाई निकारा ह अउर हिआँ आपन निचके लइ आवा ह। 5एँह बरे जदि तू मोरे कथन का माना अउर मोरे आदेसन क पालन करा तउ तू पचे मोरे खास लोग होब्या। समूचइ धरती मोर अहइ। मुला मई तोहका आपन खास लोग चुनत अहउँ। 6तू पचे मोरे एक खास रास्ट्र-याजक क समराज होब्या।’ मूसा, जउन

बतियन क मई तोहका बताएउँ ह ओनका इस्त्राएल क मनइयन क जरूर कहि दिहा।”

7एँह बरे मूसा पहाड़े स तरखाले उतरा अउ लोगन क सासकन क बोलाएस। मूसा लोगन क सासकन स इ कहेस जउन कहइ क यहोवा ओका हुकुम दिहे रहेन। 8फुन सबहिं लोग उहइ समइ एक साथ बोलेन, “हम पचे यहोवा क हर आदेसन क मानब जउन यहोवा कहत ह।”

तबहिं मूसा यहोवा क लगे पहाड़े प लौटि आवा। मूसा परमेस्सर स कहेस कि मनइयन ओनके हुकुम क पालन करिहीं। 9अउर यहोवा मूसा स कहेस, “मई घनघोर घटा में तोहरे लगे आउब। मई तोहसे बात करब। सबइ लोग मोका तोहसे बात करत सुनिहीं। मई इ एँह बरे करब जेहसे लोग ओन बातन में सदा पतियइहीं जउन तू ओनसे कहत अहा।”

तब मूसा यहोवा क उ सब बातन क बताएस जउन लोगन ओसे कहेन।

10यहोवा मूसा स कहेस, “आज अउ भियान तू लोगन क खास सभा बरे जरूर तइयार करा। लोगन क आपन ओढ़ना धोइ लेइ चाही। 11अउ तीसरे दिन मोरे बरे तइयार रहइ चाही। तीसरे दिना यहोवा सीनै पहाड़े प आइ, अउर सबहीं लोग यहोवा क निहिरिहीं। 12-13मुला लोगन स तू जरूर कहि दिहा कि उ पचे पहाड़े स दूर ठहरई। एक ठु रेखा खइँच द्या अउ ओनका उ रेखा क पार न होइ द्या। जदि कउनो मनई या गोरू पहाड़े क छुइ तउ ओका जरूर मारि दीन्ह चाही। ओका पथरे या तीर स जरूर मारि डवा जाइ। मुला कउनो क ओका छुअइ नाहीं दीन्ह जाइ। लोगन क बिगुल स लम्बी आवाज निकलइ तलक जोहइ क पड़ी। उहइ समइया ओनका पहाड़े प जाइ दीन्ह जाइ।”

14तउ मूसा पहाड़े स खाले उतरि आवा। उ लोगन क नगिचे गवा अउर ओनका खास बइठक बरे तइयार किहेस। मनइयन आपन ओढ़ना धोएन।

15तब मूसा लोगन स कहेस, “परमेस्सर स मिलइ खातिर तीन दिना में तइयार होइ जा। उ टेम तलक कउनो मनई अउरत क संग सोवइ न चाही।”

16तीसरे दिना क भिन्सारे घनघोर घटा पर्वत प आइ। बिजुरी क कड़कब अउ बदरे क गरजब भवा। इ समइया बिगुल क बाजब ऊँची अवाज में भवा। डेरा क सबहिं लोग ससाइ गएन। 17तब मूसा लोगन क डेरा स बाहरे पहाड़े क तलहटी प परमेस्सर स भेंटइ बरे गवा। 18सीनै पहाड़ धुआँ स ढँकि गवा। पहाड़े स धुआँ अइसा निकरा जइसे भट्टी स निकरत होइ। इ एँह बरे भवा कि यहोवा आगी में पहाड़े प उतरेन। अउर साथ ही समूचा पहाड़ थरथर काँपइ लाग। 19बिगुल क अवाज जोर स जिआवा जोरदार होत गइ। जबहुँ मूसा परमेस्सर स बात किहेस, परमेस्सर बदरे क गरज क नाई ऊँची अवाज में ओका जवाब दिहस।

20इ तरह यहोवा सीनै पहाड़े प उतरा। तबहिं यहोवा मूसा क आपन लगे पहाड़े क चोटी प आवइ बरे कहेस। एँह बरे मूसा पहाड़े प चढ़ि गवा।

21यहोवा मूसा स कहेस, “जा अउर लोगन क चेताउनी दइ द्या कि उ पचे मोका निहारइ बरे मोरे लगे न आवई। जदि उ पचे अइसा करिहीं तउ उ पचे मरि जइहीं। अउर इ

तरह ढेर लोगन क मउत होइ जाइ। 22ओन याजकन स भी कहा जउन मोरे लगे आवा चाहत हीं कि उ पचे इ खास मिलन बरे खुद क तइयार करइँ। जदि उ पचे अइसा नाहीं करतेन तउ मईँ ओनका सजा देब।”

23मूसा यहोवा स कहेस, “मुला लोग पर्वते प नाहीं आइ सकत हीं। आप खुद ही हम का एक रेखा खइँचके पहाड़े क पवित्तर समुझइ अउ ओका पार न करइ बरे मोसे कहे रह्या।”

24यहोवा ओसे कहेस, “लोगन क लगे जा अउ हारून क लइ आवा। ओका आपन संग वापस लइ आवा। मुला याजकन अउ लोगन क मोरे लगे जिन आवइ द्या। जदि उ पचे भी मोरे जिआदा नगिचे अइहीं तउ मईँ ओनका सजा देब।”

25एँह बरे मूसा लोगन क लगे गवा अउ ओनका इ सब बातन बताएस।

### दस आग्यन

**20** तबहिँ परमेस्सर कहेस, 2“मईँ तोहार परमेस्सर यहोवा हउँ। मईँ तोहका मिस्त्र देस स बाहेर लइ आएँ। मईँ तोहका गुलामी स अजाद करावा। एँह बरे तोहका सचमुच इन अदेसन क मानइ चाही।

3“तोहार लगे मोर अलावा अउर कउनो देवतन नाहीं होइ चाही।”

4“तोहका कउनो भी मूर्ति या कउनो भी चीज क कउनो तस्वीर जिन बनवा जउन ऊपर अकासे मँ या खाले भुइयँ प या धरती क तरखाले पानी मँ होइ। 5 कउनो भी तरह क मूर्ति क आराधना जिन करा, अउर न ही ओकर सेवा करा। काहेकी मईँ तोहार यहोवा परमेस्सर हउँ। मईँ ईस्यालु परमेस्सर हउँ। जउन मनईँ मोरे खिलाफ पाप करत ह तउ उ हमार दुस्मन होइ जात ह। मईँ उ मनइयन क सजा देब। अउर मईँ ओनके गदेलन, ओनके नातिन पोतन अउ ओनके पर-नातिन पोतन क भी सजा देब। 6मुला मईँ ओन लोगन प कृपा करब जउन मोसे पिरेम करिहीं अउ मोरे हुकुमन क मनिहीं। मईँ ओनके परिवारे बरे हजारन पीढ़ी तलक कृपा करब।

7“तोहरे परमेस्सर यहोवा क नाउँ क बइपरब तोहका गलत ढंग स नाहीं करइ चाही। जदि कउनो मनईँ यहोवा क नाउँ क प्रयोग गलत ढंग स करत ह तउ उ अपराध करत ह अउ यहोवा ओका बे अपराधे क न मनिहीं। 8“तोहका सबित क दिन क एक खास दिन क रूप मँ मनावइ क याद रखइ चाही। 9हफ्ता मँ तू छ दिन तलक काम कइ सकत ह। 10मुला सातवाँ दिन, सबित क दिन यहोवा तोहरे परमेस्सर क मान देइ बरे अराम क दिन अहइ। एँह बरे उ दिन कउनो व्यक्ति-तू, तोहार बेटवा अउ बिटिया तोहरे नउकर अउ नउकरानी, गोरू अउर तोहरे सहर मँ रहइवाला विदेसी क काम न करिहीं चाही। 11काहेकी यहोवा छः दिना तलक काम किहेस अउ अकास, धरती, सागर अउ ओनके बरे हर

चीज बनएस। अउ सातवाँ दिन यहोवा अराम किहेस। इ तरह यहोवा सबित क दिन क बरदान दिहेस कि ओका अराम क पवित्तर दिन क रूप मँ मनाव जाइ। यहोवा ओका बहोत ही खास दिन बनएस।

12“आपन बाप अउ महतारी क इज्जत करा। इ करा ताकि तू उ धरती प जउन धरती क परमेस्सर तोहका देत अहइ, लम्बी जिन्नगी बिताइ सका। 13“तोहका कउनो व्यक्ति क कतल नाहीं करइ चाही।

14“तोहका जिनाखोरी क पाप न करइ चाही।

15“तोहका चोरी न करइ चाही।

16“तोहका आपन पड़ोसी क खिलाफ झूठी गवाही न देइ चाही।

17“तोहका पड़ोसी क घर हथियावइ क इच्छा न करइ चाही। तू आपन पड़ोसी क मेहरारू, ओकर नउकर अउ नउकरानी, ओकर गोरू अउ ओकरे गदहा क हथियावइ क इच्छा नाहीं करइ क चाही। तोहका दूसर व्यक्ति क चीजक लेइ क इच्छा न करइ चाही।”

### लोगन यहोवा स डेरनेन

18घाटी मँ लोग बदरे क गर्जब अउ पहाड़े प बिजुरी क चमकब निहारेन। उ पचे बिगुल क अवाज सुनेन अउ पहाड़े स धुआँ उठब लखेन। मनइयन डेरनेन अउ भय स काँपि गएन। उ पचे पर्वते स दूर ठाड़ रहेन अउ निहारत रहेन। 19तब लोगन मूसा स कहेन, “जदि तू हम पचन स कछू कहइ चहब्या तउ हम पचे सुनब। मुला परमेस्सर क हम पचन स बात जिन करइ द्या। जदि इ होइ तउ हम पचे मरि जाब।”

20तब मूसा लोगन स कहेस, “जिन डेरअ। यहोवा तोहार परिच्छा लइ बरे आएस ह। उ चाहत ह कि तू पचे ओका मान द्या जेहसे तू पचे पाप जिन कइ सका।”

21लोग उ समइ उठिके पर्वते स दूर चला गएन जबहिँ मूसा उ घना बदरे मँ गवा जहाँ यहोवा रहेन। 22तबहिँ यहोवा मूसा स इस्त्राएलियन क कहइ बरे इ बातन क कहेस: “तू पचे निहारया ह कि मईँ तोहसे अकास स बात कीन्ह ह। 23एँह बरे तू पचे मोरी बराबरी करइ बरे सोना अउ चाँदी क मूर्ति जिन बनवा। तोहका झूठे देवतन क मूर्तियन न बनवइ चाही।

24“मोरे बरे एक खास वेदी बनवा। इ वेदी बनवइ बरे मिट्टी बइपरा। इ वेदी प मोका बलि क रूप मँ होम बलि अउ सान्ति भेंट चढ़ाइ द्या। इ काम बरे आपन भेड़ अउ गोरू क इस्तेमाल करा। एँका उ सबहिँ ठउरे प करा जहाँ मईँ आपन क याद करइ बरे कहउँ। तबहिँ मईँ आउब अउ तोहका आसीबाद देब। 25जदि तू लोग वेदि क बनवइ बरे चट्टान क बइपरत ह तउ उ पाथर क न बइपरइँ जउने पाथर क लोह क औजार स काटा गवा ह। जदि तू अइसा करत ह तउ मईँ उ वेदी क अर्गीकार न करब। 26तू पचे वेदी प पहुँचइ बरे सीढ़ी जिन बनया। जदि सीढ़ी होइ तउ लोग ऊपर वेदी क लखिहीं तउ उ पचे तोहरे ओढ़ना क नीचे स तोहका निहरीहीं।”

## दूसर कानून अउ हुकुम

**21** तब परमेस्सर मूसा स कहेस, “इ सबइ नेम अहइ जेको तू लोगन क देब्या:

2“जदि तू एक हिब्रू गुलाम खरीदत ह तउ उ तोहार सेवा सिरिफ छ बरिस करी। छ बरिस बाद उ अजाद होइ अउर ओका आजाद होइ बरे कछू नाहीं देइ क होइ। 3जदि उ मनई क बियाह तोहरे गुलामी स पहिले नाहीं भवा अहइ, तब जब उ अजाद होइ क टेमें में अकेले ही चला जाइ। मुला जदि उ तोहार गुलाम होइ स पहिले बियाहा होइ तउ उ आपन पत्नी क आपन संग लइ जाइ। 4जदि गुलाम बियाहा नाहीं होत तउ ओकर मालिक ओका मेहरारू दियॉइ सकत ह। जदि उ पत्नी, बेटवा अउर बिटिया क जन्मी, तउ उ पत्नी अउर ओकर बेटवा अउ बिटिया ओकर मालिक क होइहीं। आपन सेवा क समइ काटे क पाछे उ गुलाम अजाद कीन्ह जाइ।

5“मुला इ होइ सकत ह कि गुलाम इ निहचय करइ कि उ आपन मालिक क संग रहइ चाहत ह। तब ओका इ कहइ क पड़ी, ‘मई आपन सुआमी स पिरेम करत हउँ। मई आपन पत्नी अउर आपन बचवन स पिरेम करत हउँ। मई अजाद नाहीं होब। मई हिअँइ रहब।’ 6जदि अइसा होइ तउ गुलाम क सुआमी ओका निआवाधीसन\* क लगे लिआइ। उ ओका दरवाजा तलक लइ जाइ अउर उ कउनो तेज अउजार स गुलाम क कान छेदी। तब उ दास जिन्नगी भइ मालिक क सेवा करी।

7“कउनो भी मनई आपन बिटिया क दासी क तरह बेचइ बरे ठान लेत ह। जदि अइसा होत ह तउ ओका अजाद करइ क कानून उ गुलाम मनई क आजाद करइ क कानून स अलग होइ। 8जदि गुलाम क मालिक उ मेहरारू स संतुट्ट न होइ तउ उ ओकरे बाप क बेच सकत ह। मुला जदि दासी क मालिक उ मेहरारू स बीहइ क बचन देइ तउ उ दूसर मनई क बेचइ क हक ओका नाहीं।” 9जदि दासी क सुआमी उ दासी स आपन बेटवा बीहइ क बचन देइ तउ ओसे दासी जइसा बेवहार नाहीं कीन्ह जाइ। ओकरे साथ बिटिया जइसा बेवहार करइ चाही।

10“जदि दासी क सुआमी कउनो दूसर मेहरारू स अपने क बियाहत ह तउ ओका चाही कि उ पहली मेहरारू क कमती खइया के अउ ओढ़ना न देइ अउर न ही ओकर बियाहे क हक में कमती करइ। अउर ओका चाही कि उ सब चीजन्क बराबर देत रहइ चाही जेका पावइ क हक ओका बियाहे में मिला रहा। 11उ मनई क ई तीन ठु चीज ओकरे बरे करइ चाही। जदि उ करत नाहीं तउ उ मेहरारू अजाद कीन्ह जाइ अउ एकरे बरे ओका कछू भी नाहीं देइ क पड़ी। ओका उ मनई बरे कउनो धने क देनदार न होइ क पड़ी।

12“अगर कउनो मनई दूसर क मारत ह अउर ओका मारि डावत ह तउ मरवइया भी मारि डावा जाइ। 13मुला कउनो संजोग होइ जात ह कि कउनो बे पहिले क जोजना बनाए कउनो क मारि डावत ह, तउ अइसा परमेस्सर क

मर्जी स ही भवा होइ। मई कछू खास ठउरे क चुनब जहाँ मनई सुरच्छा बरे भागिके जाइ सकत हीं। इ तरह उ हत्तियारा भागिके एहमों स कउने भी ठउरे प जाइ सकत ह। 14मुला जदि कउनो मनई कउनो मनई बरे किरोध या घिन धरे क कारण ओका जान बूझ क मारि डावइ क चाल चलत ह तउ उ हत्तियारा क जरूर सजा मिलइ चाही। उ मनई क मोरी वेदी स भी दूर लइ जाइ चाही अउर ओका मारि डावा चाही।

15“कउनो मनई जउन महतारी बाप क मारइ तउ ओका जरूर मारि डावा जाइ।

16“अगर कउनो मनई कउनो क गुलाम क तरह बिक्री करइ या आपन गुलाम बनवइ बरे अपहरण करइ तउ ओका जरूर मारि देइ चाही।

17“कउनो मनई जउन अपने बाप या आपन महतारी क सरापत ह ओका जरूर मारि देइ चाही।

18“दुइ मनई तहतुक करई अउ एक दुसरे क पथरे स या मूका स मारि सकत ह। उ मनई क तोहका कइसे सजा देइ चाही। जदि मार खावा मनई मरत नाहीं तउ मरवइया क न मारि डावइ चाही। 19मुला जदि मार खावा मनई कछू समइ तलक खटिया प पड़ा रहइ तउ मरवइया क ओका हर्जीना देइ चाही। मरवइया ओकरे टेम क बर्बादी क धन स पूरा करइ। उ मनई तबहिं ताई ओका हर्जीना देइ जब तलक उ पूरी तरह स चंगा न होइ जाइ।

20“कबहुँ-कबहुँ मनई आपन दास अउ दासी क पीट देत हीं। जदि पीटे-पाटे क पाछे उ दास मरि जात ह तउ हत्तियारा क जरूर सजा देइ चाही। 21मुला दास अगर मरत नाहीं अउ कछू दिनों पाछे उ नीक होइ जात ह तउ उ मनई क सजा न दीन्ह जाइ। काहेकि दास क मालिक दास बरे धन दिहे रहा अउ उ दास ओकर अहइ।

22“दुइ मनइ आपस में लड़इ-भिड़इ अउ कउनो गर्भवली अउरत क धक्का दइ देत हीं। जदि उ मेहरारू अपने लरिका क जन्मत ह, अउर महतारी बुरी तरह घायल नाहीं बा तउ धक्का देवइया क जरूर धन देइ चाही। उ मेहरारू क भतार इ तय करी कि उ मनई केतना धन देइ। जज उ मनई क इ तय करइ में मदद देइहीं कि उ धन केतना होइ। 23जदि अउरत बुरी तरह घायल होइ तउ उ मनई क जउन ओका चोट पहुँचाएस ह जरूर सजा देइ चाही। जदि एक मनइ मारि डावा जात ह तउ हत्तियारा जरूर मारि डावा जाइ। तू एक जिउ क बदले दूसर जिउ लइ चाही। 24तू आँखी क सन्ती आँखी, दँत क सन्ती दँत, हाथे क सन्ती हाथ, गोड़ क सन्ती गोड़। 25जरइ क सन्ती जरावा, खोंचे क सन्ती खोंचा अउ घाउ क सन्ती घाउ होइ।

26“अगर कउनो मनई गुलाम क आँखी क खोंचइ अउर अगर गुलाम उ आँखी स आँधर होइ जाइ तउ उ गुलाम अजाद कइ दीन्ह जाइ। ओकर आँखी ओकरी अजादी क कीमत अहइ। इ नेम मरद अउ मादा बरे दुइनउँ गुलाम एक ही तरह अहइ। 27अगर दास क मालिक दास क मुँहना प मारइ अउ दास क कउनो दँत टूटि जाइ तउ दास अजाद कइ दीन्ह जाइ। दाँस क दँतवा ओकरे अजादी क कीमत अहइ। इ दास अउ दासी दुइनउँ बरे एक तरह अहइ।

**निआवाधीसन** कबहुँ परमेस्सर क अरथ निआवाधीस भी होत ह।

28“अगर कउनो मनई क सौँड कउनो मेहरारू या मनई क मार देत ह तउ तू पाथर क बइपरा अउ सौँड क मारि डावा। तू उ सौँडे क खाइ नार्ही चाही। मुला सौँडे क मालिक अपराधी नार्ही बा। 29मुला जदि सौँड पहिले स मरकहा अहइ अउ सौँडे क सुआमी क ओराहना दइ दीन्ह गइ अहइ तउ उ सुआमी दोखी अहइ। काहेकि इ सौँडे क बाँधा या बाझ मँ बंद कइके नार्ही रखा गवा। तउ जदि सौँड अमेरे छोरि दीन्ह ग होइ अउ कउनो क जान स मार देत ह। तउ सुआमी दोखी अहइ। तू पचन्क सौँडे क पाथरे स मारि देइ चाही अउ सुआमी क भी हत्तिया कइ देइ चाही। 30मुला अगर मउत पावइवाला परिवार क मनई कसूरवार मनई स छुड़ैती क धन स्वीकार करत ही, तउ छुड़ैती क धन निआवधीस क तय करइ चाही अउर सौँडे क मालिक क मारइ न चाही।

31“इहइ नेम लागू करइ चाही जदि सौँड कउनो मनई क बेटवा या विटिया क मारि डावत ह। 32मुला सौँड जदि गुलाम क जान स मार देइ तउ सौँड क मालिक दास क सुआमी क चाँदी क तीस सिक्का\* देइ। अउ सौँड भी पथरे स मारि डावा जाइ। इ नेम दास अउ दासी बरे एक तरह लागू होइ।

33“जदि कउनो मनई एक खुला गइहा या कुइयौं खनइ अउ ओका मूँदइ नार्ही अउर कउनो मनई क जनावर आवइ अउ ओहमा गिरि पड़इ तउ गइहा क मालिक दोखी बा। 34गइहा क मालिक जनावर बरे हर्जाना देइ मुला जनावर क हर्जाना दिए जाए प ओका उ जनावर क लहास लेइ दीन्ह जाइ।

35“जदि कउनो क सौँड कउनो दूसर मनई क सौँडे क मारि डावइ तउ उ सौँड क जउन जिअत अहइ ओका बेंचइ दइ चाही। अउ एहसे मिले भए धन क आधा आधा हींसा दुइनउँ मनइयन क मिली। अउ मरे सौँडे का अधियाइ क दुइनउँ क जरूर बाँटि दीन्ह जाइ। 36मुला उ मनई क सौँड पहिले कउनो जनावरे क मारे अहइ तउ सौँडे क मालिक आपन सौँड बरे जिम्मेदार अहइ। जदि ओकर सौँड दूसर सौँड क मारि डावत ह तउ उ अपराधी बा काहेकि उ सौँडे क अजाद छोड़ेस। उ मनई सौँड क बदले सौँड देइ। उ मरे भए सौँड हरजाने मँ आपन सौँड जरूर देइ।

**22** “तू उ मनई क सजा कइसे देब्या जउन एक बर्धा या भेड़ी क चुरावत ह? जदि उ मनई जनावर क मारि डावइ या बेंच डावइ तउ उ ओका लउटाइ तउ सकत नार्ही। एँह बरे उ चोराए बर्धा क बदले मँ पाँच बर्धा देइ। या एक ठु चोराइ भई भेड़ी क बदले चार भेड़ी देइ। एँह बरे उ आपन चोरी क अपराध बरे हरजाना भी देइ। 2-4जदि उ कंगाल बा, तउ ओका गुलाम क रूप मँ बेचा जाइ। अगर ओकरे लगे चोराइ क भवा जनावर अहइ तू ओका खोजा जात ह तउ उ मालिक क एक ठु जनावर चोरी खातिर दुइ ठु जनावर देइ। एहसे कउनो दरकार नार्ही कि कि उ जनावर गदहा, बर्धा या भेड़ी रही।

“अगर कउनो चोर राति सेंध लगावत धइ जात ह अउ ओका कउनो मनई मारि डाएस तउ जउन ओका मारी डाएस उ मरइ क कउनो दोखी न होइ। मुला अगर इ दिन मँ घटि जात ह तउ जउन हत्तिया क हत्तिया क दोख लागी।

**चाँदी क तीस सिक्का** एक नवा गुलाम क कीमत।

5“अगर कउनो मनई आपन खेत या अंगूरे क बगिया मँ आपन जनावरन क धरइ देइ अउर उ जनावर पड़ोसी क खेत या अंगूरे क बगिया मँ चलि जाइ अउ ओकर अनाज क बरबाद करइ देत ह तउ उ आपन सबत बढ़िया फसिल क आपन पड़ोसी क नोकसान बरे भरइ।

6“अगर कउनो मनई आपन खेतवा क कँटहरी झाड़ी मँ आगी लगावइ अउ आगी बढ़त बढ़त पड़ोसी क फसिल या पड़ोसी क खेते क दना क बारि देइ, तउ मनई जउन आगी बारेस ह ओका ओकरे बरे हर्जाना देइ क होइ जउन बारेस ह।

7“कउनो मनई आपन पड़ोसी स ओकर घरे मँ कछू धन या कछू दूसर चीज धरइ बरे कहइ अउर जदि उ धन या उ सबइ चीजन पड़ोसी क घरे स चोरी चली जाइँ तउ तू का करब्या? तोहका चोरे क पता लगावइ क जतन करइ चाही। जदि तू चोरे क धइ लिहा ह तउ उ चीजे क दाम दुइ गुना देइ। 8मुला जदि तू चोर क पता न लगाइ सका तब निआवाधीसन तय करिहीं कि उ अपराधी अहइ कि नार्ही। घरे क मालिक क निआवाधीसन क समन्वा जाइ चाही तउ निआवाधीसन तय करइहीं अगर उ आपन पड़ोसी क चिजियन क चुराएस ह।

9“जदि दुइ मनई कउनो हेरान बर्धा, गदहा, भेड़ी, ओढ़ना या कउनो दूसर चीज क बारे मँ तकरार करइँ तउ तू का करब्या? एक मनइ कहत ह, ‘इ मोर अहइ।’ अउर दूसर कहत ह, ‘नार्ही इ मोर अहइ।’ दुइनउँ मनई परमेस्सर क लगे जाइँ। परमेस्सर तय करिहीं कि अपराधी कउन अहइ। जउन मनई गलती क दोखी होइ उ उ चीजे क दुइ गुना दाम भरी।

10“कउनो आपन पड़ोसी स कछू टेम बरे आपन जनावर क देखइ भालइ क कहइ। उ जनावर एक गदहा, बर्धा या भेड़ी होइ सकत ह। तबहिँ तू का करब्या जदि उ जनावर मरि जाइ या चोट खाइ जाइ या कउनो मनई उ जनावरे क चोराइके लइ जाइ जब कउनो मनई ओका लखत न होइ। 11उ पड़ोसी सफाई देइ कि उ जनावर क चोराएस नार्ही ह। अगर इ सच होइ तब पड़ोसी यहोवा क किरिया खाइ कि उ ओका नार्ही चोराएस ह। जनावर क मालिक इ किरिया क जरूर मानइ। पड़ोसी क हेरान जनावर क मालिक क हर्जाना नार्ही देइ क होइ।

12“मुला जदि पड़ोसी क चोराएस ह तउ उ मालिक क जनावर बरे भुगतान जरूर करइ। 13जदि जंगली जनावर जनावर क मारि डाए होइ तउ सबूत बरे ओकरे सरिर क पड़ोसी लइ आवइ। पड़ोसी मारा भवा जनावर क मालिक क हर्जाना न देइ।

14“अगर कउनो मनई आपन पड़ोसी स कउनो चीजन उधार प लेइ तउ ओकरे बरे उ मनई क जिम्मेदार होइ चाही। जदि उ आपन पड़ोसी स कउनो जानवर उधार प लइ जाइ जदि उ जनावरे क चोट लागि जाइ या उ मरि जाइ तउ पड़ोसी मालिक क हर्जाना देइ। पड़ोसी एँह बरे जिम्मेदार अहइ काहेकि ओकर मालिक हुवाँ खुद नार्ही रहा। 15मुला जदि मालिक जनावर क संग हुवाँ होइ तब पड़ोसी क भुगतान नार्ही करइ क होइ। या जदि पड़ोसी काम लेइ बरे

भाड़ा क भुगतान करत होइ तउ जनावर क मरइ या चोट खाइ प ओका कछू भी नाहीं देइ क होइ। जनावर क बइपरइ बरे दीन्ह गवा भाड़ा ही खूब होइ।

16“अगर कउनो मनई कउनो बिन बियाही कुवैरी कन्या क गुमराह करत ह अउ ओकर संग सारीरिक सम्बंध बनावत ह तउ ओका ओसे बियाह करइ चाही। ओकरे बाप क पूरा पूरा दहेज देइ। 17अगर बाप उ बिटिया क ओसे बीहइ क मना करत ह तउ भी उ मनई क धन देइ क होइ। उ ओका दहेज क भरपूर धन देइ।

18“तू कउनो अउरत क जादू टोना जिन करइ द्या। जदि उ अइसा करइ तउ तू ओका जिअइ जिन द्या।

19“तू कउनो मनई क कउनो जनावर क संग जिनाखोरी जिन करइ द्या। जदि अइसा होइ तउ उ मनई जरूर मारि डावा जाइ।

20“जदि कउनो मनई झूठे देवता क बलि चढ़ावत ह तउ उ मनई जरूर बर्बाद कइ द्या। सिरिफ यहोवा ही अइसा अहई जेहका तू पचन्क बलि चढ़ावइ चाही।

21“याद राखा पहिले तू पचे मिस्त्र देस में बिदेसी रह्या। एँह बरे तू पचे उ मनई क जिन ठगा न ओका चोट पहुँचावा जउन तोहरे देस में बिदेसी होइ।

22“तू पचे अइसी अउरत क कबहुँ नोस्कान नाहीं करइ चाही जेकर भतार मरि गवा होइ या कउनो अनाथ बचवन होइ। 23जदि तू पचे ओन रौंइ या अनाथ बचवन क कछू बुरा करिब्या तउ उ पचे मोरे अगवा रोइहीं अउर मई ओनके गोहार क सुनब।

24“अउर मोका जिआवा किरोध आइ। मई तोहका तरवारि स मारि डाउब। तबहिं तोहार पत्नी रौंइ होइहीं। अउर तोहार गदेलन अनाथ होइ जइहीं।

25“जदि मोरे लोगन में स कउनो गरीब होइ अउर तू ओका कर्ज द्या तउ उ धन पइ तोहका बिआज नाहीं लेइ चाही। 26कउनो मनई उधारे पर लीन्ह धन बरे आपन कोट क रेहन धरत ह तउ सूरज बूड़इ स पहिले ओका कोट लउटाइ द्या। 27जदि उ आपन कोट नाहीं पावत तउ ओकरे लगे तन ढाकइ क कछू भी नाहीं होइ। जब उ सोइ तउ ओका सर्दी लागी। जदि उ मोका रोइ क पुकारी तउ मई ओकर सुनब। मई ओकर बात सुनब काहेकि मई कृपालु हउँ।

28“तू परमेस्सर या आपन लोगन क नेतन क सरापइ नाहीं चाही।

29“फसिल काटइ क टेमें प तोहका आपन पहिला अनाज अउर पहिला फले क रस मोका देइ क चाही। बरिस क आखिर तलक प्रतिच्छा जिन करा।

“आपन पहिलौटी पइवा भवा बेटवन क मोका दइ द्या। 30आपन पहिला गोरू अउ भेड़ी क बच्चा मोका द्या। पहिलौटी बच्चा क सात दिना तक जनावरे क महतारी क संग रहइ द्या। आठवें दिन मोका इ सब द्या।

31“तू पचे क मोर बरे पवित्तर लोग होइ चाही। एँह बरे कउनो अइसे जनावरे क गोस जिन खा जेका कउनो जंगली जनावर मारि डाए होइ। उ मरे भए जनावरन क कुकुरन क खाइ द्या।

## निआव अउर कृपा क नेम

23 “दूसर मनइयन क खिलाफ लबार जिन बोला। जदि तू अदालत में गवाह हवा तउ बुरा मनई बरे लबार जिन बोला।

2“कुछ अइसा जिन करा सिरिफ एह बरे हर मनई वइसा करत बा। अगर मनई क समूह गलत करत बा तउ ओनकइ साथ जिन द्या। तू ओन मनइयन क अपने क गलत काम बरे बहकावइ जिन द्या। तू उहइ करा जउन ठीक अउ निआव क बात होइ।

3“अगर एक ठु गरीब मनई क अदालत में जाँच होत भइ, तउ कबहुँ कबहुँ लोग ओकर साथ देत हीं काहेकि उ पचे अफसोस महसूस करत ह। त उ जिन करा। जदि उ निआउ प होइ तउ ओकर साथ द्या।

4“जदि तू कउनो हेरान बर्धा या गदहा पावा तउ तोहका ओका मालिक क लौटाए देइ चाही। चाहे उ तोहार दुस्मन काहे न होइ।

5“जदि उ लखा कि जनावर एँह बरे नाहीं चल पावत अहइ कि ओको ऊपर ढेर क बोझ लदा अहइ तउ तोहका ओका रोकइ चाही अउ उ जनावर क मदद करइ चाही। तोहका उ जनावर क मदद तबहुँ भी करइ चाही जब उ जनावर तोहरे दुस्मनन में स कउनो क होइ।

6“तोहका गरीबन क संग अदालत में अनिआव न होइ देइ चाही। ओनके संग दूसर लोगन क तरह निआव होइ चाही।

7“बहोत होसियार रहा कि तू कउनो बात बरे कउनो क अपराधी कहा। कउनो बेकसूर मनई क खिलाफ अपराध जिन लगावा। कउनो निर्दोषी मनई क अपराध क सजा क जरिए जान स जिन मारा जाइ द्या काहेकि उ अपराध नाहीं किहेस। अगर कउनो मनई निर्दोषी क हत्तिया करइ तउ उ दुट्ट अहइ। अउर मई उ दुट्ट मनई क दोख मुक्त न करब।

8“अगर कउनो मनई गलत होए प आपन बात अंगीकार करावइ बरे तोहका घूस देइ तउ जिन ल्या। अइसा घूस जज क भी आँधर कइ देइ जेसे उ फुर बात क न लखि सकिहीं। इ तरह क घूस नीक मनइयन क लबार होइ क सिखाइ।

9“तू कउनो बिदेसी क संग जउन तोहार भुइँया में रहत ह जुलम जिन करा। याद राखा जब तू मिस्त्र देस में बसत रह्या तबहिं तू बिदेसी रह्या।

## खास छुट्टियन

10“छः बरिस ताई बिआ बोवा। आपन फसिल काटा अउ खेत क तइयार करा। 11मुला सातवें बरिस आपन खेत क जिन जोता। सातवाँ बरिस खेते क खास अराम करइ क होइ। आपन खेते में कछू जिन बोआ। अगर कउनो फसिल सातवें बरिस में आपन आप होइ जात ह तउ ओका गरीबन क खाइ द्या। जउन खइया क दाना बच खुच जाइ ओका बनैला पसु क भकोसइ द्या। इहइ बात तोहका अंगूर अउ जइतून क बृच्छ क बारे में करइ चाही।

12“छः दिना तलक काम करा। तब सातवाँ दिन अराम करा। एहसे तोहरे गुलामन, मजूरन अउ विदेसियन क जउन

कि तोहार बरे काम करत हीं तनिक समइ बरे अराम अउर सुस्ताइ क टेम मिली। अउर तोहार बर्धा अउ गदहा भी अराम करइ क टेम पइहीं।

13“इ नेमन क मनाइ बरे होसयारी बरता। झूठ देवतन क पूजा जिन करा। तू सबन्क ओनकइ नाउँ भी नाहीं लेइ चाही।

14“हर बरिस तोहार तीन खास छुट्टी क दिन होइहीं। इ दिन तू पचे मोर आराधना बरे मोर खास जगह प आया। 15पहिल छुट्टी क दौरान बेखमीरे क रोटी क दावत होइ। इ वइसा ही होइ, जइसा मई हुकुम दिहे हउँ। इ दिन तू अइसी रोटी खाब्या जेहमा खमीर न होइ। इ सात दिन ताई चली। तू पचे ऐंका आबीब क महीना मँ करब्या। काहेकि इ उहइ टेम अहइ जब तू पचे मिस्र स आए रहया। इ दिन कउनो भी मनई मोरे समन्वा खाली हाथ जिन आया।

16“दूसर छुट्टी का दिन फसल काटइ क, तोहार मिहनत क पहिला फल क परब होइ।”

“तीसर छुट्टी क दिन फसल जमा करइ क परब होइ। इ पतझड़ मँ तब मनावा जाइ जब तू खेत मँ आपन सारी फसल क काटब्या।

17“इ तरह हर बरिस तीन दाई सबहिं मनई यहोवा आपन सुआमी क समन्वा हाजिर होइहीं।

18“जब तू कउनो जनावर क मारा अउ एकरे खूने क बलि क रूप मँ जब चढ़ावा तउ अइसी रोटी भेंट मँ जिन चढ़ावा जेहमा खमीर होइ। अउर जब तू इ बलि क खा तउ एकहि दिन मँ सब गोस खाइ जा। दूसर दिन बरे गोस जिन बचावा।

19“जबहिं तू फसिल काटइ क टेम आपन फसिल बटोरा तबहिं आपन काटइ भइ फसिल क पहिली उपज आपन यहोवा क मन्दिर मँ लावा।

“तोहका नान्ह बोकरी क मांस नाहीं खाइ क चाही जउन आपन महतारी क दूधे मँ पका भवा होइ।

### परमेस्सर इस्त्राएल क ओकर मँ भूमि लेइ क मदद करी

20परमेस्सर कहेस, “मई तोहरे समन्वा तोहार अगुआयी बरे एक ठु सरगदूत पठवत हउँ। इ सरगदूत तोहका उ ठउरे प लइ जाइ जेका मई तोहरे बरे तइयार किहेउँ ह। इ सरगदूत तोहार रच्छा करी। 21सरगदूत क हुकुम माना अउ ओकरे पाछे चला। ओकरे खिलाफ कउनो बुरा काम जिन करा। उ सरगदूत तोहरे जर्म क छिमा न करी जउन तू ओकरे बरे करब्या। ओहमाँ मोर सक्ती अहइ। 22तोहका उ बात मानइ चाही जउन उ कहत ह। तोहका हर एक काम करइ चाही जउन मई तोहका कहत हउँ। यदि तू इ करब्या तउ मई तोहरे संग रहब। मई तोहरे सबहिं दुस्मनन क खिलाफ होइ जाब। अउर मई उ हर लोग क दुस्मन होब जउन तोहरे खिलाफ होइ।”

23यहोवा कहेस, “मोर सरगदूत तोहका इ देस स होइके जाइ मँ तोहार अगुवायी करिहीं। उ तोहका कइउ अलग अलग लोगन एमोरी, हित्ती, परिज्जी, कनानी, हिब्वी अउ यबूसी क खिलाफ तोहार अगुवायी करिहीं। मुला मई ओन सबहिं क नास कइ देब।”

24“ओनकइ देवदत क जिन पूजा करा। ओन देवतन क निहुरिके पइलगी जिन करा। तू उ तरीका स जिन रहा जउने तरीका स उ पचे रहत हीं तोहका ओनकइ मूरत क नास कइ देइ चाही। तोहका ओनकइ स्मृति क पाथर क तोड़ देइ चाही जउन ओनकइ देवतन क सुमिरइ मँ उ पचन्क मदद करत ह। 25तोहका यहोवा आपन परमेस्सर क सेवा करइ चाही। यदि तू इ करब्या, तउ मई तोहका भरपूर रोटी अउ पानी क बरदान देब। मई तोहार सारी बेरामी क दूर कइ देब। 26तोहार सब पचन्क मेहररूअन बच्चन क जन्मिहीं। जन्म क टेम प ओनकइ कउनो बच्चा नाहीं मरी। अउर मई तू पचन्क भरपूर लम्बी जिन्नगी देब।

27“जब तू आपन दुस्मनन स लड़ब्या, मई आपन प्रबल सक्ती तोहसे पहिले हुवाँ पठइ देब। मई तोहरे सबहिं दुस्मनन क हरावइ मँ तोहार मदद करब। उ पचे जउन तोहरे खिलाफ होइहीं, उ पचे जुद्ध मँ घबराइ क पराइ जइहीं। 28मई तोहरे अगवा अगवा बरँ पठउब। उ तोहरे दुस्मनन क भगाइ देइ मँ मजबूर करी। हिब्वी, कनानी अउ हित्ती लोग तोहार देस तजिके पराइ जइहीं। 29मुला मई ओन लोगन क तोहरे देस स बाहेर हाली हाली जाइके मजबूर न करब। मई इ सिरिफ एक बरिस मँ न करब। यदि मई लोगन क बहोत हाली जाइके मजबूर करब तउ देस ही निर्जन होइ जाइ। तब सबहिं तरह क जंगली जानवर बढ़िही अउर धरती प कब्जा कइ लइहीं। अउ उ पचे तोहरे बरे बहोत कस्ट देइवाला होइहीं। 30मई ओनका धीमे धीमे तोहरी भुइयाँ स उ टेमँ तलक बाहेर खदेरत रहब जब तलक तू उ भुइयाँ प न छाइ जा। अउ जहाँ कहुँ तू जाब्या मई दूसर लोगन क उ भुइयाँ तजि देइ बरे मजबूर करब।

31“मई तू पचन्क लाल सागर स फरात नदी तलक सारा भुइयाँ देब। पच्छिउँ चौहद्दी पलिस्ती सागर (भूमध्य सागर) होइ अउ पूर्बी चौहद्दी अरब क रेगिस्तान होइ। मई तू पचन्क हुवाँ बसइ सबहि लोगन क हराइ क देब। अउर तू पचे इ सबहिं मनइयन क हुवाँ स पराइ बरे मजबूर करब्या।

32“तू पचे हुवाँ क लोगन मँ स कउनो क संग या ओनकइ देवतन क संग कउनो समझौता जरूर न करइ चाही। 33ओन पचन्क आपन देस मँ जिन रहइ द्या। यदि तू ओनका रहइ देब्या तउ ओनकइ चाल-चपेट मँ फँसि जाब्या। उ पचे तोहसे मोरे खिलाफ पाप करवइहीं। अउर तू पचे ओनकइ देवतन क सेवकइ सुरू कइ देब्या।”

### यहोवा अउ इस्त्राएल क बीच करार

24 परमेस्सर मूसा स कहेस, “तू हारून, नादाब, अबीहू अउ इस्त्राएल क सत्तर पुरनिया नेता पहाड़े प आवा अउ कछू दूर होइ के मोर आराधना करा। 2तबहिं तू अकेले ही मोर निअरे आवइँ। दूसर कउनो लोग यहोवा क निचके न आवइँ अउ बाकी बचा भवा लोग पहाड़े क निअरे न आवइँ।”

3इ तरह मूसा यहोवा क सबहिं नेम अउ आग्या क लोगन क बताएस। तब सबहिं मनइयन कहेन, “यहोवा जउन सबहिं आग्या क दिहेस ओका हम सब मानब।”

4<sup>एँह</sup> बरे मूसा यहोवा क सबहिं आग्या क चाम पत्तर प लिखेस। भियान भिन्सारे मूसा उठा अउ पहाड़े क तलहटी क निचके एक वेदी बनाएस। अउर उ बारह पाथर इस्त्राएल क बारहु परिवार समूह बरे खड़ा किहेस। 5<sup>तब</sup> मूसा इस्त्राएल क जवानन क बलिदान दइ बरे पठएस। उ पचे यहोवा बरे होमबलि अउ सान्ति क भेंट बरे बर्धा क बलि दिहेन।

6<sup>मूसा</sup> ओन जनावरन क खून बटोरेस। मूसा आधा खून खोरा मँ धरेस। अउर दूसर आधा खून वेदी प उड़ेरेस।\*

7<sup>मूसा</sup> चाम पत्तर प लिखा भवा करार क पड़ेस। मूसा करार क एँह बरे पढ़ेस कि सब लोग ओका सुन सकइँ। अउ लोग कहेन, “हम लोग ओन नेम क सुन लिहेन ह जेका यहोवा हम पचन्क दिहेस ह। अउर हम सब मनइयन ओनका मानइ क बचन देत अही।”

8<sup>तब</sup> मूसा खून स भरा खोरा बलि स लिहेस अउ ओका लोगन प छिछकेस। उ कहेस, “इ खून बतावत ह कि यहोवा तोहरे संग अउ ओन सबइ बातन क लगइ क जउन हम पचन्क कहेन।”

9<sup>तबहिं</sup> मूसा, हारून, नदब, अबिहु अउ इस्त्राएल क सत्तर पुरनियन नेता लोग पहाड़े प चढ़ेन।

10<sup>इ</sup> मनइयन इस्त्राएल क यहोवा क पहाड़े प ठाड़ भवा लखेन। यहोवा कउनो अइसे अधार प ठाड़ रहेन जउन नीलमणि जइसा देखात रहा। अइसा निर्मल जइसा अकास। 11<sup>इस्त्राएल</sup> क सबहिं नेता लोग यहोवा क लखेन, मुला यहोवा ओनका बर्बाद नाहीं किहेन।\* उ पचे साथ खाएन अउ पिएन।

### मूसा परमेस्सर क नेम पावइ जात ह

12<sup>यहोवा</sup> मूसा स कहेस, “मोरे लगे पहाड़े प आवा। मई आपन उपदेसन अउ आदेसन क दुइ ठु समथर पाथरे क पाटी प लिखे अही। इ आदेसन मनई बरे अहईँ। मई इ पाथर क समथर पाटी क तोहका देइहउँ।”

13<sup>एँह</sup> बरे मूसा अउ ओकर मददगार यहोसू यहोवा क पहाड़े ताई गएन। 14<sup>मूसा</sup> चुने भए नेतन स कहेस, “हम दुइनउँ क हिअँई जोहा। हम तोहरे लगे लउटब। जब तलक मई गैर हाजिर रहब, हारून अउ हूर तोहार सासकन रइहीं। ओनके लगे जा जदि कउनो क समस्या होइ।”

### मूसा क यहोवा स मिलन

15<sup>तब</sup> मूसा पहाड़े प चढ़ा। अउर बादर पहाड़ क ढाँपि लिहेस। 16<sup>परमेस्सर</sup> क महिमा सीनै पहाड़े प उतरी। बादर छः दिना तलक पहाड़े क मूँदै रहा। सतएँ दिन यहोवा, बादर मँ, स मूसा स बोला। 17<sup>इस्त्राएल</sup> क लोग यहोवा क महिमा

**मूसा ... उड़ेरेस** खून यहोवा अउ मनइयन क बीच करार क पक्का करइ बरे बइपरत रहेन। खून वेदी पर इ देखावइ बरे उड़ेर जात रहा कि यहोवा करार मँ साथे बा।

**यहोवा क ... किहेन** बाइबिल कहत ह कि मनई परमेस्सर क नाहीं लख सकलेन। उ निराकार अहइ। मुला यहोवा चाहत रहा कि इ नेता ओका कउनो खास तरह स लखि सकइँ। तउ यहोवा ओनका आपन दरसन करइ दिहस।

क लख सकत रहेन। इ पहाड़े क चोटी प भरभराइ क बरत आगी क नाई रहा।

18<sup>तबहिं</sup> मूसा बदरे मँ थोड़ा ऊपर पहाड़े प चढ़ा। मूसा पहाड़े पर चालीस दिन अउ चालीस रात रहा।

### पवित्तर वस्तु बरे भेंट

**25** यहोवा मूसा स कहेस, 2<sup>“इस्त्राएल</sup> क लोगन स मोरे बरे भेंट लइ आवइ क कहा। हर मनई अपने मनवा मँ इ ठान लेइ चाही जउन उ मोका देइ चाहत ह। इ भेंटन क मोरे बरे मंजूर कइ ल्या। 3<sup>इ चीजन्क</sup> पत्री इ अहइ जेनेँका तू मनइयन स अंगीकार करब्या: सोना, चाँदी, काँसा 4<sup>नीला</sup> बैगनी अउ लाल धागा, सुन्नर रेसमी कपड़ा, बोकरी क बार, 5<sup>भेड़ी</sup> क लाल रंगे क खाल, नरम खाल, बबुरे क काठ, 6<sup>दिया</sup> मँ बारइ क तेल: अभिसेक क तेल, धूपे बरे महकउआ मसाला, भीनी सुगन्धे बरे मसाला। 7<sup>सुलेमानी</sup> पाथर अउ दूसर कीमती रतन जउन याजक क एपोद मँ जड़ दीन्ह जाईँ अउ निआव क थइला।”

### पवित्तर तम्बू

8<sup>यहोवा</sup> इहउ कहेस, “मनई मोरे बरे एक पवित्तर स्थल बनइहीं। तबहिं मई ओनके संग रहि सकब। 9<sup>मइ</sup> तोहका देखाउब कि पवित्तर तम्बू कइसा देखाइ देइ चाही। जइसा मई देखाएउँ ह हर एक चीज ठीक वइसा ही होइ चाही।

### करार क संदूख

10<sup>“बबुरे</sup> क काठ बइपरा अउ एक खास संदूख बनावा। इ पवित्तर संदूख क ढाई हाथ लम्बा डेढ़ हाथ चौड़ा अउ डेढ़ हाथ ऊँचा होइ चाही। 11<sup>संदूखे</sup> क भीतर अउ बाहर पत्तर चढ़ावइ बरे सुद्ध सोना लगावा। संदूखे क कोना क सोना स मढ़ा। 12<sup>संदूखे</sup> क उठावइ बरे सोना क चार कड़ा बनवा। सोने क कड़ा क चारिहुँ कोना प लगावा। दुइनउँ कइँती दुइ दुइ कड़ा होईँ। 13<sup>तब</sup> संदूखे क ढोवइ बरे खम्भा बनावा। इ खम्भन बबुरे क काठे क होइ अउ सोना स जरूर जड़ी होईँ चाही। 14<sup>संदूखे</sup> क बगल क कोन प लगा भवा कड़ा मँ इ खम्भन क घुसेइ द्या। इ खम्भन क बइपरब संदूखे क ढोवइ बरे करा। 15<sup>इ</sup> खम्भा संदूखे क कड़न मँ सदा छुई रहइ चाही। खम्भन क बाहेर जिन खईँचा।

16<sup>यहोवा</sup> कहेस, “मई तोहका करार देत अही।” एँका करार क संदूखे मँ धरा। 17<sup>तब</sup> एक ढकना\* बनावा। एका सुद्ध सोने क बनावा। एका ढाई हाथ लम्बा अउ डेढ़ हाथ चौड़ा बनावा। 18<sup>“तब</sup> दुइ करूब सरगदूतन क बनावा अउ ओनका ढकना क दुइनउँ सिरा प लगावा। इ सरगदूत क बनवइ बरे सोना क पत्तर बइपरा। 19<sup>एक</sup> करूब क ढकना क सिरे प लगावा अउ दूसर क दुसरे सिरे प। एक टूकड़ा बनावइ बरे करूब सरगदूत क ढकना क संग जोड़ द्या। 20<sup>करूब</sup> क पाखा ढकना प उपर की ओर पसरा होइ होइ चाही। करूब क मुँहना ढकना कइँती लखत होइ करूब एक दूसरे क आमना सामना होइ चाही।

**एक ढकना** एका “छिमा क पीढ़ा” कहा जात ह। हिवू सब्द क अरथ होइ सकत ह। “उ ठउर जहाँ पाप माफ कीन्ह जात हीं।”

21“मई तोहका करार देब। उ करार क संदूखे में धरा अउ खास ढकना स संदूखे क बंद करा। 22जब मई तू पचन स भेंटब तबहिं मई करूब सरगदूतन क बीच स बात करब, जउन करार क संदूख खास ढकना प अहइ। मई आपन सबहिं आदेसन क इस्त्राएल क मनइयन क उहइ ठउरे स देब।

### खास रोटी क मेज

23“बबुरे क काठे क एक ठु मेज बनावा। मेज दुइ हाथ लम्बा, एक हाथ चौड़ा अउ डेढ़ हाथ ऊँचा होइ चाही। 24मेज क निखालिस सोना स मढ़ द्या अउ ओकरे चारिहुँ कइँती सोना क झालर लगावा। 25तब चार अँगली चौड़ी सोना क पट्टी मेज क चारिहुँ कइँती ठोक द्या। अउ पट्टी क चारिहुँ कइँती सोना क झालर लगावा। 26तब सोना क चार कड़ा बनावा अउ मेज क चारिहुँ कोने प ओकर पावा प लगावा। 27कड़ा पट्टा क लगे होइ चाही। इ कड़न में मेज क ढोवइ बरे खम्भन फँसाइ दीन्ह जइहीं। 28खम्भन बनवइ बरे बबुरे क काठ बइपरा अउ ओका सोना स मढ़ि द्या। खम्भन मेज क ढोवइ बरे अहइँ। 29हर परात, चम्मच, सुराही अउ खोराइ सब चीज निखालिस सोना क बनावा। सुराही अउ खोरा पिअइ क भेंट उडेलइ बरे बइपरा जइहीं। 30खास रोटी मोरे समन्वा मेज प धरा। इ सदा मोरे समन्वा हुवाँ रहइ चाही।

### डीबट

31तब तोहका एक डीबट बनवावइ चाही। सुद्ध सोना बइपरा। एकर पेंदी अउ चपटी नोक बनावइ बरे निखालिस सोना क पत्तर बइपरा। एकर फूल, कली अउर पंखड़ी निखालिस सोना क बनी होइ चाही। अउ इ सबहिं चीज डीबट में एक ठुकड़ा में होइ चाही।

32“डीबट क छः ठु डार होइ चाही। तीन डार एक कइँती अउ तीन डार दूसर कइँती होइ चाही। 33हर डारे प तीन ठु फूल होइ चाही। इ फूलन क बदाम क फूल क नाई कली अउ पंखड़ी जोरिंके बनावा। 34डीबट बरे चार ठु फूल बनवा। इ फूलन क बदामे क कली अउ पंखुड़ी क नाई बनावइ चाही। 35डीबटे प छः ठु डार होइ चाही-दुइ हींसा में दुइनउँ कइँती तीन तीन डार होइ चाही। तीनउँ जगहिया क नीचे जहाँ डार मिलत ह कली अउ पंखुड़ी क संग एक ठू फूल बनवा।

36“फूल अउ पंखुड़ी क संग समूचा डीबट निखालिस सोना स बनवई चाही। इ सबहिं डार अउ कली एक एकाई में निखालिस सोना क होइ चाही। 37तबहिं 7दिया डीबट प धरइ बरे बनावा। इ दिया डीबट क समन्वा क ठउरे प रोसनी देइहीं। 38दिया क झालर अउ थाली सबहिं निखालिस सोना क होइ चाही। 39पचहतर पाँड\* सुद्ध सोना क प्रयोग डीबट अउ एकरे साथे क सब चीज बनवइ में करा। 40धियान दइ क हर चीज ठीक-ठीक उहइ तरह स बनइ जाइ जइसा मई पहाड़े प तोहका देखावा ह।”

पचहतर पाँड लगभग 34 किलोग्राम या एक किवकार।

### पवित्तर तम्बू

26 परमेस्सर मूसा स कहेस, “पवित्तर तम्बू क दस पर्दा स बनावा। इ परदन क बढ़िया सनीवाला अउ नीला, लाल अउर बैगनी कपरा स बनावा। कउनो कुसल कारीगर क चाही कि उ करूब सरगदूत क पखना क संग परदन प कढ़ाई करइ। 2हर एक पर्दा अट्ठाइस हाथ लम्बा अउ चार हाथ चौड़ा होइ चाही। अउर हर कनात क नाप बराबर होइ चाही। 3सब परदन क दुइ समूह में सिआ। पहिले हींसा में पाँच परदन क एक संग अउ दूसर हींसा में पाँच परदन क एक संग सी द्या। 4आखिरी क पर्दा क सिरे क नीचे फन्दा बनावा। इ फन्दन क बनवइ बरे नीला कपरा लगावा। दुसरे समूह क परदन क आखरी पर्दा में भी उहइ काम करा। 5पहिले अउ दुसरे समूह क परदन क आखिरी पर्दा में पचास फन्दा बनवा। फन्दा एक दुसरे फन्दा क आमने सामने होइ चाही। 6तब पचास सोना क हुक परदन क एक संग मिलवइ बरे बनावा। इ परदन क एक दुसरे क संग हुक स इ तरह जोरिंहीं कि पुरा पवित्तर तम्बू एक ही होइ जाइ।

7“तब तू दूसर तम्बू बनउव्या जउन पवित्तर तम्बू क ढाकि लेइ। इ तम्बू बरे ग्यारह परदन बइपरा। इ परदन क बोकरी क बारे स बनावा। 8इ सबहिं पर्दा नाप में एक बराबर होइ चाही। उ सबहिं तीस हाथ लंबा चार हाथ चौड़ा होइ चाही। 9पाँच ठु पर्दे क एक समूह में जुड़वावा अउ फुन दुसर छः पर्दे क एक दुसर समूह में जुड़वावा। छठे पर्दे क आधे हींसा क तम्बू क समन्वा ऊपर मोड़ि द्या। 10एक समूह क आखिरी पर्दा क छोर प पचास फन्दा बनवा अइसा ही दूसरे समूह क आखिरी पर्दा क छोरा प भी पचास फन्दा बनावा। 11तब काँसे क पचास फन्दा बनवा। इ काँसे क फन्दा क प्रयोग तम्बू क परदन क एक साथे जोरइ बरे करा। इ सबइ तम्बू क एक संग जोरइ क एक एकाई क रूप में बनिहीं। 12तम्बू क आखरी पर्दे क आधा हींसा तम्बू क पीछे क किनारे लटका रही। 13तम्बू क किनारन में इ तम्बू क पर्दा पवित्तर तम्बू क पेंदी स एक हाथ नीचे लटकत रही। तउ इ तम्बू पवित्तर तम्बू क पूरी तरह ढाँकि लेइ। 14बाहेर क तम्बू क ढाकइ बरे दुइ पर्दा बनवा। एक पर्दा लाल रंग स रंगी भइ भेड़ा क खाल स बनइ चाही अउ दूसर पर्दा उत्तम खाल सुइसों क बनी होइ चाही।

15“पवित्तर तम्बू क सहारा देइ बरे बबुरे क काठ क तखता क प्रयोग करा। 16तखता दस हाथ ऊँचा अउ डेढ़ हाथ चौड़ा होइ चाही। 17हर तखता क तले में ओनका जोड़इ बरे एक दूसरे प धरइ बरे दुइ खूँटी होइ चाही। पवित्तर तम्बू क हर एक तखता बरे इहइ करा। 18पवित्तर तम्बू क दक्खिन कइँती बीस तखता क प्रयोग करा। 19बीस तखता बरे चाँदी क चालीस आधार बनावा। हर एक ढाँचा नीचे चाँदी क दुइ आधार एका दुइ खम्भा बरे होइ चाही। 20पवित्तर तम्बू क उत्तरी हींसा बरे बीस तखता अउर ल्या। 21इ तखता बरे चालीस कुर्सियन क बनवावा हर एक तखता क नीचे बरे दुइ आधार होई चाही। 22तोहका पवित्तर तम्बू क पच्छिउँ छे बरे छः अउर तखता लइ चाही। 23पवित्तर तम्बू क पाछे कोना बरे दुइ तखता ल्या। 24कोने क दुइनउँ तखता क नीचे एक साथ जोरि द्या। ऊपरी छल्ला दुइनउँ

तखतन क एक कइके जोड़ी। दुइनउ कोन बरे उहइ करा। 25इ तरह सब मिलिके आठ तु तखता पवित्तर तम्बू के पच्छिउँ छोर बरे होइहीं। हर तखता क नीचे दुइ कुर्सी होइस चाँदी क सोलह कुर्सी होइहीं।

26“बबुरे क काठ बइपरा अउ पवित्तर तम्बू क तखता बरे बेंड़ा बनवा। पवित्तर तम्बू क एक कइँती क हींसा क तखता बरे पाँच बेड़ा बनवा। 27अउ पवित्तर तम्बू क दूसर हींसा क तखता बरे पाँच अउर बेड़ा होइहीं। अउर पवित्तर तम्बू क पाछे क तखता बरे पाँच बेड़ा होइहीं 28बीच क बेंड़ा फरेम एक सिरा स दूसर सिरा तलक पहोंचइ चाही।

29“तखतन क सोने स मढ़ा। अउ तखतन क बेड़न क फँसावइ बरे छल्ला बनवा। इ छल्ला भी सोने क होइ चाही। बेड़े क सोने स मढ़ा। 30पवित्तर तम्बू क तू अहइ तरह क बनवा जइसा मई तोहका पहाड़े प देखाए रहेउँ।

### पवित्तर तम्बू क भीतर

31“बढ़िया सनी क बइपरा अउ पवित्तर तम्बू क भीतर भाग बरे एक खास पर्दा बनावा। इ पर्दा क नीला, बैंगनी अउ लाल ओढ़ना स बनवा। करूब सरगदूत क तस्बीर कपरा में काढ़ा। 32बबुरे क लकड़ी क चार खंभा बनावा। खम्भन क सोने स मढ़ द्या। चारिहुँ खम्भन प सोने स बना हुकन लगावा। खम्भन की नीचे चाँदी क चार आधार लगावा। तउ सोने क हुक में पर्दा टाँगा। 33पर्दा क सोने क हुक क नीचे टाँगा, अउ करार क संदूखे क पर्दा क पाछे धरा। इ पर्दा पवित्तर ठउर क सब ते जिआदा पवित्तर ठउर क अलगाइ देइ। 34सबते जिआदा पवित्तर ठउर में करार क संदूखे प ढकना राखा।

35“पवित्तर ठउर में पर्दा क दुरसे कइँती खास मेज क धरा। मेज पवित्तर तम्बू क उत्तर में होइ चाही। तब डीबट क पवित्तर तम्बू क दखिन में राखा। डीबट मेज क ठीक समन्वा होइ।

### पवितर तम्बू क बइका दुआर

36“तब पवित्तर तम्बू क दुआर बरे एक पर्दा बनावा। इ पर्दा क बनवइ बरे नीला, बैंगनी, लाल उत्तिम सन क कपरा क बइपरा। अउर कपरा में तस्बीर क बुन द्या। 37दुआरे क पर्दा बरे सोना क हुक बनवा। सोना स मढ़ा बबुरे क काठे क पाँच खम्भा बनावा। अउ पाँचउ खम्भा बरे काँसे क पाँच कुर्सी ढलवाइ ल्या।”

### होम बलि बरे वेदी

27 यहोवा मूसा स कहेस, “बबुरे क काठ बइपरा अउ एक वेदी बनावा। इ वेदी चउकोर होइ चाही। इ पाँच हाथ लम्बी अउ पाँच हाथ चउड़ी अउर तीन हाथ ऊँच होइ चाही। 2वेदी क चारिहुँ कोने प सींग बनावा। हर एक सींग क एकरे कोने स अइसा जोड़ा कि सबहिं कुछू एक होइ जाई। तबहिं वेदी क काँसे स मढ़ि द्या।

3“वेदी प काम आवइवाला सबहिं औजार अउ डेकची क काँसा स बनावा। काँसे क बासन, फरूही, खोरा, काँटा अउ तसला बनावा। इ में स कुछू वेदी स राखी बहावइ में बइपरी

जइहीं। 4“वेदी बरे एक झंझरी बनावा। इ काँसा झंझरी जाल क नाई बनई जाइ। झंझरी क चारिहुँ कोने प काँसे क छल्ला बनावा। 5झंझरी क वेदी क तले कंगनी क नीचे धरा। झंझरी नीचे से वेदी क आधा हींसा में बीच तलक होइ चाही।

6“वेदी बरे बबुरे क काठ क बल्ला बनावा अउ ओनका काँसा स मढ़ा। 7वेदी क दुइनउँ ओर लगा भवा छल्ला में इ खम्भन क नाइ द्या। इ खम्भन क वेदी ढोवइ बरे बइपरा। 8वेदी क भितरे स फोफ्फल संदूख क नाई बनवा अउ एकर अगली बगली लकड़ी क पट्टा स बनावा। वेदी वइसइ ही बनावा जइसा मई तोहका पहाड़े प देखाएउँ ह।

### पवित्तर तम्बू क चारिहुँ कइँती आँगन

9“पवित्तर तम्बू बरे एक आँगन बनावा। परदन क दक्खिन कइँती एक सौ हाथ लम्बी होइ चाही। इ परदन क उत्तिम सनी क रेसा क होइ चाही। 10बीस खम्भा अउ बीस काँसे क कुर्सी क बनावा। खम्भन क हुक अउ पर्दा क छड़ चाँदी क बनइ चाही। 11उत्तर कइँती परदन क दीवार एक सौ हाथ लम्बी होइ चाही। एहमें बीस तु खम्भा अउर बीस काँसे क आधार होइ चाही। खम्भा क फन्दा अउ परदन क छड़ चाँदी क बनवइ चाही।

12“आँगन क पच्छिउँ कइँती परदन क दीवार होइ चाही जउन पचास हाथ लम्बी होइ चाही। हुवाँ उ दीवारे क दस खम्भा अउ दस आधार चाँदी क बना होइ चाहिए। 13आँगन क पूरब कइँती पचास हाथ लम्बाई होइ चाही। 14-15इ पूरब क सिरा अंगने में घुसइ क दुआर होइ। प्रवेस दुआर क एक सिरा क पर्दा पन्द्रह हाथ लम्बी होइ चाही। उ कइँती तीन खम्भा अउर तीन तु आधार होइ चाही।

16“एक पर्दा बीस हाथ लम्बे आँगन क प्रवेस दुआर ढाकइ बरे बनावा। इ पर्दा क सनी क उत्तिम रेस अउ नीला, लाल अउ बैंगनी कपरा स बनावा। इ पर्दे प नकसा क काढ़ि द्या। उ पर्दा बरे चार खम्भा अउ चार आधार होइ चाही। 17अंगने क चारिहुँ कइँती क सबहिं खम्भन चाँदी क छड़े स जोरी जाइ चाही। खम्भन क हुक चाँदी क चाँदी स बनवइ चाही अउ खम्भा क आधार काँसा क होइ चाही। 18आँगन एक सौ हाथ लम्बा अउ पचास हाथ चौड़ा होइ चाही। अंगने क चारिहुँ कइँती क परदन क दीवार पाँच हाथ ऊँच होइ चाही। पर्दा सनी क उत्तिम रेसा क बनवा होइ चाही। सबहिं खम्भन क तले आधार काँसा क होइ चाही। 19सबहिं औजार पवित्तर तम्बू क खूँटिन, अउ पवित्तर तम्बू में लाग भइ हर एक चीज काँसा क ही बनइ चाही। अउर अंगने क चारिहुँ कइँती क पर्दा बरे खूँटिन काँसा क ही बनई होइ चाही।

### दिया बरे तेल

20“इस्त्राएल क मनइयन क सब ते बढ़िया तेल लइ आवइ क हुकुम द्या। इ तेले क बइपरब हर साँझि क जरइवाला दिया बरे करा। 21हारून अउ ओकर बेटवा दिया क रोसन करइ क काम संभरिहीं अउर एकर धियान रखिहीं कि इ ठउरे प यहोवा क समन्वा दिया साँझि स भिन्सारे

तलक बराबर जरत रइहीं। उ पचे बइठका वाली तम्बू क पहिले कमरा में जइहीं। इ कमरा करार क संदूखे बाला कमरा क बाहेर अहइ जउन उ पर्दा क पीछे अहइ जउन दुइनउँ कमरन क अलगावत ह। इस्त्राएल क मनइयन अउ ओनकइ औलाद इ नेम क हमेसा मानत रइहीं।”

### याजकन क वस्त्र

**28** यहोवा मूसा स कहेस, “आपन भाई हारून अउ ओकर बेटवन नादाब, अबीहू, एलिआजार अउ ईतामार क इस्त्राएल क मनइयन में स अपने लगे आवइ क कहा। इ मनइयन मोर सेवा याजकन क रूप में करिहीं।

2“आपन भाई हारून बरे खास वस्त्र बनावा। इ वस्त्र ओका मान अउ सम्मान अउर सान बरे अहइ। उलोगन में अइसे कुसल कारीगर अहई जउन इ वस्त्र बनइ सकत हीं। मई इन मनइयन क खास बुद्धि दीन्ह ह। ओन मनइयन स हारून बरे वस्त्र बनवइ क कहा। इ वस्त्र बतइहीं कि उ मोर सेवा खास रूप स करत अहई। उ मोर सेवा याजक क रूप में करत अहइ। 4इ उहइ वस्त्र अहई जेका कारीगरन क बनवइ: “निआव क थइला”, एपोद, एक नीला रंग क लबादा एक सफेद बुना भवा चोगा, एक पगड़ी अउ एक कमर बंद “कुसल मनइयन क इ खास वस्त्र तोहार भाई हारून अउ ओकरे बेटवन बरे जरूर बनवइ चाही। तबहि हारून अउ ओकर बेटवा मोर सेवा याजकन क रूप में कइ सकत हीं। 5मनइयन स कहा कि उ पचे सनी क उत्तिम रेसा अउ नीला, लाल अउ बैगनी कपरा क बइपरई।

### एपोद अउ कमरबंद

6“एपोद बनवइ बरे सुनहरी धागा, सनी क उत्तिम रेसा अउ नीला, लाल अउ बैगनी कपरा पहिरा। इ खास एपोद क माहिर कारीगर बनइहीं। 7एपोद क हर एक काँधे प पट्टी लाग होइ। काँधे क इ पट्टियन एपोद क दुइनउँ कोने प बंधी होइहीं।

8“कारीगर बड़ी, हुसियारी स एपोद बरे एक कमरबंद बुनिहीं। इ उहइ रूप स बनवाइ चाही जउन रूप में एपोद। सुनहरा, नीला, बैगनी अउ लाल धागा अउर उत्तम सनी बइपरा।

9“तोहका दुइ गोमेद लेइ चाही। इन नगन प इस्त्राएल क बारहु बेटवन क नाउँ खोवा। 10छः नाउँ एक नग प अउ छः नाउँ दूसर नग प खोवइ चाही। नाउँ क सब ते बइका अउ सब ते छोटका बेटवा क हिंसाब स लिखा। 11इस्त्राएल क बेटवन क नाउँ इ नगन प खोववावा। इ उहइ तरह करा जउने तरह उ कुसल दस्तकार मनई जउन मोहर बनावत ह, 12तब एपोद क दुइ काँधे क पट्टी प इ दुइ नगन क लगावा। हारून यहोवा क समन्वा जब ठाड़ होइ, उ इ खास एपोद क जउन पइ इस्त्राएल क बेटवन क नाउँवाला दुइनउँ नग यादगारी क तौर पइ पहिरी। 13बढ़िया सोना ही नगन क एपोद प लागइ बरे बइपरा। 14गुँथा भवा धागा क तरह निखालिस सोना क जंजीर बटि द्या। सोना क अइसी दुइ जंजीर बनावा अउर सोना क जड़न क संग एनका बाँधि द्या।

### निआव क थइला

15“बइका याजक बरे निआव क थइला बनावा। कुसल कारीगर इ निआव क थइला क वइसा इ बनावई जइसा एपोद बनए रहेन। उ पचे सोने क तार, सनी क उत्तिम रेसा अउ नीला, लाल अउ बैगनी कपड़ा क बइपरा। 16एका चौकोर बनवइ बरे दोहर देइ चाही। निआव क थैला एक बीत्ता लम्बा अउ एक बीत्ता चौड़ा होइ चाही। 17निआव क थइला प सुन्नर रतन क चार पाँति जड़ा। रतन क पहली पाँति में रूबी, पुखराज अउ मरकत मणि होइ चाही। 18दूसर पाँति में फीरोज, नीलम अउ हीरा होइ चाही। 19तीसर पाँति में सूर्यकान्त, अकीक अउ याकूत लगइ चाही। 20चउथी पाँति में लहसुनिया, गोमेदक अउ कपिस मणि लगावइ चाही। निआव क थैला प एनका लगावइ बरे सोना में जड़ द्या। 21निआव क थइला प बारह रतन होइहीं। इस्त्राएल क बारहु बेटवन क नाउँ उ प नुमाइंदी होइ चाही। एक एक नगे प इस्त्राएल क बेटवन में स एक एक नाउँ लिखा। हर एक नगे प एनकइ नाउँ उहइ तरह लिखा जइसे माहिर कारीगर एक मुहर बनावत ह।

22“निआवा क थइला बरे निखालिस सोना क जंजीर बनावा। इ जंजीरियन बरी भइ लसुरी क नाई होइहीं। 23दुइ सोना क छल्ला बनावा अउ एनका निआव क थइला प दुइनउँ कोने प लगावा। 24दुइनउँ सोना क जंजीरियन क निआव क थइला में दुइनउँ कोने में लगावा। 25सोने क जंजीर क दुइ सिरा क दुइनउँ खाना में जड़वाइ द्या इ एपोद क काँधे क दुइनउँ टुकरन क समन्वा में कसा रहई। 26दुइ ठु अउर सोना क छल्ला बनावा अउ ओनका निआव क थइला क दुइनउँ कोने प लगावा। इ निआव क थइला क भीतर क हींसा एपोद क नगिचे होइ। 27दुइ अउर सोना क छल्ला बनावा अउ ओका काँधे क पाटी क तले एपोद क समन्वा लगावा। सोना क छल्ला क एपोद क बुना भवा पाटी क ऊपर लगावा। 28निआव क थइला क छल्ला क एपोद क छल्लन स जोड़ा बरे नीला फीता बाँधा। इ तरह निआव क थइला बुना भवा पाटी क लगे लगा होइ अउर एपोद स अलग न होइ।

29“हारून जब पवित्तर ठउर में घुसरत ह, ओका निआव क थइला पहिरे रहइ चाही। इ तरह इस्त्राएल क बारहु बेटवन क नाउँ ओकरे हिरदय प रइहीं अउर इ हमेसा यहोवा क ओन लोगन क याद दियाई जात रही। 30ऊरीम अउ तुम्मीम क निआव क थइले में रखा। जब हारून यहोवा क समन्वा जाइ तब उ सबइ ओका याद होइहीं। एँह बरे हारून जब यहोवा क समन्वा होइ तउ उ इस्त्राएल क मनइयन क निआव करइ क साधन हमेसा अपने साथ रखी।

### याजकन क दूसर वस्त्र

31“एपोद क नीचे पहिरइ क एक नीला एपोद बनावा। 32मूँड डवइ बरे इ चोगा क बीचोबीच एक छेद बनावा। इ छेदे क चारिहुँ कइँती गोटा लगावा। इ गोटा काँलर क नाई होइ अउ फाटइ स रोकी। 33नीला, लाल अउ बैगनी कपरा क अनार बनावा। इ अनार क चोगा क नीचे क सिरा क चारिहुँ कइँती लटकावा। अउ अनार क बीचोबीच सोना क

घंटी लगवावा। 34इ तरह चोगा क नीचे सिरन में चारिहूँ कइँती सोना क घंटी अउ अनार होइहीं जउन इहइ तरह होइ कि दुइ अनार क बीचोबीच एक सोना क घंटी होइ। 35हारून इ चोगा क पहिरी जब उ याजक क रूप में यहोवा क सेवा करी अउ यहोवा क समन्वा पवित्तर ठउर में जाइ, तब इ घंटिन बाजै लगिहीं। जब उ पवित्तर ठउर तजि देइ तब इ घंटिन बाजै लगिहीं। इ तरह हारून न मरी।

36“निखालिस सोना क धारी बनावा। सोना प उहइ तरह सब्द खोदा जइसे मनइयन मुहर बनावत हीं। इ सब्दन क लिखा, “यहोवा बरे पवित्तर”। 37सोना क इ धारी क नीला फीता स कस द्या। पगड़ी क चारिहूँ कइँती नीला फीता बाँधा। सोना क धारी क पगड़ी क समन्वा होइ चाही। 38हारून आपन कपार प इ का बाँधी। हारून जब जब यहोवा क समन्वा जाइ हमेसा इ पहिरे रही जेहसे यहोवा मनइयन क भेंटे क कबूल कइ लेइ। इ तरह स हारून इस्त्राएल क लोगन क अपराध क सहन करिहीं जदि उ पचे परमेस्सर क गलत रूप में भेंट दिहे अहइँ या ओकर भेंट में कउनो खराबी रही अहइ।

39“सफेद लबादा बुना बरे उत्तिम सनी क बइपरा अउ पगड़ी बरे उत्तिम सनी क बइपरा। बुना भवा पाटी पइँ मँ नकसा काढ़ा भवा होइ चाही। 40हारून क बेटवन बरे कोट, कमरबंद अउ पगड़ी बनावा। इ ओनका मान सम्मान देइहीं। 41इ पोसाक आपन भाई हारून अउ ओकर बेटवन क पहिरावा। ओकरे पाछे जइतून क तेल ओनके मूँडे प इ देखौवइ बरे नावा कि उ पचे याजकन अहइँ। इ ओनका पवित्तर बनई। तबहिं उ पचे मोर सेवा याजकन क रूप में करिहीं।

42“सनी क उत्तिम रेसा क जौंधिया वगैरह बनवावा। इ नीचे क पहिरइ क कपरा करिहाउँ स जौँध तलक ढाँकिही। 43हारून अउ ओकर बेटवन क इ कपसन क पहिरइ चाही जब कबहुँ उ पचे बइठका क तम्बू में जाईं। ओनका इहइँ कपसन क पहिरइ चाही जब कबहुँ उ पचे पवित्तर ठउर में याजक क तरह सेवा खातिर वेदी क नगिचे आवईं। उ पचे इ कपसन क जरूर पहिर चाही ताकि उ पचे अपराधी नाहीं होइ अउर नाहीं मरइ। इ अइसा नेम होइ चाही जउन हारून अउ ओकरे पाछे ओकरे बंस क मनइयन बरे हमेसा बना रही।”

### याजकन क तइनात करइ क संस्कार

**29** तब यहोवा मूसा स कहैस, “अब मईँ तोहका बताउब कि इ देखावइ बरे तोहका का करइ चाही कि हारून अउ ओकर बेटवा पवित्तर याजकन क नाईँ खास तरह स मोर सेवा करत हीं। एक बे दोखे क बछवा अउ दुइ बे दोख क बच्चा भेड़ा लइ आवा। 2जेहमाँ खमीर न होइ उ बारीक गोहूँ क आटा ल्या अउ रोटी बनवा। अउर इस तेले से सनी केकन अउ तेले स लगा हुवा छोटा पातर केकन भी बनावा। 3इ रोटिन्क अउ केकन क एक डलिया में धरा अउ फिन इ डलिया क हारून अउ ओकरे बेटवन क द्या। ओनका बैल अउ दुइनउँ भेड़ा भी द्या।

4“तब हारून अउ ओकर बेटवन क बइठकावालातम्बू क दुआर क समन्वा लइ आवा। तब ओनका पानी स नहवावा। 5हारून क खास पोसाक: जैसे कि सफेद चोगा, नीला चोगा जउन कि एपोद क संग पहिरावा जात ह पहिरावा। फिन ओह प निआव क थइला अउ एपोद बाँधा। एपोद क सजा भवा अउ बुना भवा पाटी क संग बाँध द्या। 6सर प साफा बाँधा अउ साफा क चारिहूँ कइँती मुकुट क धइ द्या। 7अउर जइतून क तेल ल्या अउ हारून क मूँडे प नाइ के अभिसेक करा। इ बताई कि हारून इ काम बरे चुना ग अहइ।

8“तब हारून क बेटवा क उ ठउरे प लइ आवा। अउर ओका सफेद बुना भवा लबादा पहिरावा। 9तब ओनके करिहाउँ क चारिहूँ कइँती कमरबंद बाँधा। ओनका मूँडे प धरइ क खास टोपी द्या। उ समइ उ पचे याजकन क रूप में बहाल होइहीं। उ पचे उ नेम क माफिक याजक होइहीं जउन हमेसा होइहीं। इहइँ ढंग अहइ कि जेहसे तू पचे हारून अउ ओकरे बेटवन क याजक बनउब्या।

10“तब बइठकावाली तम्बू क समन्वा ठउरे प बछवा क लावा। हारून अउ ओकरे बेटवन क चाही कि उ पचे बछवा क मूँडे प हथवा धरईं। 11तब उ बछवा क बइठकावाली तम्बू क दुआरे प यहोवा क समन्वा एका मारि डवा। यहोवा एका लखी। 12तब बछवा क कछू खून ल्या अउ वेदी ताईँ जा। आपन अंगुरी स वेदी क सींगे प कछू खून लगावा। बचा भवा सारा खून नीचे वेदी क पैदी प डवा। 13तब बछवा क करेजा क चर्बी, दुइनउँ गुर्दे क चर्बी अउ ओकरे चारिहूँ कइँती चर्बी निकार ल्या। इ चर्बी क वेदी प जरावा। 14तब बछवा क गोस, ओकर खाल अउ ओकर दूसर अंगे क लइके आपन डेरा स बाहेर जा। इ सब चीजन्क डेरा क बाहेर जरावा। इ भेंट अहइ जउन याजकन क पाप दूर करइ बरे चढ़ाई जात ह।

15“तब हारून अउ ओकरे बेटवन स भेड़ा क मूँडे प हाथ धरइ क कहा। 16तब उ भेड़ा क मारि डवा अउ ओकर खून ल्या। खूने क वेदी क चारिहूँ कइँती छिरका। 17ओकर पाछे भेड़ा क कइउ हींसा में काटि डवा। भेड़ा क भितरे क सब अंगे क अउ गोड़ धोवा। इ चीजन्क क दूसर टूका क संग अउ भेड़ा क मूँडे क संग राखा। 18तब वेदी प इ सबन्क बारा। इ यहोवा बरे होम बलि अहइ अउर इ यहोवा बरे सोहाइ गंध, एक भेंट अहइ।

19“हारून अउ ओकरे बेटवन क दूसर भेड़ा प हाथ धरइ क कहा। 20उ भेड़ा क मारि डवा अउ ओकर खून ल्या। उ खून क हारून अउ ओकरे बेटवन क दाहिन काने क सिरा में लगवा। ओनकइ दाहिन हाथे क अगूठा पर भी कछू खून लगावा। अउ कछू खून ओनके दाहिन गोड़वा क बड़का अंगूठा प लगावा। तब वेदी क चारिहूँ कइँती खून बहाइ द्या।

21“तब वेदी प स कछू खून ल्या। इ खून क अभिसेक क तेले में मिलइ द्या अउर हारून अउ ओकरे ओढ़ना प, अउर ओकरे पूतन अउ ओनके ओढ़ना प छिरक्या। इ इ बताई कि हारून अउ ओकर पूत मोर सेवा खास तरह स करइ बरे पवित्तर किए गएन ह। अउर इ भी बताई कि

ओनकइ वस्त्र खास समझ्या प बइपरइ जात बरे पवित्तर कीन्ह गवा ह।

22“तब उ भेड़ा स चर्बी ल्या। (इ उहइ भेड़ा बा जेका हारून क महा याजक बनवइ बरे में पवित्तर करइ क समारोह में होइ।) पूँछे क चारिहुँ कइँती क चर्बी अउर उ चर्बी क ल्या जउन बदन क भीतरी हींसा क ढँकत ह। करेजा क ढकइवाली चर्बी क ल्या। दुइनउँ गुर्दे अउ ओह पइ क चर्बी अउर दाहिन जाँघ क ल्या। 23तब उ रोटी क डलिया ल्या जेहमाँ तू बे खमीरे क बनई रोटी धरे रह्या। इहइ डलिया बा जेका तोहका यहोवा क समन्वा राखइ क अहइ। एक रोटी सादी, एक तेले स बनी केक अउर तेले लगा भवा एक छोटा पातर केक क बाहेर निकारा। 24तब एनका हारून अउ ओकरे बेटवन क द्या: फुन ओनसे कहा कि यहोवा क समन्वा एनका उठावई। इ यहोवा क खास भेंट होइ।

25“तब इ चीजन क हारून अउ ओकरे बेटवन स ल्या अउ ओनका वेदी प भेड़ा क साथे धरा। तब हर चीजे क वेदि प जरावा। इ होमबलि बा। इ भेंट यहोवा बरे भेंट अहइ। अउर इ यहोवा बरे सोहाइ क गंध अहइ।

26“तब भेड़ा स छाती क निकारा। (इहइ भेड़ा अहइ जेका हारून क खास महा याजक बनवइ बरे पवित्तर कर क समारोह में बइपरा जाइ।) भेड़ा क छाती क लहराइ क भेंट क रूप में यहोवा क समन्वा लहराया। जनावरे क इ हींसा तोहार होइ। 27तब भेड़ा क छाती अउ जाँघ ल्या जउन हारून क महा याजक बनवइ बरे काम म आइ रहन। इ हींसा पवित्तर बनावे अउ एका हारून अउर ओकरे बेटवन क द्या। इ भेंट क खास हींसा होइ। 28इस्त्राएल क मनइयन इ अंगन क हारून अउ ओकरे बेटवन क सदा देइहीं। जब कबहुँ इस्त्राएल क मनइयन यहोवा बरे भेंट चढ़इहीं तउ इ हींसा हमेसा याजक लोगन क होइहीं। ओन लोगन क मेलबलि जउन कि यहोवा बरे अहइ, में स इ हींसा याजक लोगन क होई।

29“ओन खास वस्त्रन क बचाइके राखा जउन हारून बरे सिया रहेन। इ वस्त्रन ओकरे बेटा, पोता बरे होइहीं। उ पचे उ वस्त्रन क तन पहिरहीं जब याजकन चुना जइहीं। 30हारून क बेटवा ओकरे पाँछे अगवा महा याजक होइ। उ सात दिनों ताई उ वस्त्रन क पहिरे रही जबहिँ उ बइठकावाली तम्बू क पवित्तर ठउरे में सेवा करइ आइ।

31“उ भेड़ा क गोस पकावा जउन हारून क महा याजक बहाल करइ बरे प्रयोग में आवा रहा। उ गोस क पवित्तर ठउरे में पकावा। 32तब हारून अउ ओकर बेटवा बइठकावाली तम्बू क दुआरे प गोस खइहीं। अउर उ पचे डलिया क रोटी भी खइहीं। 33इ भेंट प्रायश्चित्तिकरण बरे तब भवा रहा जब उ पचन्क याजकन क रूप में सेवा करइ बरे पवित्रीकरण कइ जात रहेन। इ भेंट क ओनहीं क खाइ चाही। कउनो बिदेसी क इ पवित्तर भेंट क नाहीं खाइ चाही। 34अगर उ भेड़ा क गोस या रोटी भियान ताई काफी मात्रा में बचि जाइ तउ ओका जरइ देइ चाही। तोहका उ बचि भवा रोटी या गोस नाहीं खाइ चाही काहेकि इ पवित्तर अहइ।

35“वइसा ही करा जइसा मई तोहका हारून अउ ओकरे बेटवन बरे करइ क हुकुम दिहउँ ह। ओनका याजकन बहाल करइ बरे इ त्यौहार सात दिना तलक चली। 36सात दिनों तलक हर रोज एक साँड़ मारा। इ हारून अउ ओकरे बेटवन बरे पाप भेंट होइ। इ बलिदान क प्रयोग वेदी क सुद्ध करइ बरे किहा। अउर वेदी क पवित्तर बनावइ बरे जइतूने क तेल स एकर अभिसेक करा। 37तू सात दिना तलक वेदी क सुद्ध अउर पवित्तर रख्या। उ समझ्या वेदी सब ते जिआदा पवित्तर होइ। जउन चीज वेदी क छुइ उ पवित्तर होइ जाइ।

38“हर रोज वेदी प तोहका एक भेंट चढ़ावइ चाही। तोहका एक एक बरिस क दुइ भेड़ी क बचवन क भेंट चढ़ावइ चाही। 39एक भेड़ी क बच्चा भिंसारे अउ दूसर साँड़ क चढ़ावा। 40-41पहिला भेड़ी क साथ हीन क चउथाई दाखरस क पिअइ क भेंट क संग एपा क दसवाँ हींसा गँहू क महीन आटा जउन कि हीन क चउथाई तेल स मिला भवा अहइ चढ़ावा। 41अउर गोधरी क समइ में दूसर भेड़ी क बिहान क चढ़ावा क नाई एकर पिअइ क भेंट क संग चढ़ावा। इ यहोवा बरे एक भेंट एक सुहावना सुगंध अहइ।

42“तोहका इ चीजनक यहोवा क भंटे में रोज जरावइ चाही। इ यहोवा क समन्वा, बइठकावाली तम्बू क दुआरे करा। इ हमेसा करतइ रह्या। जब तू भेंट चढ़उब्या तब मई यहोवा, हुवाँ तोहसे मिलब अउ तोहसे बात करब। 43मई इस्त्राएल क मनइयन स उ ठउरे प मिलब। उ ठउर मोर महिमा स पवित्तर बन जाइ।

44“इ तरह मई बइठकावाली तम्बू क पवित्तर बनउव। अउर मई वेदी क पवित्तर बनउव। अउर मई हारून अउ ओकरे बेटवन क पवित्तर बनउव, जेहसे उ पचे मोर सेवा याजकन क तरह करि सकई। 45मई इस्त्राएल क मनइयन क संग रहब। मई ओनकइ परमेस्सर होब। 46मनइयन इ जनिहीं कि मई ओनकइ परमेस्सर यहोवा हउँ। उ पचे जनिहीं कि मई उहइ परमेस्सर अहउँ जउन ओनका मित्र स बाहेर लाएउँ ह तउ कि मई ओनके संग रहि सकत हउँ। मई ओनकइ परमेस्सर, यहोवा अहउँ।”

### धूप जरावइ क वेदी

30 यहोवा मूसा स कहेस, “बबुरे क लकड़ी क एक वेदी बनावे। तू इ वेदी धूप बारइ बरे करब्या। 2तोहका वेदी क चौकोर एक हाथ लम्बा अउ एक हाथ चौड़ा बनवइ चाही। एकर ऊँचाइ दुइ हाथ होइ चाही। चारिहुँ कोने प सींग होइ चाही। इ सींगन क वेदी क साथ एक टुकड़ा बनइ देइ चाही। गेवेदी क ऊपर क सिरा अउ ओकर सबहिँ कइँती निखालिस सोना मढ़ा। वेदी क चारिहुँ कइँती सोना क पाटी लगावा। 4इ पाटी क तले सोना क दुइ छल्ला होइ चाही। वेदी क दूसर कइँती सोना क दुइ छल्ला भी होइ चाही। इ छल्ला वेदी क ढोवइ में खम्भन फँसावइ खातिर होइहीं। छल्लन क वेदी क विपरीत कइँती लगावा। 5खम्भन क भी बबुरे क काठे क बनावे। खम्भन क सोना स मढ़ा। 6वेदी क खास पर्दा क समन्वा धरा। करार क संदूख उ पर्दा

क दूसर कईती अहइ। उ संदूखा क ढकइवाला ढकना क समन्वा वेदी होइ। इ उठइ ठउर अहइ जहाँ मई तोहसे मिलब।

7“हारून हर भिंसारे महकउआ धूप बत्ती वेदी प बारी। इ उ तब करी जब दियन क देखइ भालइ आइ। 8ओका संझा क देखइ भालइ आइ तब फुन धूप बत्ती बारइ चाही। जेहसे यहोवा क समन्वा हर रोज भिंसारे अउ सौंझ क धूप बत्ती बरत रहइ। 9इ वेदी क प्रयोग कउनो दूसर तरह क धूप या जरी भइ बलि बरे जिन किहा। इ वेदी क प्रयोग अन्न भेंट या पेय भेंट बरे जिन किहा।

10“बरिस मँ एक दाई हारून यहोवा क खास भेंट चढ़ाइ। हारून पाप भेंट क खून क प्रयोग मनइयन क पापन्क प्रायश्चित करइ बरे करी। हारून इ वेदी क सींगन प करी। इ दिन प्रायश्चित क दिन कहा जाइ। इ तोहार पीढ़ी दर पीढ़ी लागू होइ। इ यहोवा बरे बहोत ही खास दिन होइ।”

### मंदिर क कर

11यहोवा मूसा स कहेस, 12“इस्त्राएल क मनइयन क गना करा जेहसे तू जनब्या कि हुवाँ केतवा लोग अहई। जब कबहूँ इ कीन्ह जाइ हर एक मनई आपन जिन्गी बरे यहोवा क धन देइ। जदि हर मनई उ करी तउ मनइयन क संग कउनो भी डराउन घटना न होइ। 13हर मनई जेका गना जाए उ आधा सेकेल चाँदी जरूर देइ। (पवित्र ठउर क सेकेल क अनुसार आधा सेकेल अहइ।) एक सेकेल क वजन बीस गेरा होत ह। इ आधा सेकेल यहोवा बरे भेंट होइ। 14बीस बरिस या ओसे जिआदा जउन मनई होइ ओका गना जाइ। हर मनई जउन गना जाइ, यहोवा क भेंट देइ। 15धनी मनई आधा सेकेल स जिआदा न देइहीं। अउ गरीब मनई आधा सेकेल स कमती नाहीं देइहीं। सबहिं मनइयन यहोवा क बराबर बराबर भेंट देइहीं। इ तोहरे जिन्गी क कीमत होइ। 16इस्त्राएल क लोगन स इ धन बटोरा। बइठकावाले तम्बू मँ सेवकाइ करइ बरे इ धन क बइपरा। इ यहोवा क समन्वा आपन मनइयन क याद करइ, तोहार रूहन क प्राश्चित करइ बरे एक यादगार होइ।”

### हाथ गोड़ धोवइ क हउद

17यहोवा मूसा स कहेस, 18“एक टु काँसा क सिलफची ल्या अउ एका काँसे क गोड़े प धरा। तू पचे एका धोवइ बरे बइपरा। सिलफची क बइठकावाली तम्बू अउ वेदी क बीच धरा। सिलफची मँ पानी भरा। 19हारून अउ ओकर बेटवन इ हउद क पानी स आपन गोड़ हाथ धोवई। 20हर दाई जब उ पचे बइठकावाले तम्बू मँ आवई तउ पानी स गोड़ हाथ जरूर धोवई। जब उ पचे वेदी क निअरे वेदी क नगिचे यहोवा क सेवा करइ अउ धूप बारइ आवई। 21उ पचे आपन गोड़ हाथ जरूर धोवइ ताकि उ पचे मरिहीं नाहीं। इ अइसा कनून होइ जउन हारून अउ ओकरे लोगन बरे हमेसा बना रही। इ कनून हारून अउ ओन सबहिं लोगन बरे बना रही जउन भविस्स मँ होइ।”

### अभिसेक क तेल

22तब यहोवा मूसा स कहेस, 23“बहोत बढिया मसाला लिआवा। बारह पौंड गीला लोहबान लिआवा अउ इ तउल क आधा (छः पौण्ड) महकउआ दालचीनी अउर बारह पौंड अगर, 24अउ बारह पौण्ड तेजपत्ता ल्या। एनका नापइ जोखइ बरे दफ्तर क नाप क प्रयोग करा। एक गौलन जइतून क तेल भी लिआवा।

25“गमकइवाला अभिसेक क तेल बनवइ बरे इ सबहिं चीजन्क जरूर मिलावइ चाही। 26बइठकावाले तम्बू अउ करार क संदूखे प इ तेल क छिरका। 27मेज अउ मेजे प धरी सबहिं तस्तरिन प तेल छिरका। इ तेल क सबहिं दिया अउर सब औजार प छिरका। इ तेल क धूप वेदी प डारि द्या। 28जरि क भेंट क वेदी अउ दूसर सबही बरतन प यहोवा बरे तेल नावा। खोरा अउ ओका आधार प तेल नावा अउ वेदी क पावा प तेल नावा। 29तू इ सब चीजन्क पवित्र बनउब्या। उ सबइ चिजियन यहोवा बरे खास होइहीं। कउनो भी चीज जउन एनका छुइ उ भी पवित्र होइ जइ।

30“हारून अउ ओनके पूतन प तेल छिरका। मोर खास तरह स सेवा करइ बरे इ ओनकइ पवित्र करिहीं। तबहिं इ सबइ मोरे सेवा याजकन क तरह करत हीं। 31“इस्त्राएल क मनइयन स कहा कि अभिसेक क तेल मोरे बरे हमेसा बहोत पवित्र अउ खास होइ। इ हमेसा तोहार सबही पीढ़ियन बरे सिरफ मोर सेवा बरे होइ चाही। 32मामूली सुगन्धि क तरह कउनो भी मनई इ तेल क न बइपरी। उ तरह कउनो सुगन्धि बनावा जउन तरह इ खास तेल बनाएस ह। इ खास अभिसेक क तेल पवित्र अहइ अउर इ तोहरे बरे बहोत खास अउ पवित्र होइ चाही। 33जदि कउनो इ पवित्र तेल क नाई सुगन्धि बनवइ अउर ओका कउनो विदेसी क देइ जउन कि याजक नाही ह तउ उ मनई क आपन लोगन स जरूर अलगाइ देइ चाही।”

### धूप

34तब यहोवा मूसा स कहेस, “इ महकउआ हवन सामग्री क ल्या: रसगंधा, कस्तूरी गंधिका, बिरोजा अउ निखालिस लोहबान। धियान राखा कि तोहरे लगे सामग्री क वजन बराबर होइ। 35सामग्री क महकउआ धूप बनावइ बरे आपुस मँ मिलावा। एँका उहइ तरह करा जइसा सुगन्धि बनवइया करत ह। इ धूप मँ नोन भी मिलावा। इ एका सुद्ध अउ पवित्र बनइ। 36कछू धूप क तब तलक पीसा जब ताई ओकर बुकनी न होइ जाइ। बइठकावाले तम्बू मँ करार क संदूखे क समन्वा इ बुकनी क धरा। इ उहइ ठउर अहइ जहाँ मई तोहसे मिलब। 37तू पचन्क इ धूपे क चूरन क सिरिफ खास अवसर मँ ही बइपरइ चाही। तू पचन्क इ धूपे क चूरन क बइपरइ बरे सिरिफ खास तरह स यहोवा खातिर जराइ चाही। इ खास तरह स धूप बनावइ बरे दूसर धूपे बरे जिन करया। 38कउनो मनई आपन खातिर कछू अइसा धूप बनावा चाहत ह जेहसे उ इ सुगन्धि क मजा लइ सकइ। मुला अगर उ अइसा करत ह तउ ओका अपने मनइयन स अलग कइ दीन्ह जाइ।”

## बसलेल अउ ओहोलीआब

31 तबहिं यहोवा मूसा स कहेस, 2“मईँ यहूदा क परिवार समूह स ऊर क बेटवा बसलेल क चुनेउँ ह। उरि हुर क बेटवा रहा। 3मईँ बसलेल क परमेस्सर क आतिमा स भरि दिहस ह। मईँ ओका हर दस्तकारी क काम मँ माहिर बनावत हउँ अउ गियान देत हउँ। 4बसलेल एक बहोत बड़िया सिल्पकार बा अउ उ सोना, चाँदी अउ काँसा क चीज बनइ सकत ह। 5बसलेल सुन्नर रतन क काटि अउर जड़ सकत ह। उ लकड़ी क भी काम कइ सकत ह। बसलेल हर किसिम क काम कइ सकत ह। 6मईँ ओहोलीआब क भी ओकरे संग काम करइ क चुनेउँ ह। ओहोलीआब दन कबीले क आहोसामाक क बेटवा अहइ। मईँ दूसर मजूरन क माहिर बनाएँ ह ताकि उ पचे उ सबहिं चीजन्क बनइ सकिहीं जेका मईँ तोहका करइ क हुकुम दिहेउँ ह।

7बइठकावाला तम्बू, करार क संदूख, संदूखे क ढकना।

8मेज अउर ओह पड़ सारी चीजन निखालिस सोना क डीबट अउर एकर सबहिं बर्तन, धूप बारइ क वेदी।

9भेंटे क जरावइ बरे वेदी अउ वेदी प बइपरइ क चीज, कटोरा अउ एकर नीचे क चीज।

10याजक हारून क खास वस्तर अउ ओकरे बेटवन बरे खास वस्तर, जबहिं उ पचे याजक क नाई सेवा करत पहिरहीं।

11अभिसेक क महकउआ तेल, अउर पवित्रर ठउर बरे महकत धूप।

इ कारीगरन्क इ सब चीजन्क वइसी बनवइ चाही जइसा मईँ तोहका हुकुम-दिहेउँ ह।”

## सबित

12तबहिं यहोवा मूसा स कहेस, 13“इस्त्राएल क लोगन स इ कहा: ‘तू पचे मोरे खास अरामे क दिन बरे नेम क मानाई चाही। तू पचन्क इ जरूर करइ क चाही, काहेकि इ सब मोरे अउ तोहरे बीच सबहिं पीढ़ी बरे चीन्हा क रूप मँ रइहीं। एहसे तोहका पता लागी कि मईँ, यहोवा तोहका आपन खास मनई बनए अही।

14“सबित क दिन क खास दिन बनाव। यदि कउनो एका दुसित करत ह तउ उ व्यक्ति क जरूर मार डावइ चाही। अगर कउनो सबित क दिन काम करत ह, तउ उ व्यक्ति क आपन लोगन मँ स जरूर अलग कइ दीन्ह जाइ। 15हफ्ता मँ दूसर छः दिन काम करइ बरे अहइँ। एकर मतलब खास दिन अराम करइ बरे अउर यहोवा क मान देइ बरे अहइ। अगर कउनो सबित क दिन काम करी उ जरूर ही मार दीन्ह जाइ। 16इस्त्राएल क लोगन सबित क दिना क खास दिन क रूप मँ जरूर याद रखिइ चाही। उ एका हमेसा हमेसा मनावत रइहीं। इ मोरे अउ ओनके बीच करार अहइ जउन सदा बना रही। 17सबित क दिन मोरे अउ इस्त्राएल क बीच सदा चीन्हा क रूप मँ बना रही। यहोवा छः दिन काम किहेस अउ अकास अउ धरती क बनएस अउ सतएँ दिन उ आपन क अराम दिहेस अउ सुस्तान।”

18जउने समइ परमेस्सर मूसा स सीनै पहाड़े प बात करब बंद किहस, उ ओका करार लिखित भवा दुइ समथर पाथर दिहस। परमेस्सर आपन अंगुरियन क काम मँ लगाएस अउ पथरे प लिखेस।

## सोने क बछवा

32 लोगन निहारेन कि टेमें बीति गवा अहइ जब तलक मूसा पहाड़े प नाहीं गवा अउर हुआँ स वापिस नाहीं भवा। एँह बरे लोगन हारून क चारिहुँ कइँती एकठा भएन। उ पचे ओसे कहेन, “लखा। मूसा हम पचन्क मिस्त्र देस बाहेर निकारेस। मुला हम पचे इ नाहीं जानित कि ओकरे साथ का होइ गवा अहइ। एँह बरे कछू देवतन क हमरे अगवा चलइ अउ हमका अगवा लइ चलइवाला बनाव।”

2हारून मनइयन स कहेस, “आपन आपन मेहररून, बेटवन अउ बिटियन्के सोना क बाली मोरे लगे लइ आवा।”

3एँह बरे सब मनइयन कनवा क बालिन्क बटोरेन अउ उ सबइ ओनका हारून क लगे लइ आएन। 4हारून मनइयन स सोना लिहेस अउ बछवा क एक मूर्ति बनवइ बरे बइपरेस। हारून मूर्ति क तरासइ बरे एक छोनी क बइपरेस। तबहिं इ मूर्ति क सोना स ढाँक दिहेस।

तब लोगन स कहेस, “इस्त्राएल, तू पचन्क हिआँ उहइ देवता अहइँ जउन तू सबन्क मिस्त्र स बाहेर लइ आएन ह।”

5हारून इ चीजन्क लखेस। एँह बरे उ बछवा क समन्वा एक वेदी बनएस। तब हारून एलान किहेस, “भियान यहोवा क मान देइ बरे एक खास भोज होइ।”

6भियान भिन्सारे मनइयन हाली उठि गएन। उ पचे पसु क मारि डाएन अउ ओकर होमबलि अउ मेलबलि चढ़ाएन। मनइयन खाइ अउ पिअइ बरे बइठेन। तब उ पचे ठाड़ भएन अउ असभ्य भोज किहेन।

7उहइ समइया यहोवा मूसा स कहेस, “इ पहाड़े स पाले उतरा। तोहार लोगन यानी उ पचे, जेका तू मिस्त्र स लइ आया ह, भयंकर पाप किहे बाटेन। 8उ पचे जल्दी ही उ चीजन क करइ स मुकर गएन जेनका करइ क हुकुम मईँ ओनका दिहेउँ ह। उ पचे टेघरा भवा सोना स आपन बरे एक बछवा बनएन। उ सबइ उ बछवा क निहुरत अहइँ अउ ओका बलि चढ़ावत अहइँ। लोगन कहेन ह, ‘इस्त्राएल, इ सबइ तोहार देवता अहइँ, जउन तोहका मिस्त्र स बाहेर लइ आएन ह।”

9यहोवा मूसा स कहेस, “मईँ इ लोगन क लखेउँ ह, “मईँ जानत अहउँ कि इ पचे बहोत हठी अहइँ। 10एँह बरे अब मोका ओन लोगन क बरबाद करइ द्या। तब मईँ तोहरे बरे एक बड़का रास्ट बनउबा।”

11मुला मूसा यहोवा आपन परमेस्सर स पराथना किहेस अउ ओसे भीख माँगेस। मूसा कहेस, “हे यहोवा, तोहका आपन लोग पड़ काहे किरोध करइ चाही। आप आपन अपार सक्ती अउ आपन बल स इ पचन्क मिस्त्र स बाहेर लइ आया ह। 12मुला अगर आप आपन लोगन क नस्ट करब्या तब मिस्त्र क मनइ कहि सकत हीं ‘यहोवा आपन लोगन क संग बुरा करइ क चाल चलेन ह। इहइ कारण

अहइ कि एनका मिस्त्र स बाहेर निकारया ह। उ ओनका पहाड़े प मारि डावा चाहत रहा। उ आपन लोगन क धरती स मेटाइ देइ चाहत ह। एह बरे आपन लोगन किरोध करइ बन्द करा। ओन लोगन क बर्बाद करइ क योजना छोड़ दिया। 13 आप आपन सेवा करइवालन इब्राहीम, इसहाक अउ याकूब क याद राखा। आप आपन नाउँ क उ पचन्क प्रतिग्या करइ बरे बइपरया तू कहया: 'मई तोहार लोगन क ओतना अनगिनत बनउब जेतना अकासे में तारा अहईं। मई तोहरे लोगन क इ समूची भुईया देब जेका मई ओनका बचन दिहउँ ह। इ भुईया हमेसा ओनकइ होइ।"

14 एह बरे यहोवा अफसोस किहेन। यहोवा उ नाहीं किहेन जउन उ कहे रहेन। उ लोगन क बरिबाद नाहीं किहेन।

15 तब मूसा पहाड़े स खाले उतरा। मूसा क लगे अगवा अउ पाछे लिखा भवा करार वाला दुइ समथर पाथर रहेन। 16 परमेस्सर खुद ओनेँ पाथरन क बनएस। परमेस्सर खुद उ आग्यन क पाथरे प खोदेस ह।

17 पहाड़े स तरखाले उतरत यहोसू मनइयन क हल्लागुल्ला सुनेस। यहोसू मूसा स कहेस, "खाले पड़ाव में लड़ाई क अवाज सुनाइ पड़त अहइ।"

18 मूसा जवाब दिहेस, "इ फउजे क जीत क सोर न बाटइ अउर न ही हार जाए प चिचिआइ क सोर। मई जउन अवाज अनकत अहउँ उ गाने का अवाज अहइ।"

19 जब मूसा डेरा क निअरे आवा तउ उ सोना क बछवा अउ लोगन क गावत अउ नाचत भवा निहारेस। मूसा बहोत कोहाइ गवा अउ उ समथर पथरन क भुईया प गिराइ दिहस अउ ओनका तोड़ दिहस। पहाड़े क तलहटी में उ ओनका रेजा रेजा कइ दिहस। 20 तबहिँ मूसा लोगन क बनवा भवा बछवा क तोड़ फोड़ डाएस। उ सोना क आगी में टेघराएस। उ सोना क ऐतना पीसेस कि उ चूरन होइ गवा। उ सोना क चूरन क पानी में बहाइ दिहस। तबहिँ उ इस्त्राएल क मनइयन क पानी पिअइ बरे मजबूर किहस।

21 मूसा हारून स कहेस, "इ मनइयन तोहरे संग का किहेन? कि तू ओनका अइसे बुरा पाप करइ क लिआया?"

22 हारून जवाब दिहस, "महासया। जिन कोहाअ। आप जानत बाटेन कि लोगन हमेसा गलत काम करइ क तइयार रहत हीं। 23 लोग मोसे कहेस, 'मूसा हम पचन्क मिस्त्र स बाहेर लइ आया। मुला हम पचे नाहीं जानित कि ओकरे संग का भवा बाटइ। एह बरे हम सब मनइयन क राह देखावइ वाला कउनो देवतन क बनावा।'

24 एह बरे मई मनइयन स कहेस, 'जदि तोहरे लगे सोना क अंगूठियन होइ तउ ओनका मोका दइ दिया।' मनइयन मोका आपन सोना दिहेन ह। मइ इ सोना क आगी में झोंका अउ इ बछवा आगी स बाहेर आएस।"

25 मूसा लखेस कि लोग नियंत्रण स बाहेर होइ गएन, काहेकि हारून ओह पइ नरम होइ गएन ह। मनई मूरख क नाई इ तरह क ब्योहार करत बाटेन। ओनकइ सब दुस्मन लखि सकईं। 26 एह बरे मूसा डेरा क दरवाजे प ठाड़ भवा। मूसा कहेस, "कउने मनई जउन यहोवा क पाछा करइ चाहत ह मोरे लगे आवइ।" तब लेवी क परिवारे क सबइ मनइयन परात परात मूसा क लगे आएन।

27 तबहिँ मूसा ओनसे कहेस, "इ तरह इस्त्राएल क परमेस्सर यहोवा क कहात ह: 'हर मनई आपन तरवार उठाइ लेइ अउ डेरा क एक निकास स दूसर निकास ताई जाइ। तू पचे उ लोगन क जरूर मारइ चाही चाहे उ तोहार आपन भाई, दोस्त अउ पड़ोसी ही क्यों न हो।'"

28 लेवी क परिवारे क मनई मूसा क हुकुम मानेन। उ दिना इस्त्राएल क करिब तीन हजार मनई मर गएन। 29 तब मूसा कहेस, "आज यहोवा क सेवा करइ बरे अपने आपक तइयार कर ल्या। काहेकि यहोवा आज तोहका आसीर्बाद देइही! अगर चाहे कि कउनो आदमी आपन पूत या रिस्तेदार क खोइ देत ह।"

30 दूसर दिन भिन्सारे मूसा मनइयन स कहेस, "तू पचे खउफनाक पाप किहा ह। मुला अब मई यहोवा क लगे ऊपर जाब। सायद कि मई तोहार पाप बरे प्रायश्चित कइ सकत हउँ।" 31 तउ मूसा लौटिके यहोवा क लगे गवा अउ कहेस, "कृपा कइके सुना। इ लोग बहोत बुरा पाप किहेन ह अउ सोना क एक देवता बनएन ह। 32 अबहिँ ओनका पाप खातिर छिमा कइ दिया। जदि आप छिमा न करब्या तउ मोर नाउँ "जिन्नगी क किताबे\* स मेट दिया जेका आप लिखे अहा।"

33 मुला यहोवा मूसा स कहेस, "जउन मोरे खिलाफ पाप करत हीं, सिरिफ अइसा ही मनई बाटेन जेकर नाउँ मई आपन किताबे स मेटत हउँ। 34 एह बरे जा अउ मनइयन क हुवाँ लइ जा, जहाँ मई कहत हउँ। मोर सरगदूत तोहरे अगवा अगवा चली अउ तोहका राह देखाइ। जब उ मनइयन क सजा देइ क टेमें आइ, तउ जउन पाप किहे बाटेन तब ओनका सजा दीन्ह जाइ।" 35 एह बरे यहोवा मनइयन में एक भयंकर बेरामी पड़वा किहेन ह। उ एह बरे अइसा किहेन ह कि उ पचे हारून स सोना क बछवा बनवइ क कहे रहेन।

### "मई तोहरे संग न जाब"

**33** तब यहोवा मूसा स कहेस, "तू अउ तोहार उ लोग जेनका तू मिस्त्र स हिआँ लइ आया ह इ ठउर क जरूर तजि दिया। अउर उ भुईया में जा जेका मई इब्राहीम, इसहाक अउ याकूब क देइ क बचन दिहउँ ह। मई ओनका बचन दिहउँ ह। मई वाचा किहेउँ, "मई उ भुईया क तोहरे सन्तानन क देब। 2 मई एक सरगदूत तोहरे अगवा अगवा पठउब। अउर मई कनानी, हिल्ली, एमोरी, परिज्जी, हिब्बी, अउ यबूसी मनइयन क बाहर हाँक देब। मई उ लोगन क तोहार पहँटा तजि देइ क मजबूर करब। 3 एह बरे उ भुईया पइ जा जउन दूध अउर सहद स भरपूर होइ। मुला मई तोहरे संग न जाब। तू पचे बहोत जिद्दी अहा। जदि मई तोहरे संग जाब तउ तोहार नास करब।"

4 मनइयन इ बुरी खबर सुनेन अउ बहोत दुःखी भएन। एह बरे लोग आपन गहना उतार लिहेन। 5 उ काहेकि यहोवा मूसा स कहेन, "इस्त्राएल क मनइयन स कहा, 'तू पचे हठी लोग अहा। जदि मई तोहरे संग सिरिफ थोड़ी बरे होबउँ, होइ सकत ह मई तू पचन्क नास कइ देब। एह बरे सबइ

"जिन्नगी क किताब" कइती इसारा करत ह कि यहोवा किताब रखत ह, जेहमाँ सब मनइयन क नाउं लिखा रहत ह।

आपन गहना उतारि देई। तब मई इ निहचय करब कि तोहरे संग का करी।” 6एँह बरे इस्त्राएल क लोग होरेब अर्थात् सीनै पहाड़े स अगवा आपन गहना उतारे रहेन।

### बड़ठकावाला तत्कालिक तम्बू

7मूसा बड़ठकावाला तम्बू क डेरा स कछू दूर लइ गवा। हुवाँ उ ओका लगाएस अउ ओकर नाउँ “बड़ठकावाला तम्बू” राखेस। कउनो व्यक्ति जउन यहोवा स कछू जानइ चाहत रहा, ओका डेरा क बाहरे बड़ठकावाला तम्बू ताई जाइ क पड़त रहा। 8जब कबहुँ मूसा बाहरे बड़ठकावाला तम्बू में जात तउ मनइयन ओका निहारत रहतेन। लोगन आपन तम्बू क दुआरे ठाड़ रहतेन अउ मूसा क तबहिँ ताई लखत रहतेन जबहिँ ताई मूसा बड़ठका वाला तम्बू में न चला जात। 9जब मूसा बड़ठकावाला तम्बू में घुसरत एक लम्बा बादर क खम्भा खाले उतर जात अउ उ बादर बड़ठकावाला तम्बू क दुआरे ठहरत। इ तरह यहोवा मूसा स बात करत रहत। 10जब लोगन बड़ठकावाला तम्बू क दुआर बादर क लखतेन उ निहुरेस अउ परमेस्सर क आराधना किहेस। हर मनई आपन तम्बू क दुआरे ओकर आराधना करत रहा।

11इ तरह यहोवा मूसा स आमने-सामने बात करत रहा। यहोवा मूसा स इ तरह बात करत रहा जइसे कउनो मनई आपन मीत स बतियात होइ। यहोवा स बात करइ क पाछे मूसा हमेसा डेरा में वापस लौटत रहा। नून क पूत यहोसू मूसा क सहायक रहा। यहोसू हमेसा तम्बू में रहत रहा। जब मूसा ओका छोड़त रहा।

### मूसा यहोवा क महिमा लखत ह

12मूसा यहोवा स कहेस, “आप मोका इ पचन्क क अगुवाइ करइ क कहया ह। मुला आप इ नाहीं बताएन कि आप मोरे संग केका पठइहीं। आप मोसे कहेन, ‘मई तोहका अच्छी तरह जानत हउँ अउ मई तोहसे खुस अहउँ।’ 13जदि मई तोहका फुरे फुरे खुस किहेउँ ह, मोका तोहार निर्णय क बारे में जानइ दया अउर तू मोका आपन तरह सिखावा। तब मई आपक लगातार खुस राखि सकत हउँ। याद राखा कि इ आप क लोग अहउँ।”

14यहोवा कहेस, “मई खुद तोहरे संग चलब। मई तोहका राह देखाउब।”

15तबहिँ मूसा यहोवा स कहेस, “जदि तू हम पचन्क संग न चलब्या तउ तू इ ठउर स हम पचन्क जिन दूर पठवा। 16हम पचे इ भी कइसे जान लेब कि तू मोसे अउर इ लोगन स खुस अहा? जदि तू संग चलब्या तउ हम पचे निहचय इ जानब। तोहका हमरे संग होइ क पाछे इ देखाउब कि मई अउर तोहार लोगन इ धरती क दूसर लोगन स कइसे अलग होइ जाब।”

17तब यहोवा मूसा स कहेस, “मई उहइ करब जउन तू कहत बादया। मई इ करब काहेकि मई तोहसे खुस अहउँ। मई तोहका अच्छी तरह स जानत हउँ।”

18तब मूसा कहेस, “अब किरपा कइके मोका महिमा देखावा।”

19परमेस्सर कहेस, “मई आपन उचित भलाई क तोहार आगे स गुजारउब। मई यहोवा अहउँ अउर मई आपन नाउँ क घोषणा करब जेसे तू ओका सुनि सका। मई कउनो भी व्यक्ति प कृपा अउ पिरेम देखाउब जेनका मई चाहउब। 20मुला तू मोर मुँह नाहीं निहार सकत्या। कउनो भी मनई मोका लख नाहीं सकत अउर जदि लखि लेत ह तउ उ जिन्य नाहीं रहि सकत।

21“मोरे लगे नगिचे एक तु चट्टान बाटइ। तू उ चट्टाने प ठाड़ होइ सकत ह। 22मोर महिमा उ ठउर स होइके जाइ। मई तोहका उ चट्टाने क बड़की दरार में राखब अउ तोहका आपन हथवा स ढाँकब जे समइ मई गुजरब। 23तबहिँ मई आपन हाथ हटाइ लेब अउर तू मोर पीठ भइ देखब्या। मुला तू मोर मुँह नाहीं देख पउब्या।”

### पाथर क नई पाटी

34 तब यहोवा मूसा स कहेस, “दुइ अउर समथर पाथरन ठीक वइसे ही बनावा जइसे पहिले दुइ रहीं जेका तू तोग दिहे रहा। मई एह प ओनही सब्दन क लिखब जउन पहिले दुइनउँ पाथर क पाटी प लिखा रहेन। 2भियान भिन्सारे तइयार रहया अउ सीनै पहाड़े प आवा। हुवाँ मोरे समन्वा पहाड़े क चोटी प ठाड़ रहया। 3कउनो मनई क तोहरे संग नाहीं आवइ दीन्ह जाइ। हिआँ तलक कि तोहरे गोरू अउ भेड़ी क झुण्ड क भी पहाड़े क उ पार घास नाहीं चरइ चाही।”

4एँह बरे मूसा पहिले पाथर क तरह पाथर क दुइ समथर पाटी बनएस। तब दूसर दिन भिन्सारे उ सीनै पहाड़े प गवा। मूसा उहइ किहेस जइसा यहोवा ओका हुकुम दिहे रहेन। मूसा आपन संग पाथर क दुइ पाटी लइ गवा। 5मूसा क पहाड़े प पहुँच जाइ क पाछे यहोवा ओकरे लगे बादर में खाले पहाड़े प आवा। यहोवा हुवाँ मूसा क लगे ठाड़ रहा। उ यहोवा क नाउँ लिहेस।

6यहोवा मूसा क समन्वा स गवा अउ उ कहेस, “यहोवा, दयालु यहोवा, अउ कृपालु परमेस्सर अहइ। यहोवा कोहाइ मैं धीरे करत ह। यहोवा महान पिरेम स सराबोर बा। यहोवा बिस्सास क जोगग बा। 7यहोवा हजारन पीढ़िन प कृपा करत ह। यहोवा लोगन क जउन उ पचे पापन्क करत हीं, छिमा करत ह। मुला यहोवा अपराधी क सजा देइ मैं चूकत नाहीं। यहोवा सिरिफ अपराधी क सजा नाहीं देइ मुला ओनके बेटवन, नाती, पंती अउ संती क भी बुरी बात क सजा देइ जउन उ पचे किहे रहेन।

8तब तुरन्तइ मूसा धरती प निहुरा अउ यहोवा क पूजेस। मूसा कहेस, 9“सुआमी। जदि आप मोसे खुस अहउँ तउ हमार साथे चलइँ। मई जानत हउँ कि उ पचे हठी लोग अहइँ। मुला हम पचन्क ओन पापन्क अउ अपराधन्क छिमा कइ दया, जउन हम पचे किहेन ह।”

10तब यहोवा कहेस, “मई तोहरे सबहिँ लोगन क संग इ करार करत हउँ। मई अइसा अचरज कार्य करब जइसे इ धरती प कउनो भी दूसर रास्ट्र क खातिर पहिले कबहुँ नाहीं कीन्ह गवा रहा। तोहरे संग सबहिँ लोगन उ अचभ्वा क निहिरिहीं जउन मई तोहरे बरे करब।” 11आज मई जउन

हुकुम देत हउँ ओका माना। मई कनानी, हित्ती, एमोरी, परिज्जी, हिब्बी, अउ यबूसी क बाहेर निकरि जाइ क मजबूर करब। 12होसियार रहा। उ लोगन क संग कउनो समझौता जिन करा जउन उ पहुँटा में रहत अहई जहाँ तू जात अहा। जदि तू ओनकइ संग समझौता करब्या तउ तू ओहमों फँस जाब्या। 13ओनके वेदी क नास कइ डावा उ पाथरन क तोड़ि डावा जेका उ पचे पूजत बाटेन। ओनकइ मूरत\* क काटिके बहाइ द्या। 14कउनो दूसर देवता क आराधना जिन करा। मई “यहोवा कना - ईस्र्यालु यहोवा” अहउँ। इ मोर नाउँ अहइ। मई “एलकना ईस्र्यालु परमेस्सर हउँ।”

15“जउन लोग उ पहुँटा में रहत हीं ओनसे कउनो समझौता जिन करा। जदि तू इ करब्या तउ जब उ सबइ आपन देवतन क पूजिहीं तब तू ओनके साथे होइ सकब्या। उ पचे तोहका सामिल होइ बरे न्यौतिहीं अउर तू ओनकइ भेंट क खाब्या। 16तू आपन बेटवन क पत्नी बनवइ बरे ओनकइ कछू बिटियन क चुन सकत ह। उ पचे बिटियन झूठ देवतन क पूजा करत रहत हीं। उ पचे तोहरे बेटवन स उहइ करवाइ सकत हीं।

17“मूरत जिन बनाया।

18“बे खमीरे क रोटी क दावत क त्यौहार मनावा। मोरे हुकुम बरे सात दिना तलक बेखमीरे क रोटी खाया। एका उहइ महीना में करा जेका मइ चुनेउँ ह जउन कि अबीब क महीना अहइ। काहेकि उहइ महीना अहइ जब तू मिस्त्र स बाहेर आए रहया।

19“कउनो भी मेहरारू क पहिलौटी बेटवा मोर बा। पहिला जनावर भी जउन तोहार गाय-बोकरी अउ भेड़ी स पइदा होइ, मोर अहइ। 20जदि तू पहिले पइदा भए गदहा क आपन बरे रखइ चाहत बाट्या तउ तू एका भेड़ी क बच्चा स बेसहि सकत ह। मुला अगर तू उ गदहा क भेड़ी क बच्चा स नाहीं वेसहत्या तउ तोहका उ गदधा क गरदन जरूर तोड़ दइ चाही। तोहका आपन पहिलौटी सब पूतन बरे मोसे बेसहइ क होइ। कउनो व्यक्ति बे भेंटे क मोरे समन्वा न आइ।

21“तू छः दिन काम करा। मुला सातवाँ दिन अराम करा।। पौध रोपइ अउ फसिल काटइ क समझ्या भी तोहका सबित क दिन क धियान रखइ चाही।

22“हपतन क त्यौहार मनावा। फसल कटाइ क त्यौहार क मनावा। आखीर में फसल काटइ क दावत करा।

23“हर साल तोहार सब मनई तीन दाई आपन सुआमी, यहोवा इस्त्राएल क परमेस्सर क लगे जइहीं।

24“जबहि तू आपन भुईया में पहुँचब्या मई तोहरे दुस्मनन क उ भुईया स बाहेर जाइके मजबूर करब। मई तोहरे चौहदी क बड़ाउब अउर तू जिआदा स जिआदा धरती पउब्या। तोहका आपन परमेस्सर यहोवा क समन्वा बरिस में तीन दाई जाइ चाही। अउर तोहसे उ टेमें तोहर देस लेइ क कउनो जतन न करी।

25“जब तू बलि स खून भेंट करा तउ उहइ समझ्या खमीर जिन भेंट करा।

“अउर फसह त्यौहार क कछू भी गोस दूसर भिन्सारे तलक नाहीं रखइ चाही।

26“यहोवा क आपन पहली काटी भइ फसल द्या। उ चीजन्क यहोवा आपन परमेस्सर क घरे लइ आवा।

“बोकरी क बच्चा क ओकर महतारी क दूध में जिन पकावा।”

27तब यहोवा मूसा स कहेस, “जउन बातन क मई बतायउँ ह ओनका लिखि ल्या। इ आदेस क अनुसार मई तोहार अउर आपन बीच करार किहउँ ह।”

28मूसा हुवाँ यहोवा क संग चालीस दिना अउ चालीस रात रहा। उ पूरे टेम तलक न खइया क खाएस अउर न पानी पिएस। अउर मूसा क करार क सब्दन क दस-आग्यन क दुइ समथर पाथरन प लिखेस।

### मूसा क चमकत मुँह

29तब मूसा सीनै पहाड़े स तरखाले उतरा। इ यहोवा क दुइनउँ पाथरे क समथर पाटी क संग लइ आवा। मूसा क मुँह चमकत रहा। काहेकि उ यहोवा स बात किहेस। मुला मूसा इ बरे नाहीं जानत रहा। 30हारून अउ इस्त्राएल क सब लोगन लखेन कि मूसा क मुँह चमकत रहा। ऐँह बरे उ पचे ओकरे पास जाइ स डेरनेन।

31मुला मूसा ओनका बोलाएस। ऐँह बरे हारून अउ सबहि अगुवा लोग मूसा क लगे गएन। मूसा ओनसे बतियान। 32ओनके पाछे इस्त्राएल क सबहि लोग मूसा क लगे आएन। अउर मूसा ओनका उ आदेस दिहेस जउन यहोवा सीनै पहाड़े प दिहे रहा।

33जब मूसा बात करब खतम किहेस तउ उ आपन मुँह क एक ओढ़ना स ढँकि लिहस। 34जब कबहुँ मूसा यहोवा क समन्वा बात करइ जात तउ ओढ़ना क हटाइ लेत। तब मूसा बाहेर आवत अउ इस्त्राएल क लोगन क इ बतावत जउन यहोवा क हुकुम होत रहा। 35इस्त्राएल क मनइयन देखत रहेन कि मूसा क मुँह तेज स चमकत रहा। ऐँह बरे मूसा आपन मुँह फुन ढँकि लेत। मूसा आपन मुँहना क तब तलक ढँके रखत रहा जब तलक उ यहोवा क संग बात करइ अगली दाई नाहीं जात रहा।

### सबित क नेम

35 मूसा इस्त्राएल क सबहि मनइयन क बटोरेस। मूसा ओनसे कहेस, “मई उ सब आदेसन क बताउब जउन यहोवा तू पचन्क करइ क आदेस दिहस ह।

2“काम करइ क छः दिन अहई। मुला सातवाँ दिन तू पचन्क अराम क दिन खास दिन होइ। उ खास दिन अराम कइके तू पचे यहोवा क स्रद्धा देब्या। जदि कउनो सातवाँ दिन काम करी तउ ओका जरूर मारि डावा जाइ। 3सबित क दिना तू सबन्क कउने ठउर प आगी तलक नाहीं बारइ चाही जहाँ कहुँ तू पचे रहत बाट्या।”

उ पाथरन ... मूरत “स्मारक क असेरा स्तम्भ” इ पाथर क प्रतीक अउ लकड़ी क खम्भा रहेन जेका मनई झूठ देवता बरे याद रखइ अउ स्रद्धा बरे खइ करत रहेन।

### पवित्तर तम्बू क सामान

4मूसा इस्त्राएल क सबहिं मनइयन स कहेस, “इहइ बा जउन यहोवा हुकुम दिहे अहइ। 5यहोवा बरे खास भेंट बटोरा। तोहका आपन मन में ठान लेइ चाही कि तू पचे का भेंट में देब्या। अउर तब तू उ भेंट यहोवा क लगे लइ आवा। सोना, चाँदी, काँसा, 6नीला बैगनी अउ लाल कपड़ा, उत्तिम सन अउ बोकरी क बार, 7भेड़ी क लाल रंगी खाल, उत्तिम चाम, बबुरे क लकड़ी, 8दिया बरे जइतूने क तेल, अभिसेक क तेल बरे मसाले सुगन्धि धूप बरे मसाला, 9गोमेद रतन अउ दूसर रतन एपोद अउर निआव क थइला प लगावा जइहीं।

10आप सबहिं कुसल कारीगर क चाही कि यहोवा जउन चीजन्क हुकुम दिहे अहइँ ओनका बनावा। इ सबइ उ चीज अहइँ जेनके बरे यहोवा हुकुम दिहे अहइँ। 11पवित्तर तम्बू, ँँकरे बाहेर क तम्बू, अउ एकर ढकना, हुक, तखता, पाटी, खम्भा अउ आधार। 12पवित्तर संदूख, अउ एकर खम्भन अउ संदूखे क ढकना, अउ दरवाजे क रास्ता क ढाँपइ बरे पर्दा। 13मेज अउ एकर खम्भन, मेजे प धरी जाइवाली सब चीज, अउ मेजे प धरी जाइवाली खास रोटी, 14रोसनी क बइपरइ बरे डीबट, अउर ँँकर सबइ बासन, ँँकर दिया, अउ रोसनी बरे तेल, 15धूप बारइ बरे वेदी अउ ँँकर खम्भन, अभिसेक क तेल अउ महकउआ धूप, बइठकावाला तम्बू क प्रवेस दुआर क ढकइ वाली कनात, 16होमबलि क बारइ बरे वेदी, एकर काँसा क झंझरी, खम्भन अउ वेदी प बइपरइ बरे सबहिं चिजियन, काँसा क खोरा अउ आधार, 17आँगन क चारिहूँ कइँती पर्दा, अउर खम्भा अउ एकर आधार, अउर आँगन क प्रवेस दुआर क ढकइवाला कनात, 18तम्बू क थामइ बरे बइपरइ खातिर खूँटी अउर आँगन क घेरइवाला पर्दा क दिवार, खूँटी स बाँधइवाली लसुरी। 19अउ खास बुना भवा ओढ़ना जेका याजक पवित्तर ठउरे प पहिरहीं। इ खास ओढ़ना हारून अउ ओकरे बेटवन क पहिरइ बरे अहइँ। उ पचे इ ओढ़ना क तब पहिरहीं जब उ पचे याजक क रूप में सेवा करिहीं।”

### लोगन क बइका भेंट

20तब इस्त्राएल क सबहिं मनई मूसा क लगे स चलेन। 21सबहिं मनइयन जउन भेंट चढ़ावइ चाहत रहेन आएन अउर यहोवा बरे भेंट लिआएन। इ भेंट बइठकावाला तम्बू क बनावइ, तम्बू क सब चीजन अउ खास ओढ़ना बनावइ क काम में लाइ गइन। 22सबहिं मेहरारू-मनसेधू, जउन चढ़ावा देइ चाहत रहेन, किसिम किसिम क आपन आपन सोना क गहना लइ आएन। उ सबइ पिन, कान क बाली, मुंदरी, दूसर गहना लइ आएन। उ पचे आपन सबहिं गहना क चढ़ाएन। इ यहोवा क खास भेंट रही।

23हर मनई जेकरे लगे नीला, बैगनी अउ लाल कपड़ा अउर सन क उत्तिम रेसा रहा, उ इ सबन्क यहोवा क लगे लइ आवा। उ मनई जेकरे लगे बोकरी क बार, लाल रंग क भेड़ी क खाल, उत्तिम चमड़ा रहा, ओका उ यहोवा क लगे लइ आवा। 24हर मनई जउन चाँदी, काँसा चढ़ावइ चाहत रहा यहोवा क भेंट क रूप में ओका लियाएस। हर

मनई जेकरे लगे बबुरे क लकड़ी रही, आवा अउ ओका यहोवा क चढ़ाएस। 25हर माहिर मेहरारू सन क उत्तिम रेसावाला नीला, बैगनी अउ लाल ओढ़ना बनाएस। 26उ सबहिं मेहरारू जउन माहिर रहीं अउ इ काम बरे ओकर मदद करइ सकत हीं उ पचे बोकरी क बारे स ओढ़ना बनाएन।

27नेतन सुलेमानी पाथर तथा दूसर रतन लइ आएन। इ सब नग अउ रतन याजक क एपोद अउ निआउ क थइली में लगाए रहेन। 28लोग मसाला अउ जइतून क तेल भी लइ आएन। इ चीजन महकउआ धूप, अभिसेक क तेल अउ दिया क तेल बरे बइपरी गइन।

29इस्त्राएल क सबहिं मनइयन जउन मदद करइ चाहत रहेन यहोवा बरे भेंट लइ आएन। मनइयन इ सबही भेंट दिल खोलिके जेतन उ पचे चाहेस दिहेन। इ भेंट उ सबइ चीजन्क बनवइ बरे काम में आइन जेका यहोवा मूसा अउ लोगन क बनाइ क हुकुम दिहे रहेन।

### बसलेल अउ ओहोलीआब

30तब मूसा इस्त्राएल क मनइयन स कहेस, “लखा यहोवा बसलेल, उरि क बेटवा (उरि हूर क बेटवा रहा) जउन यहूदा क परिवार गोत्र स रहा क चुनेस। 31अउर उ बसलेल क परमेस्सर क आतिमा स भरि दिहस। इसलिए उ बुद्धि स परिपूर्ण अहइ अउर उ हर प्रकार क सिल्पकारी कार्य क करइ में होसियार अउ माहिर अहइ। 32उ सोना, चाँदी अउ काँसा क चीजन्क नमूना बनाइ सकत ह। 33उ नग अउर रतन क काट अउ जइ सकत ह। बसलेल लकड़ी क काम कइ सकत ह अउर सबहिं तरह की चीजन क बनइ सकत ह। 34यहोवा बसलेल अउ ओहोलीआब क दूसर लोगन क सिखवइ क जोग्यता दइ दिहस ह। ओहोलीआब दन क परिवार गोत्र स अहीसामाक क पूत रहा। 35यहोवा इ दुइनुँ मनइयन क सब तरह क काम कइ क कुसलता दइ दिहस। ह। उ पचे बढई अउ लोहार क काम करइ क जोग्यता रखत हीं। उ सबइ नीला, बैगनी अउ लाल ओढ़ना अउ सन क उत्तिम रेसा वाला कपड़ा स तस्बीर क काढ़िके ओनका बुन सकत हीं। अउर उ पचे ऊन स भी चीजन्क बुन सकत हीं। उ सबइ प्रकार क काम करइ सकत ह अउर सबइ प्रकार क डिजाइन बनाइ सकत ह।

**36** “ँह बरे बसलेल, ओहोलीआब अउ सब चतुर मनई उ काम करिहीं जेनका यहोवा हुकुम दिहे अहइ। यहोवा इ मनइयन क ओन सबहिं काम करइ क बुद्धि अउ समझ दइ दिहे अहइ जेकर जरूरत इ पवित्तर ठउर क सेवा करइ बरे अहइ।”

2तब मूसा बसलेल, ओहोलीआब अउ सबहिं दूसर मनइयन क बोलाएस जेनका यहोवा खास चतुराई दिहे रहा। अउर इ पचे आएन काहेकि इ काम में मदद करइ चाहत रहेन। 3मूसा इस्त्राएल क उ कुसल मनइयन क उ सबहिं चीजन्क दिहेन जेनका इस्त्राएल क लोग उपहार क रूप में लइ आए रहेन। अउर उ पचे पवित्तर ठउर क बनवइ में उ चीजन्क बइपरेन। मनइयन रोज भिन्सारे भेंट लइ आवत रहेन। 4तब सबहिं कुसल मनइयन पवित्तर ठउर क काम क

अनजाम देइ बरे क जगह जमा भएन। अउर उ पचे मूसा स बात करइ गएन। उ पचे कहने, 5“लोग बहोत सारे चिजन लाए अहई, अउर हम पचन्क लगे ओसे बहोत जिआदा सामान अहइ जेतना कि उ काम क पूरा करइ बरे चाही जेका करइ क हुकुम यहोवा दिहस ह।”

6तबहिं मूसा सिबिर में खबर क प्रचार कराएस: ‘कउनो मनसेधू या मेहरारू क अब कउनो भेंट पवितर तम्बू में न चढ़ाई चाही।’ 7इ तरह लोगन जेतना चाही ओसे जियादा देइ क बन्द कइ दिहेन।”

### पवितर तम्बू

8तब कुसल कारीगरन तम्बू बनउब सुरू किहेन। उ पचे नीला, बैगनी अउ लाल ओढ़ना अउ सन क उत्तिम रेसा स दस पर्दा बनाएन। अउर उ पचे करूब सरगदूतन क तस्वीरन क पर्दन प काढ़ेन। 9हर एक पर्दा बराकर नाप क रही। इ अट्ठाइस हाथ लम्बी अउर चार हाथ चौड़ी रही। 10कारीगरन पर्दन क दुइ भाग में बाँटि दिहेन। उ पचे पाँच ठु पर्दन क एक हीसा में जोड़ के पहिला समूह बनाएन। दूसर समूह क भी उ पचे पाँच ठु पर्दन क एक हीसा में जोड़के बनाएन। 11पहली समूह क आखरी पर्दा क सिरा क संग फंदा बनइ बरे नीला कपड़ा प्रयोग भवा रहा। उ पचे दूसर समूह क आखरी पर्दा क संग भी उहइ काम करइ रहेन। 12पहिले समूह क आखरी पर्दा क सिरा में पचास फंदा रहेन अउ दूसरे समूह क आखरी पर्दा क सिरा में भी पचास फंदा रहेन। फंदा एक दूसर क आमने सामने रहेन। 13तब उ पचे पचास सोने क छल्ला बनाएन। उ पचे इ फलियन क दुइनउँ कनात क जोड़इ बरे लगाएन। इ तरह पवितर तम्बू क जोड़के एक हीसा बनाइ गएन।

14तब कारीगरन दूसर तम्बू पवितर तम्बू क ढाँकइ बरे बनाएन। उ ग्यारह पर्देन बनावइ बरे बोकरी क बारन क प्रयोग किहेन। 15सबहिं ग्यारह पर्देन एक ही नाप जोख क रहिन। उ सबइ तीस हाथ लम्बी अउ चार हाथ चौड़ी रहिन। 16कारीगरन पाँच पर्देन क एक में सिएस अउ छ पर्देनन क दूसर में सिएस। 17उ पचे पहिली समूह क आखरी पर्दा क सिरा स जोड़इ बरे पचास फंदा बनाएन। अउ दूसर कनाते क समूह क आखरी कनाते क सिरा में भी पचास फली बनाएन। 18कारीगरन पर्देन क दुई समूह क जोड़इ बरे पचास काँसा क छल्ला बनाएन अउर एक तम्बू बनाएस। 19तबहिं उ पचे पवितर तम्बू क दुइ अउर ढकना बनाएन। एक ढकना भेड़ा क लाल रंग क खाल स बनाएन। दूसर ढकना उत्तिम खाले क बनाएन।

20तब उ बबुर क लकड़ी क तखता पवितर तम्बू क सहारा देइ बरे लिहेस। 21हर एक तखता दस हाथ लम्बा अउ डेढ़ हाथ चौड़ा बनाएन। 22हर एक तखता क बगल में दुइ खूँटी एक दुसर स जुड़ रहिन। पवितर तम्बू क सबहिं तखता एक ही तरह क बना रहेन। 23बेसलेल पवितर तम्बू क दक्खिनी हीसा बरे बीस ढाँचा बनाएस। 24तब उ ढाँचा बरे चालीस चाँदी क आधार बनाएस। हर ढाँचा बरे दुइ आधार रहिन। एक आधार एक बगल क खम्भा बरे रहेन। 25उ बीस तखता पवितर तम्बू क उत्तर कइँती भी बनाएस।

उ चालीस चाँदी क आधार बनाएस अउ हर तखतन बरे दुइ ठु बनाएस। 26उ हर ढाँचा क तले दुइ लगइवाला चाँदी क चालीस कुर्सी बनाएस। 27उ पवितर तम्बू क पिछला हीसा (तम्बू क पस्चिमी भाग) कइँती छ: ठु तखता ल्या। 28उ पवितर तम्बू क पिछला भाग क कोना बरे दुइ तखता ल्या। 29इ सबइ तखता तरखाले एक दूसर स जोड़ गवा रहेन। ऊपर में छल्ला तखता क कोना को साथ में जोड़त रहेन। दुइनउँ कोना बरे भी अइसा ही कीन्ह ग रहेन। 30इ तरह हुवाँ पवितर तम्बू क पस्चिम भाग क बरे आठ तखता रहेन। हर एक ढाँचा क बरे दुइ आधार क हिसाब स सोलह चाँदी क आधार रहेन।

31तब कारीगरन बबुरे क लकड़ी स ढाँचा क छड़ बनाएन। पवितर तम्बू क पहली कइँती बरे पाँच छड़ बनाएन। 32अउर पाँच छड़ दूसर कइँती, पाँच छड़ पिछली भाग (पस्चिमी कइँती) बरे बनाएन। 33उ पचे ओहमाँ बीच क छड़ अइसी तरह स बनाएन जउन ढाँचा में स एक छोर स दूसर छोर तलक गुजरत रहिन। 34उ पचे इ तखतन क सोना स मढ़ेन। उ पचे छड़ क धरइ बरे सोना क छल्ला बनाएन उ पचे कड़ियन क भी सोना स मढ़ेन।

35उ सबइ सब ते जिआदा पवितर ठउर क दुआर बरे पर्दा बनाएन। उ पचे सन क उत्तिम रेस अउ नीला लाल अउ बैगनी कपड़ा बइपरेन। उ पर्दा में करूब सरगदूत क तस्वीर काढ़ेन। 36उ पचे बबुरे क लकड़ी क चार खम्भा बनाएन अउ ओनका सोना स मढ़ेन। उ पचे खम्भा बरे सोना क हुक बनाएन अउर खम्भा बरे चार चाँदी क आधार बनाएन। 37तब उ पवितर तम्बू क दुआर बरे पर्दा बनाएन। उ पचे नीला, बैगनी अउ लाल कपड़ा अउर सन क उत्तिम रेसा बइपरेन। पर्दा कढ़ाइ क सामग्री स बनाए गए रहेन। 38तब उ सबइ इ पर्दा बरे पाँच खम्भा अउ ओकर बरे हुक बनाएन। उ सबइ खम्भन क चोटी अउ पर्देन क छड़न क सोना स मढ़ेन। अउर उ पचे काँसा क पाँच आधार खम्भा बरे बनाएन।

### करार क सन्दूख

37 बसलेल बबुरे क लकड़ी स पवितर सन्दूख बनाएस। सन्दूख ढाई हाथ लम्बा, डेढ़ हाथ चौड़ा अउ डेढ़ हाथ ऊँचा रहा। 2उ सन्दूखे क भितरे अउ बाहेर दिवार क निखालिस सोना स मढ़ि दिहस। तब उ सोना क झालर सन्दूखे क चारिहुँ कइँती लगाएस। 3फुन उ सोना क चार छल्ला बनाएस अउ ओनका चारिहुँ कोने प लगाएस। इ छल्लन क संदूख ढोवइ बरे बइपरा जात रहा। दुइनउँ कइँती दुइ दुइ छल्ला रहेन। 4तब उ सन्दूखे क ढोवइ बरे लकरी क खम्भन क लगाएस। खम्भा बरे उ बबुरे क लकड़ी लगाएस, अउ खम्भन क सोना स मढ़ि दिहस। 5उ संदूखे क हर सिरन प बना भवा छल्लन में खम्भन क डाइ दिहस। 6तब उ निखालिस सोना स ढकना बनाएस इ ढाई हाथ लम्बा अउ डेढ़ हाथ चौड़ा रहा। 7तब बसलेल सोना क पीट पीटके दुइ करूब बनाएस। उ ढकना क दुइनउँ छोर प करूब लगाएस। 8उ एक करूब क एक अउ दूसर क दूसर कइँती लगाएस। करूब सरगदूतन क ढकना स एक बनावइ

बरे जोड़ दीन्ह गवा। 9सरगदूतन क पखना अकासे कईंती ऊपर उठाइ दीन्ह गएन। सरगदूतन आपन पखना स सन्दूखे क ढँकि लिहने। सरगदूतन एक दूसर क समन्वा ढकना क लखत रहेन।

### खास मेज

10तब बसलेल बबुर क लकड़ी क मेज बनाएस। मेज दुइ हाथ लम्बी, एक हाथ चौड़ी अउ डेढ़ हाथ ऊँची रही। 11उ मेज क निखालिस सोना स मढ़ेस। उ सोना क झालर मेज क चारिहुँ कईंती किहस। 12तब उ मेज क चारिहुँ कईंती एक पट्टी बनाएस। इ पट्टी करीब चार अंगुल चौड़ा रहा। उ पट्टी प सोना क झालर बनाएस। 13तब उ मेज बरे चार सोना क छल्ला बनाएस। उ मेज क चारिहुँ कोना प सोना क छल्ला लगाएस जहाँ चार ठु पाया रहेन। 14छल्ला पट्टी क नगिचे लगा रहेन। छल्ला खम्भा में लगा रहेन जउन मेज क लड़ जाइ में काम करत रहीं। 15तब उ मेजे क ढोवइ बरे खम्भा बनाएस। इ खम्भा बबुरे क लकड़ी क रहिन। अउर ओन प निखालिस सोना मेढ़ भवा रहेन। 16तब उ ओन चीजन्क बनाएस जउन मेज प काम आवत रहीं। उ थारी, चम्मच, परात, अउ घड़ा बनाएस। इ सब निखालिस सोना स बनवा भवा रहेन। खोरा अउ घड़ा क पेयबलि क देइ बरे बड़परा जात रहेन।

### डीबट

17तब उ डीबट बनाएस। एकरे बरे उ सुद्ध सोना बड़परेस उ सोना क पीट पीट के आधार अउ डण्डा बनाएस। तब उ फूल, कली अउ पंखड़ी बनाएस। उ इ सब चीजन्क एक टुकड़ा में जोरि दिहस। 18डीबट में छः डारन रहिन। एक कईंती तीन डार अउ दूसर कईंती तीन डार रहेन। 19हर डारे प तीन फूल रहेन। इ फूल बदाम क फूल क सकल क बना रहेन। अउर ओहमाँ कली अउ पंखुड़ी रहिन। 20डीबट क डंडा प चार फूल रहेन। इ सबइ कली अउ पंखुड़ी क संग बदाम फूल क सकल क बनवा रहेन। 21हुवों छः डार रहेन-डण्डा क दुइनउँ किनारा स तीन-तीन डार निकलत रहेन। हुआँ एक फूल कली अउ पंखड़ी क संग उ तीनउँ जगह क नीचे जहाँ डार जुड़त रहा, रहेन। 22इ सबहिँ कली अउ डार अउ डीबट निखालिस सोना क बनी रहिन। इ समूचइ सोना क पटिके एक ही में जोड़ दीन्ह ग रहा। 23उ इ डीबट क बरे सात दिया बनाएस तब उ तस्तरी अउ चिमटा बनाएस। हर चीजन्क क निखालिस सोना स बनाएस। 24उ लगभग पचहत्तर पौण्ड निखालिस सोना डीबट अउ ओकर संग प्रयोग में आवइवाली चीजन क बनावइ बरे प्रयोग किहस।

### धूप बारइ क वेदी

25तब उ धूप क जलाइ बरे वेदी बनाएस। उ एका बबुरे क काठे क बनाएस। इ वेदी चउकोर रही। इ एक हाथ लम्बी, एक हाथ चौड़ी अउर दुइ हाथ ऊँची रही। वेदी प चार सीगं रहेन। हर एक कोना प एक ठु सीगं लगा भवा रहेन। इ सीगन्क वेदी क संग एक इकाई बनवइ बरे जोड़

दीन्ह ग रहा। 26चोटी, सबहिँ बगल अउ सीगन्क निखालिस सोना स मढ़ेस। तब उ वेदी क चारिहुँ कईंती सोना क झालर बनाएस। 27उ सोना क दुइ छल्ला वेदी बरे बनाएस। उ सोना क छल्लन वेदी क हर कईंती झालर क तरे राखेस। इ छल्लन में वेदी ढोवइ बरे डण्डा डाई जात रहीं। 28तब उ बबुरे क काठे क खम्भन बनाएस अउ ओनकइ सोना स मढ़ेस।

29तब उ अभिसेक क पवित्तर तेल बनाएस। उ निखालिस महकउआ धूप भी बनाएस। इ चीजन्क उहइ तरह बनावा गवा जउने तरह कउनो कुसल महकउआ बनवइया बनावत ह।

### भेंट बारइ क वेदी

38 तब बसलेल बबुरे क काठ वेदी बनवई बरे बड़परेस। इ वेदी भेंट क बारइ बरे काम में आवत रही। इ चउकोर रही। इ पाँच हाथ लम्बी, पाँच हाथ चौड़ी अउ तीन हाथ ऊँच रही। 2उ हर एक कोना प एक सीग बनाएस। उ सीगन क वेदी क संग जोड़ दिहस। तब उ हर चीज क काँसा स ढँकि दिहस। 3तब उ वेदी प बड़पराइ वाला सबहिँ अउजार बनाएस। उ बर्तनन, बेलचन, खोरन, माँस खाइ बरे काँटन अउ कड़ाहियन बनाएस। उ इ चीजन्क क काँसा स बनाएस। 4तब उ वेदी बरे एक ठू काँसा क जाली बनएस। इ जाली जाल क तरह रही। इ ओका वेदी क पायदाने क नीचे लगाएस। इ वेदी क पेंदी स वेदी क आधा ऊँचाइ तक रहा। 5तब उ काँसे क छल्ला बनाएस अउर एँका जाली क चारिहुँ कोना में लगाइ दिहस। इ छल्ला वेदी क ढोवइ बरे खम्भन क फँसावइ क काम आवत रहेन। 6तब उ बबुरे क काठे क खम्भन बनाएस अउ ओनका काँसा स मढ़ेस। 7खम्भन वेदी क बगल में लगा भवा छल्लन में स लगाइके वेदी क ढोवइ क काम बरे लगाएस। उ वेदी क किनारा बनावइ बरे तखता बड़परेस। वेदी भीतर स खोखल खाली सन्दूखे क तरह रही।

8जउन मेहररूअन पवित्तर बड़ठकावाला तम्बू क प्रवेस दुआर प जमा भवा रहिन आपन काँसा क दरपन दइ दिहने। बसलेल इ दरपन क काँसा स हाथ धावइ क पात्र अउ एकर आधार बनाएस।

### पवित्तर तम्बू क चारिहुँ ओर क आँगन

9तब उ आँगन क चारिहुँ कईंती पर्दा क दीवार बनाएस। दक्खिन कईंती पर्दा क दीवार एक सौ हाथ लम्बी रही। इ पर्दा सन क उत्तिम रेसा क बना रहा। 10दक्खिनी कईंती क पर्दाने बीस खम्भन क सहारे प टिका रहेन। इ खम्भन काँसा क बीस आधारन प टिका रहेन। खम्भन अउ पर्दा क छड़ा बरे हुक चाँदी क बनी रहेन। 11आँगन क उत्तर कईंती पर्दा क दीवार एक सौ हाथ लम्बी रही। बीस खम्भन अउ काँसा क बीस आधारन भी बनई गइने। खम्भन अउ पर्दा क छड़ा बरे हुक चाँदी क रहिन।

12आँगन क पश्चिमी कईंती पर्दा क दीवार पचास हाथ लम्बी रही। हुवाँ दस खम्भन अउ दस आधारन रहिन। खम्भन बरे हुक अउ पर्दा क छड़ा चाँदी क बनाव ग रहेन।

13अँगने क पूर्वी किनारा पचास हाथ चौड़ी रही। अँगने क प्रवेस दुआर इहइ तरफ रहा। 14प्रवेस दुआर क एक कइँती पर्दा क दीवार पन्द्रह हाथ लम्बी रही। इस तरफ तीन खम्भन अउ तीन आधार रहीं। 15प्रवेस दुआर क दूसर कइँती क पर्दा पन्द्रह हाथ लम्बी रहेन। उस तरफ भी तीन खम्भन अउ तीन आधारन रहेन। 16अँगन क चारिहुँ कइँती क पर्दा सन क उत्तिम रेसा क बनी रहीं। 17खम्भन क आधार काँसा क बनी रही। हुक अउ कनात क छड़ा चाँदी क बना रहा। खम्भन क चोटी भी चाँदी स मढ़ा रहा। अँगन क सबहिँ खम्भन चाँदी स बना भवा छड़ा क संग रहेन।

18अँगन क प्रवेस दुआर क पर्दा सन क उत्तिम रेसा अउ नीला लाल अउ बैगनी कपड़ा क बना रहा। एह प कढ़ाई कीन्ह गइ रही। कनात बीस हाथ लम्बा अउ पाँच हाथ ऊँच रही। इ उहइ उँचाई क रही जउने उँचाई क अँगन क चारिहुँ कइँती क कनात रहीं। 19कनात चार खम्भन अउ चार काँसा क आधारन प खड़ी रही। खम्भा क हुक चाँदी क बनी रही। खम्भा क सिरा चाँदी स मढ़ा रहा अउ पर्दा क छड़ भी चाँदी स मढ़ा रहा। 20पवित्र तम्बू अउ अँगन क चारिहुँ कइँती क खूँटी काँसा क बनी रहीं।

21मूसा सबहिँ लेवी मनइयन क हुकुम दिहेस कि उ पचे पवित्र तम्बू करार क तम्बू क बनवइ में काम आवइ वाली चीजन्क क लिखि ल्या। हारून क पूत ईतामार इ सूची रखइ क अधिकारी रहा।

22यहूदा क परिवार समूह स हर क बेटवा उरी क बेटवा बसलेल सबहिँ चीजन्क बनाएस जेनके बरे यहोवा मूसा क हुकुम दिहे रहेन। 23दान क परिवार समूह स अहीसामाक क पूत ओहोलीआब भी ओकर सहायता किहेस। ओहोलीआब एक कुसल सिल्पकार अउ डिजाइनर रहेन। उ सन क उत्तिम रेसा अउ नीला, बैगंती अउ लाल कपड़ा बुनइ में बहोत कुसल रहा।

24दुइ टन स जिआदा सोना पवित्र ठउर बनवइ बरे यहोवा क भेंट कीन्ह ग रहा। (इ मंदिर क मान्ता स तौला ग रहा।)

25कुल मनई जउन गना ग रहेन, पौने चार टन स जिआदा चाँदी दिहन। (इ मन्दिर क मान्ता स तौला ग रहा) 26सबइ मनइयन जउन बीस बरिस या ओसे जिआदा उमिर क रहेन, उ पचे गना गएन। एकइ संख्या 6,03,550 रहेन। अउ हर एक मनई क एक बेका चाँदी कर क रूप देइ क भवा। (पवित्र क अनुसार एक बेका आधा सेकेल क बराबर रहा।) 27उ सबइ पौने चार टन चाँदी क प्रयोग पवित्र तम्बू क एक सौ आधार बनवइ बरे अउ कनात बनवइ बरे किहन। उ पचे पचहत्तर पौण्ड चाँदी हर एक आधार में लगाएन। 28दूसर पचास पौण्ड चाँदी क प्रयोग हुक कनाते क छड़ा अउ खम्भन क सिरा क ढाँकइ बनवइ बरे किहेन।

29साढ़े छब्बीस टन स जिआदा काँसा यहोवा क भेंट चढ़ावइ बरे भवा। 30उ काँसा क प्रयोग बड़ठकावाला तम्बू क प्रवेस दुआर क आधार बनवइ में भवा। उ पचे काँसा क प्रयोग वेदी अउ काँसा क जाली बनवइ में भी किहेन। अउ उ काँसा सब अउजार अउ वेदी क बर्तन क बनवइ क

काम में आवा। 31एकर प्रयोग चारिहुँ कइँती कनाते क आधार अउ अँगन क चारिहुँ कइँती प्रवेस दुआर क आधारन क पर्दन बनवइ बरे भवा। अउर बचा भवा काँसा क प्रयोग पवित्र तम्बू क खूँटियन अउ अँगन क चारिहुँ कइँती क पर्दन क बनवइ बरे भवा।

### याजक क खास ओढ़ना

**39** कारीगरन नीला, लाल अउ बैगनी ओढ़ना क खास बस्त्र याजक बरे बनाएन जेनका उ पचे पवित्र ठउर में सेवा क समइ पहिरहीं। उ पचे हारून बरे वइसा ही खास बस्त्र बनाएन जइसा यहोवा मूसा क हुकुम दिहेन।

### एपोद

2उ पचे याजक क एपोद सोना क तार, सन क उत्तिम रेसा अउ नीला, लाल अउर बैगनी कपड़ा स बनाएस। 3(उ पचे सोना क पातर पत्तर क तरह पीटेन अउर तब उ पचे ओका लम्बा धागा क रूप में काटेन। उ पचे सोना क नीला, बैगनी, लाल कपड़ा अउ सन क उत्तिम रेसा में बुनेन। इ काम क कुसल कारीगरन क तरह किहेन।) 4उ पचे एपोद बरे काँधि क पट्टी बनएन। उ पचे एपोद क काँधि क कपड़ा क दुइनउँ कोना स मिलाइके सिएन। 5उ पचे कमर क पेटी बुनेन अउ एकोँ एपोद स जोड़ें। एकोँ एपोद क बनावट क तरह बनाएन। उ सोनहरा धागा, बड़िया सन क रेसा अउ नीला, बैगनी अउर लाल धागा जइसा यहोवा मूसा क हुकुम दिहे रहेन वइसा ही कपड़ा बनाएन। 6कारीगरन सोने क पत्तर में गोमेद मणि एपोद बरे जोड़ें। उ पचे इ रत्न प इस्त्राएल क बेटवन क नाउँ लिखेन। 7तब उ पचे रत्न क एपोद क काँधि प लगाएन। इ रत्न इस्त्राएल क लोगन बरे यादगारी क रत्न रहेन। इ उहइ कीन्ह ग रहेन जइसा यहोवा मूसा क हुकुम दिहे रहेन।

### निआव क थइला

8तब उ पचे निआव क थइला उहइ कुसल कारीगर क दुआर बनाव ग रहा जउन एपोद बनाएस रहा। इ सोना क तार, सन क उत्तिम रेसा अउ नीला, लाल अउ बैगनी कपड़ा क बनाव ग रहा। 9निआव क थइला चउकोर दोहराइके तह कीन्ह भवा रहा। एक बिता लम्बा अउ एक बिता चौड़ा रहा। 10कारीगरन एह प सुन्नर रत्नन क चार लाइन जड़ें। पहली लाइन में एक लाल, एक पुखराज अउ एक मर्कतमणि रही। 11दूसर लाइन में एक फिरोज, एक नीलम अउ एक पन्ना रहा। 12तीसरी लाइन में एक गोमेद, एक अकीक अउ एक आकूत रहा। 13चौथी लाइन में एक लहसुनिया, एक सेसमणि अउ एक कपिस मणि रही। इ सबहिँ रत्न सोना में जड़ा रहेन। 14निआव क थइला में बारह रत्न रहेन। इ बारह रत्न प इस्त्राएल क बेटवन क नाउँ उहइ तरह लिखा ग रहेन जइसा एक कारीगर मोहर प खोदत ह। हर एक रत्न प इस्त्राएल क बारहु बेटवन में स एक क नाउँ रहेन। 15निआव क थइला बरे निखालिस सोना क जंजीर बनावइ गएन। इ लसुरी क नाई बटी गइ रहिन। 16कारीगरन

सोना क दुइ छल्ला बनाएस अउ उ पचे दुइनउँ छल्ला क निआउ क थइला क दुइनउँ कोना प लगाएन। उ पचे काँधा क पट्टा बरे दुइ दू सोना क सेट भी बनाएस। 17तब उ पचे दुइ सोना क जंजीरन क निआव क थइला क कोना क दुइनउँ छल्लन मँ बाँधिस। 18उ पचे सोना क जंजीरन क दूसर सिरन क काँधा क दुइनउँ पट्टियन स बाँधेने। तब उ पचे एँका एपोद क समन्वा जोड़ेस। 19तब उ पचे दुइ अउर सोना क छल्ला बनाएन अउर निआउ क थइला क दूसर कोने प ओनका लगाएस। इ एपोद क निअरे निआव क थइला क अन्दरोनी किनारा मँ रहेन। 20उ पचे एपोद क समन्वा कइँती काँधि क पट्टी क तले दुइ छल्ला लगाएन। इ छल्लन क जोड़न क नगिचे ठीक कमर पेटी क ऊपर रहेन। 21तब उ पचे एक तु नीली पट्टी बइपरेन अउ निआउ क थइला स छल्लन क एपोद क छल्लन स बाँधेन। इ तरह निआव क थइला पेटी क नगिचे लाग रहा अउ इ गिर नहीं सकत। उ पचे इ सब चीजन्क यहोवा क हुकुम क मुताबिक किहेन।

### याजकन क दूसर बस्त्रन

22तब उ पचे एपोद बरे नीला कपड़ा स चोगा बनाएन। इ एक कुसल व्यक्ति दुआरा बुना गाएन। 23चोगा क बीचउ बीच एक छेद रहा। इ छेद क चारिहुँ कइँती कपड़ा क टुकड़ा लाग रही। इ कपड़ा छेद क फाटइ स बचावत रही।

24तब उ पचे सन क उत्तिम रेसा, नीला, लाल अउ बैगनी कपड़ा स अनार बनाएन। उ पचे ओनका क चोगा क खाले कोना प चारिहुँ कइँती लटकाएन। 25तब उ पचे निखालिस सोना क घण्टी बनाएन। उ पचे अनारन क बीच मँ चोगा क खाले सिरा क चारिहुँ कइँती घण्टी क बाँधेन। 26चोगा क सिरा क चारिहुँ कइँती घण्टी अउ अनार रहेन। हर दुइ अनारे क बीच एक घण्टी रही। याजक उ चोगा क तब पहिरत रहा जब उ यहोवा क सेवा करत रहा, जइसा यहोवा मूसा क हुकुम दिहे रहेन।

27कुसल कारीगर हारून अउ ओकरे बेटवन बरे कमीज बनाएन। इ कमीज सन क उत्तिम रेसा स बना रहेन। 28कारीगर लोग उत्तिम सन क रेसन स पगड़ी बनएन। उ पचे सिर क पगड़ी अउ भीतर पहिरइवाला कपड़ा भी सन क उत्तिम रेसा स बनाएस। 29तब उ पचे कमरबन्द क सन क उत्तिम रेसा, नीला, बैगनी अउ लाल कपड़ा स बनाएन। कपड़ा मँ कढ़ाई कीन्ह ग रहेन। इ चीजन क वइसे ही बनाइ गइन जइसे यहोवा मूसा क हुकुम दिहे रहेन।

30तब उ पचे पवित्रर मुकुट बरे सोना क पत्तर बनाएन। उ पचे सोना प इ सब्द लिखेन: “यहोवा बरे पवित्रर”। 31तब उ पचे पतरा स एक नीली पट्टी बाँधेन अउ पट्टी क पगड़ी चारिहुँ कइँती इ तरह बाँधेन जइसा यहोवा मूसा हुकुम दिहे रहेन।

### मूसा पवित्रर तम्बू क निरिच्छन किहेस

32इ तरह “बइठकावाला पवित्रर तम्बू” क सारा काम पूरा होइ गवा। इस्राएल क मनइयन हर चीज ठीक वइसे ही बनाएन जइसा यहोवा मूसा क हुकुम दिहे रहेन। 33तब उ पचे “बइठकावाला तम्बू” मूसा क देखाएन। उ पचे ओका

तम्बू अउर ओहमों क सब चीजन्क देखाएन। उ पचे ओका तखता, ढाँचन, छड़न, खम्भन अउर आधानन क देखाएन। 34उ पचे ओका बइठकावाला तम्बू क ढकना देखाएन जउन लाल रंगी भइ भेड़ा क खाल क बना रहा। अउर उ पचे उ ढकना देखौएन जउन नरम खाल क बना रहा। अउर उ पचे उ कनात देखौएन जउन सब स जिआदा पवित्रर ठउर क प्रवेस दुआर क ढकत रही।

35उ पचे मूसा क करार क सन्दूख देखाएन। उ पचे सन्दूखे क ढोवइवाली खम्भन अउ सन्दूखे क ढकइवाला ढकना क देखाएन। 36उ पचे खास रोटी क अउ मेज प रखइवाली सबहिं चीजन्क देखाएन। 37उ सबइ निखालिस सोना क डीबट अउ ओहँ प धरा भवा सब दिया क देखाएन। उ पचे तेल अउ दूसर सब चीजन्क देखाएँन, अउ दूसर सबहिं चीजन्क जउन दिया क संग बइपरी जात रहीं। 38उ पचे मूसा क सोना क वेदी, अभिसेक क तेल महकउआ धूप, अउ बइठकावाला तम्बू क प्रवेस दुआर क ढकइवाली कनात क देखाएँन। 39उ पचे काँसा क वेदी अउर काँसा क जाली क देखाएन। उ पचे वेदी क ढोवइ बरे बनी भइ खम्भन क मूसा क देखाएन। अउर उ सबइ ओका उ सबहिं चीजन्क देखाएन जउन वेदी प काम मँ आवत रहीं। उ पचे ओका हाथ ढोवइवाला पात्र अउ एकर आधार क देखाएन।

40उ पचे मूसा क आँगने क चारिहुँ कइँती क कनाते क खम्भा अउर आधार क देखाएन। उ पचे ओका उ कनात क देखाएन जउन आँगन क प्रवेस दुआर क ढाँके रही। उ पचे ओका लसुरी अउ बइठकावाला तम्बू क रूँटी देखाएन। उ पचे पवित्रर तम्बू मँ ओका सबहिं चीजन्क देखाएन।

41तबहिं उ पचे मूसा क पवित्रर ठउर मँ सेवा करइवालन याजकन बरे बना ओढ़ना क देखाएन। उ पचे ओका हारून अउ ओकर पूतन बरे बना भवा खास बस्त्र देखाएन। उ पचे उ वस्त्र क तब पहिरत रहेन जब उ पचे याजकन क रूप मँ सेवा करत रहेन।

42यहोवा मूसा क जइसा हुकुम दिहेस, इस्राएल क मनइयन ठीक सब काम उहइ तरह किहेन। 43मूसा सब कामे क धियान स लेखस। मूसा लखेस कि सब काम ठीक उहइ तरह भवा जइसा यहोवा हुकुम दिहे रहेन। एँह बरे मूसा ओनका आसीर्वाद दिहेस।

### मूसा पवित्रर तम्बू क नीव धरत ह

**40** तब यहोवा मूसा स कहेस, 2“पहिले महीना क पहिला दिन बइठकावाला पवित्रर तम्बू क खड़ा करा। 3करार क सन्दूख क पवित्रर तम्बू मँ धरा। सन्दूख क समन्वा पर्दा क रखा 4तब खास मेज क भीतर लइ आवा। जउन सामान मेज प होइ चाही ओनकइ ओह प धरा। तब डीबट क बइठकावाला तम्बू मँ धरा। दिया क डीबट मँ रख एका कइ उचित जगहन पइ धरा। 5सोना क वेदी क धूप क भेंट बरे बइठकावाला तम्बू मँ धरा। वेदी क करार क सन्दूखे क समन्वा धरा। तब कनात क पवित्रर बइठकावाला तम्बू क प्रवेस दुआर प लगावा।

6“बरी भई भेंट क वेदी क पवितर तम्बू क प्रवेश दुआर प धरा। 7काँसा क हउदा क बइठकावाला तम्बू अउ वेदी क बीच धरा। हउदा क पानी स भरि द्या। 8अंगना क चारिहुँ कइँती कनात लगावा। तबहि आंगन क प्रवेश दुआर प कनात लगावा।

9“अभिसेक क तेल स पवितर तम्बू अउ ऍकर हर एक चीज क अभिसेक करा। जबहिँ तू इ चीजन प तेल नउब्या इ पवितर होइ जाब। 10होमबलि बरे वेदी क अभिसेक करा। वेदी क हर एक चीज क अभिसेक करा। तू वेदी क पवितर करब्या। इ सबन त जियादा पवितर होइ जाब। 11तब खोरा अउ ऍकर आधार क अभिसेक करा। अइसा उ चीजनक पवितर करइ बरे करा।

12“हारून अउ ओकरे पूतन क बइठकावाला तम्बू क प्रवेश दुआर प लावा। ओनका पानी स नहवावा। 13तब हारून क खास पोसाक पहिरावा। तेल स ओकर अभिसेक करा अउर ओका पवितर करा। तबहिँ उ याजक क रूप में मोर सेवा कइ सकत ह।

14तउ ओकर पूतन क पोसाक पहिरावा। 15पूतन क अभिसेक वइसा ही करा जइसे ओकरे बाप क अभिसेक किहा ह। तबहिँ उ पचे याजकन क रूप में मोर सेवा कइ सकत हीं। जब तू ओनका अभिसेक करिब्या, उ पचे याजकन होइ जइहीं। उ परिवार भविस्स में हमेसा याजकन रहइ ही।” 16मूसा यहोवा क हुकुम मानेस। उ इ सब किहस जेका यहोवा हुकुम दिहे रहेन।

17इ तरह पवितर तम्बू दूसर बरिस क पहिले महीना क पहिले दिन बनइ दीन्ह गवा जउन टेमें उ पचे मिस्र क तजि दिहे रहेन। 18मूसा पवितर तम्बू क यहोवा क हुकुम क मुताबिक खड़ा किहेस। पहिले उ आधारन क नीचे धरेस। तउ उ तखता क आधारन प धरेस। उ छड़न क लगाएस अउर खम्भन क खड़ा किहेस। 19ओकरे पाछे मोसा बाहरी तम्बू क पवितर तम्बू क ऊपर फइलाएस। एकरे पाछे उ बाहरी तम्बू प दूसर ढकना धरेस। उ इ यहोवा क हुकुम क मुताबिक किहेस।

20मूसा करार लिखा भवा उ दुइ पाथरन क पाटी क लिहेस अउ ओनका सन्दूखे में धरेस। मूसा खम्भन क सन्दूखे में लगाएस। तबहिँ उ सन्दूखे प ढकना धरेस। 21तबबइ मूसा सन्दूखे क पवितर तम्बू में धरेस। उ पर्दा क नीक ठउरे प आइ करइ बरे लगाएस। इसी प्रकार यहोवा क हुकुम क मुताबिक उ करार क सन्दूख क पर्दा क पीछे कइके आइ में कइ दिहेस। 22तब मूसा खास रोटी क मेज क बइठकावाला तम्बू में धरेस। उ ऍका पवितर तम्बू क उत्तर कइँती रखेस। उ इ पर्दा क समन्वा रखेस। 23तबहिँ उ यहोवा क समन्वा रोटी मेज प धरेस। इ उ वइसा

ही किहेस जइसा यहोवा हुकुम दिहे रहेन। 24तब मूसा डीबट क बइठकावाला तम्बू में धरेस। उ डीबट क तम्बू क दक्खिन में मेज क पार धरेस। 25तब मूसा यहोवा क समन्वा डीबटे प दिया रखेस। उ इ यहोवा क हुकुम क मुताबिक किहेस।

26तबहिँ मूसा सोना क वेदी क बइठकावाला तम्बू में धरेस। उ सोना क वेदी क पर्दा क समन्वा धरेस। 27तब उ सोना क वेदी प महकउआ धूप बारेस। उ वइसा ही किहेस जइसा यहोवा ओका हुकुम दिए रहेन। 28तब मूसा पवितर तम्बू क दुआरे कनात लगाएस।

29मूसा बची भइ भेंट क वेदी क पवितर तम्बू क प्रवेश दुआर प धरेस। तबहिँ मूसा एक होमबलि भेंट उ वेदी प चढ़ाएस। उ अन्नबलि भी यहोवा क चढ़ाएस। उ इ सब चीजनक यहोवा क हुकुम क मुताबिक किहेस।

30तब मूसा बइठकावाला तम्बू अउ वेदी क बीच काँसा क खोरा धरेस। उ खोरा में पानी धोवइ बरे धरेस। 31मूसा, हारून अउ हारून क बेटवन आपन हाथ पैर धोवइ बरे इ खोरा क बइपरेन।

32उ पचे हर दई जब बइठकावाला तम्बू में प्रवेश करतेन तउ आपन हाथ पैर धोवतेन। जब उ पचे वेदी क नगिचे जातेन तब भी हाथ पैर धोवतेन। उ पचे ऍका वइसा ही करतेन जइसा यहोवा मूसा क हुकुम दिहे रहेन। 33तब मूसा पवितर बइठकावाला तम्बू क आँगन क चारिहुँ कइँती कनात खड़ी किहेस। मूसा वेदी क आँगन में धरेस। तब उ आँगने क प्रवेश दुआर प कनात लगाएस। इ तरह मूसा उ सबहिँ काम क पूरा किहेस जेका करइ क यहोवा हुकुम दिहे रहेन।

### यहोवा क महिमा

34तब बादर बइठकावाला तम्बू क ढोंकि लिहस। अउर यहोवा क महिमा पवितर तम्बू क भरि द्या। 35मूसा बइठकावाला तम्बू में ऍह बरे नाहीं घुसि सका काहेकि बादर ऍह पइ उतरि आए रहेन अउ यहोवा क महिमा स पवितर तम्बू भरि ग रहेस।

36इ उहइ बादर रहा जउन मनइयन क इसारा किहेस कि कब चलइ क अहइ। जब बादर पवितर तम्बू स उठत तब इस्राएल क मनइयन चलब सुरू कइ देतेन। 37मुला जब बादर पवितर तम्बू प ठहर जात तउ मनइयन चलइ क कोसिस नाहीं करत रहेन। लोगन उहइ जगह पइ तब तलक रहतेन जब तलक बादर तम्बू में रहतेन। 38ऍह बरे दिन भइ बादर पवितर तम्बू में रहतेन। अउर राति में बादर आगी क नाई परगट होतेन। ऍह बरे इस्राएल क सबहिँ मनइयन आपन पूरा जात्रा में बादर क लिखि सकतेन।